





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.298









Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.298





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.298





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.298



1. 6. 238









INSTITVTIO  
**ASTRONOMICA**

Iuxta Hypotheseis  
**TAM VETERVM, QVAM  
COPERNICI, ET TYCHONIS.**

Dictata à P E T R O G A S S E N D O  
Regio Matheseos Professore.

EIVSDEM *Oratio Inauguralis iteratò edita.*



PARISIIS,  
Apud LVDOVICVM DE HEVQUEVILLE,  
viâ Iacobeâ, sub signo Pacis.

M. DC. XLVII.  
CVM PRIVILEGIO.



INSTITVTIO  
ASTRONOMICA

luxu Hypotheses

TAM VETERVM. QVAM  
COPERNICI ET TYCHONIS.

DICTATA A P E T R O C A S S E N D O

Regio Mathematicos Professoris.

EIVSDEM ORATIO INAUGURALIS HIERONYMUS



PARISIIS,  
Apud I. A. BOUQUETUM DE HERVODORATI  
vis Jacobus, sub signo Paris.

M. DC. XLVI.  
CVM PRIVILEGIO.



# EPISTOLA.

exceperis, Te cum nemine quidem de residentia dispensare, nullive ab officio immunitatem tribuere; sed velle nihilominus præter ordinem me habere.

Neque verò nova hæc sunt tuæ erga me benevolentia testimonia; quando ex quo usque tua virtus in sanctissima Eremita enituit, singulari fuisti erga me affectu; & ritu antiquo, ex illa assumptus, ut præficereris, ac regeres Præsul Provincia nostra Metropolitim, tum voluisti me cunctantiorē ad te committere euocatum; tum quanta in me propensione fore, nulla non fecisti occasione perspectum.

Deinceps autem aliò translatus, & in Purpuratum cooptatus Collegium, variisque auctus honoribus, idem erga me perstitisti; neque unquam remitti quicquam ex pristina illa, ac facillima familiaritate es passus; & plerumque, absentem licet, habere me tamen tibi in medullis, præcordiisque significasti. Quæ commemo quidem lubens, ut quanta possum animi gratitudine insinuem, ne quicquam non esse, quod Te mihi pridem sinuoso fixi in pectore; verum nihil iucundius est, quam prætereà commemorasse, quod mihi semper peperit insignem ut admirationem, ita venerationem tui.

Id autem fuit maximè singularis animi candor, quo, fingere nescius; talem in prospectu, qualem in secessu Te semper præbuiisti; ac pro indole generosa, nihil unquam præter decorum; pro antiqua fide, nihil præter fas, & æquum, unquam præstitisti.



EPISTOLA.

Heinc fuit semper sincera illa, & sine fuko pietas, qua prisci, ac legitimi in Deum cultus retinentissimus, es semper omnem novitatem, superstitionemque auersatus; quaque, ut patienter eos nunquam tulisti, qui Religioni prætulerent fucum; sic miro ardore infectatus novos Alcibiadas, non es passus illos, ob sacra Mysteria pessundata, abire impune. Heinc vera, germanaque illa commissi gregis sollicitudo, qua, grassante etiam dira pestis lue, ipsi constanter interfuisti, ac felicitati vertisti posse animam pro eo ponere; raro in hac Dignitate exemplo; ac argumento singulari, nihil Te in speciem ficta pietatis agere: cum huiusmodi sanè occasione persona eripiat, res maneat. Heinc illa infracta, celsaque constantia, qua eripi Tibi fortuna bona passus es; ac, tum minoris illa ducens, quam ut Te amisisse quicquam tuum censes, ne salvis quidem Tibi in alium uti voluisti iuribus; tum superesse Tibi adhuc, quæ abundè essent, professus, ea, quæ oblata subinde fuere Sacerdotia amplissima, cordatissimè recusasti. Heinc illud propositi tenax, honestoque incoctum pectus, quo, seu in Collegio sacro confidens, seu tuo, imò & toti Clero Gallicano praesidens, spectasti semper quicquid dignum Sapiente, bonoque fuit viro: quoque commissæ Tibi varia titulis variis Munera, non ad gratiam unquam, sed proprio delectu, ac prout nota Tibi fuit, cujusque industria semper dispensasti.





# EMINENTISSIMO

S. R. E. CARDINALI

LVDOVICO ALPHONSO

PLESSÆO RICHELIO,

ARCHIEPISCOPO LVGDVN.

GALLIARVM PRIMATI,

Magno Franciæ Eleemosynario.

PETRVS GASSENDVS ET ΔΙΑΓΕΙΝ.



*P E C I M E N* Tibi offero ,  
EMINENTISSIME CARDINALIS,  
meæ illius obseruantia, qua quod exi-  
gendum censuisti abs me, id prestitum  
putes. Nimirum, cum pro ea cura,  
quam Regij Collegij demandatam habes, fecisses,  
ut me Professioni Matheseos Rex Christianissimus  
destinaret, ipse diu quidem, multumque abnui;  
sed euincente heinc tua instantia, heinc veneratio-  
ne, qua te prosequor, adij denique quod iussisti, mu-  
nus. Cum verò pro tuis, aliorumque votis à com-

ã ij

29



EPISTOLA.

pendiosa Astronomia Institutione occæpissim; factum est deinceps, ut conscius Librarius eius exscriptionem variè procurari; efflagitârit, illam à se mandari typis paterer: ac ipse assenserim quidem; sed eo consilio, ut qualiscumque opella huiusmodi foret, illustre tuum Nomen in fronte præferret; quò omnes intelligerent, Te esse, qui ipsi, occasione fuisset.

Hoc ipsum ergo est specimen, quo me obsequium Tibi fidem facio; idque, donec præ iam diuturna inualetudine, interquiesco. Quippe dudum est, ex quo mea illa pectoris intemperies ita cæpit exasperari, ut ad victus moderationem, adhibere etiam, ipsi delinienda, quietem oporteat. Non possum verò interim non suauissimè recordari humanitatis illius tanta, qua sollicitudinem testari de mea valetudine es dignatus, & donec in Vrbe adfuisti, & dum ex ipsa discessurus, cogitantem me patrium solum, commutandi aëris gratiâ, voluisti tecum deducere, si patiens quidem itineris fuissim. Quin-etiam discedens illud adjecisti tue bonitatis argumentum, ut cum Professionem non alia conditione demum subijssem, quàm, ut liceret, quoties liberet, citra jacturam tui erga me amoris, ipsi renuntiare; ne audire me quidem de renuntiatione verba facientem volueris; & quòd causarer interruptionem futuram fortè longiusculam, si ob expositam mox causam, in Prouinciâ concederem,



EPISTOLA.

Verum prolixa nimis inductio, si prosequeretur singula; cum & hic locus exigat, ut recenseam potius eximium, quo semper flagraſti, ingenuarum artium amorem, ac huiusce quidem imprimis, quæ in rerum celeſtium contemplatione ſita eſt, quæque haberi dignior ingenuo homine nulla poteſt. Vix certè unquam ad te accedo, quin hiſce de rebus me aliquid roges; quin exſultes, dum novi quidpiam aut obſervando deprehenſum, aut ratiocinando deductum inaudis. Ex quo ſit, ut Tibi hanc opellam tantò fidentiùs offeram, quantò de ijs rebus eſt, quas Tibi iucundas cognitu perſpexi. Sanè & tametiſi aliud nihil, quàm rudimenta artis contineat; nihilo tamen minùs Tibi futuram eſſe gratam coniicio, quòd ipſe quoque non dedigneris ad hæc interdum deſcendere; quòdque qualiſcumque ea ſit, mea ſit, & non alio edita fine, quàm quo publicè dictatam voluiſti; ut nempe, ſi quid genij habeat, ſortisque adeò ſælicis ſit, prodeſſe quam-plurimis poſſit. Quippe, licet non pauci exſtent hoc de argumento & libri, & commentarij doctiſſimi; non deſunt tamen, qui prætereà informationem quandam requirant, quæ aliquantò accommodatior nondum initiatis, ac rudioribus, neque breuitate obſcura, neque prolixitate importuna ſit: & capita ſcientiæ præcipua non diſcutiat quidem, ſed attingat tamen.

Non is verò propterea ſum, qui ejuſmodi hanc



## EPISTOLA.

esse profitear. Testor solum prouum affectum, quo gratificari discentibus volui; dum, ne aut multitudine, aut caligine rerum obruerentur, in eo fui, ut concisè quidem, sed quàm tamen potui perspicuè, omnia enunciarem. Ecci autem, non modò quod spectat ad Ptolemaicum Systema, vulgarem-ve Hypothesin, cuius tum Sphericam Doctrinam, tum Planetarem Theoriam duobus Libris complexus sum; sed etiam quod spectat ad Systemata, Hypotheses-ve minùs vulgareis tam Copernici, quàm Tychonis, quas singulari Libro exposui; votis eorum facturus satis, qui me impensè de iis rogauerant, expetierantque, ut congererem, ac meo modo dicerem, quæ aut diffusius, aut confusius ab alijs tradi existimarent. Et quidpiam-ne prestiterim, quale ab ipsis fuerat presumptum, ipsi viderint, dixerintque; mihi satis est, si Tibi uni prober, & fuisse ex hac opella agnoscar, ut Tibi obsequentissimus, ita obseruantissimus Tui. Viue, EMINENTISSIME CARDINALIS, magno Ecclesiæ bono, ac VALE. Parisius, Eidib. Iulij M. DC. XLVII.

LIBRO.






# LIBRORVM, ET CAPITVM INDEX.

## LIBER PRIMVS

### *De Doctrina Spherica.*

|            |  |
|------------|--|
| Caput I.   |  Vid Sphæra sit, & ex quibus<br>constet. pag. 7                           |
| Cap. II.   | De vocato Cælesti Globo, quatenus<br>idem cum Sphæra est. 11   |
| Cap. III.  | De repræsentata in medio Sphæræ Ter-<br>ra. 13   |
| Cap. IV.   | De Axe, & Polis, qui dicuntur Mun-<br>di. 16   |
| Cap. V.    | De Circulis Sphæræ, ac primùm de<br>Horizonte. 18  |
| Cap. VI.   | De Meridiano. 20   |
| Cap. VII.  | De Æquatore. 22  |
| Cap. VIII. | De Tropicis. 23  |
| Cap. IX.   | De Polaribus. 25   |
| Cap. X.    | De Coluris. 26   |
| Cap. XI.   | De Zodiaco, & Ecliptica. 27  |
| Cap. XII.  | De signis Zodiaci. 29  |
| Cap. XIII. | De aliis quibusdam in Sphæra intelle-<br>ctu Circulis, vt qui dicuntur Verti-<br>cales, Altitudinis, Distantiæ, Posi-<br>tionis, seu Domorum cælestium. 33 |



# INDEX.

|             |  |    |
|-------------|--|----|
| Cap. XIV.   | De Circulis itidem aliis, vt Declinatiō-<br>nis, ac Latitudinis: vbi & de Ascen-<br>sione, ac Longitudine Siderum. | 37 |
| Cap. XV.    | De triplici positu Sphæræ, Recto, Obli-<br>quo, Parallelo.   | 41 |
| Cap. XVI.   | De Zonis, ac ideò de Ventorum Plagis<br>per parallelos Sphæræ circulos desi-<br>gnatis.                            | 44 |
| Cap. XVII.  | De Climatibus, deque varietate Inco-<br>larum Terræ, propter parallelos.   | 48 |
| Cap. XVIII. | De Crepusculis, quæ ad horizontem<br>in quouis Sphæræ situ visuntur.   | 51 |
| Cap. XIX.   | De Radiorum Sidereorum Refractio-<br>nibus, quæ ad horizontem maximè<br>contingunt.                                | 54 |
| Cap. XX.    | De Ortū, Occasūque Siderum Hori-<br>zontali.   | 56 |
| Cap. XXI.   | De Ortū, Occasūque Siderum Helia-<br>co.   | 59 |
| Cap. XXII.  | De partibus Temporis ( cuius mensura<br>est primus motus reuolutione Sphæ-<br>ræ designatus) ac primum de Die.     | 61 |
| Cap. XXIII. | De Hora.   | 64 |
| Cap. XXIV.  | De Hebdomade.  | 66 |
| Cap. XXV.   | De Mense.  | 68 |
| Cap. XXVI.  | De Anno.   | 71 |
| Cap. XXVII. | De Epochis Temporum.   | 75 |



INDEX.

LIBER SECVNDVS.

*De Doctrina Theorica.*

- Cap. I. **D**E Phænomenis variis, quæ secundorum Mobilium Theoria occasionem fecerunt. 80
- Cap. II. Varia genera hypotheseon saluandis, siue explicandis huiusmodi Phænomenis. 84
- Cap. III. Hypothesis Prolemaïca, seu communis, quæ est per Eccentricos, & Epicyclos. 88
- Cap. IV. De Theoria Solis. 94
- Cap. V. De Theoria Lunæ. 97
- Cap. VI. De Theoria trium Superiorum planetarum, nempe Saturni, Iouis, & Martis. 104
- Cap. VII. De Theoria duorum Inferiorum planetarum, Veneris nempe, & Mercurij. 108
- Cap. VIII. De Theoria Firmamenti, & super-constructi vnus, alterius-ve CrySTALLINI. 111
- Cap. IX. Quare planetæ nunc Majores, nunc Minores appareant. 117
- Cap. X. Quare nunc Veloces, nunc Tardi. 119
- Cap. XI. Quare nunc Directi, nunc Retrogradi, nunc Stationarij. 121

ē ij

62



# INDEX.

|             |   |     |
|-------------|---|-----|
| Cap. XII.   | Quid parallaxis, ob quam planetæ al-<br>tiores, aut humiliores judicantur.                            | 125 |
| Cap. XIII.  | Quæ sit proinde singulorum, & Fixa-<br>rum etiam, à Terris distantia: quif-<br>que adeò Cælorum ordo. | 127 |
| Cap. XIV.   | Quæ item eorundem, & Fixarum fit<br>(sed habitis simul apparentibus dia-<br>metris) vera Magnitudo.   | 131 |
| Cap. XV.    | Qui planetarum Adspectus sint.  | 134 |
| Cap. XVI.   | De variis Lunæ phasibus, pro varietate<br>Adspectuum, Configurationum-<br>ve ipsius cum Sole,         | 137 |
| Cap. XVII.  | De Eclipsi Lunæ.  | 143 |
| Cap. XVIII. | De Eclipsi Solis.   | 150 |

## LIBER TERTIVS.


### *De specialibus Copernici, & Tychonis Systematibus.*

|           |  |     |
|-----------|--|-----|
| Cap. I.   | <b>Q</b> Vos imitatus Copernicus in Sy-<br>stematē confingendo fuerit.                   | 155 |
| Cap. II.  | Quo proinde situ, atque ordine Ter-<br>ram, Sideraque habuerit.                          | 158 |
| Cap. III. | Cuiusmodi triplicem motum Telluri<br>attribuerit.  | 163 |
| Cap. IV.  | Quamobrem de motu, quiete-ve Tel-<br>luris, aut Siderum, fidendum sensui<br>non duxerit. | 167 |
| Cap. V.   | Quæ visæ magis congruæ rationes ad<br>adstruendum motum Telluris Diur-<br>num.           | 169 |



# INDEX.

|                     |  |     |
|---------------------|--|-----|
| Cap. VI.            | Quæ visæ magis congruæ ad asserendum Annum.                          | 173 |
| Cap. VII.           | Quæ visæ demùm magis congruæ ad motum Tertium inducendum.            | 180 |
| Cap. VIII.          | Quid Copernicani ad ea, quæ obijci solent ex Astronomia, respódeant. | 188 |
| Cap. IX.            | Quid ad ea, quæ ex Physica.  | 193 |
| Cap. X.             | Quid ad ea, quæ ex S. Scriptura.                                     | 202 |
| Cap. XI.            | Quid de Siderum à Terris distantia, & magnitudine definiant.         | 205 |
| Cap. XII.           | Quale Mundi Systema sit, quod Tycho Braheus induxit.                 | 209 |
| Cap. XIII.          | Quibus rationibus adductus illud excogitauerit.                      | 212 |
| Cap. XIV.           | Qua ratione id à Tychonis sectatoribus propugnetur.                  | 214 |
| Cap. XV.            | Quæ sit iuxta ipsum Distantia, & Magnitudo Siderum.                  | 219 |
| Oratio Inauguralis. |  | 223 |



## ERRATA.

Pag. 42. in 2. figura lege obliquus. in 3. lege parallelus. Pag. 49. lin. 23. adde fini leli de-. Pag. 67. lin. 2. lege æquicrura. lin. antepen. velint. Pag. 78. lin. 1. Ptolemæus. Pag. 106. lin. 24. vt arcus. Pag. 114. lin. 5. Prætereo. lin. 16. Excentricum. Pag. 137. lin. pen. à nobis. Pag. 144. Supple Luminosam aquale, nescio qua sorte è typo rescissum. Pag. 67. lin. 20. ac ipse. Pag. 178. lin. 22. pro quæ, lege ea. Pag. 226. lin. 5. que. Pag. 239. lin. 26. prescriptarum.

70





## SVMMA PRIVILEGII.



VXTA Priuilegium à Rege Christianissimo  
concessum, cautum est, ne quis toto Re-  
gno imprimat, alibi-ve impressam diuendat  
PETRI GASSENDI *Institutionem Astronomi-*  
*cam*, &c. præter LVD. DE HEVQVEVILLE,  
Bibliopolam Parisiensem, idque in decennium, sub  
solitis pœnis. Datum parisijs 8. April. 1642.

Signatum,

CEBERET.

*Prodiit è Typis, 20. Iul. 1647.*

INSTI-





INSTITVTIONIS  
ASTRONOMICÆ  
PROOEMIALIA.

**Q**UAM Plato Astronomiam, alij  
plurique Veterum etiam Astrolo-  
giam dixere. Ex quo autem Chal-  
dai suas nugas in Doctrinam hanc  
inuexerunt, est ferè Astrologia no-  
men tributum Genethliaca (qua & Indiciaria fe-  
rè appellatur) Astronomia verò nuncupata est,  
quæ in contemplandis, dimetiendisque Astrorum  
motu, distantia, ordine, magnitudine, luce, ad-  
iunctisque cæteris consimilibus occupatur.

Originem ipsi fecit admiratio; tum nimirum  
cùm homines præter splendorem, varietatem, mul-  
titudinem, amplitudinem Siderum, obseruârunt,  
in ipsis motum tam constantem, tam regularem,

A

Discrepancia  
astronomiæ et  
logiæ.

76.

89



*tam incessanter diei, ac noctis, æstatisque, & hyemis vicissitudines inducentem.*

*Commendat illam summopere dignitas subiectæ materie, quæ non alia est, quàm amplissima, nobilissimaque totius Mundi regio; Cælestis nempe, ac Siderea, quam homines ut contemplantur, tum obtinere oculos, tum erectos habere vultus à Sapientioribus dicuntur.*

73. *Certant de eius Inventionem, & Antiquitate Babylonij, ob authorem Belum; Ægyptij, ob Mercurium; Mauri, ob Atlantem, & Herculem; Græci, ob Iouem, Orpheum, & Atreum; Scythæ, ob Prometheus, &c.*

87. *Quorum supersunt Observationes, antiquissimi Babylonij sunt; Nimirum habet Ptolomæus aliquot Eclipseis ab ijs observatas annis paullo plus ante Christum septingentis. Quod de ulterioribus memorant, aut nullo probatur monumento, aut fabulam sapit.*

*Sunt verò Observationes eorum, quæ in Astris apparent (ac Phenomena idcirco vocantur) germana totius Astronomiæ fundamenta: quatenus factis, comparatisque Observationibus plussculis, consinguntur Hypotheses; supponunturve circuli, & orbes, iuxta quos moveri Sidera probabile sit.*



## PROOEMIALIA

ad hoc, ut ea, quæ observantur, qualia observantur, appareant.

Prætereo autem subinde condi quas Tabulas vocant Astronomicas: Abacos nimirum exprimenteis numeris, notisve Arithmeticis ea Tempora, quæ Sidera in absolvendis, iuxta assumptas Hypotheseis, circuituionibus insumunt.

Prætereo & ex Tabulis Ephemeridas, seu Diaria parari, quæ videlicet certis motuum, atque temporum constitutis initijs, exhibeant quibus in Cælo locis Sol, Luna, cæteraque Astra diebus singulis sint, ac inter se configurentur.

Porro cum Astronomia pars sit præcipua Cosmographia, siue delineationis Mundi; sicque nihil possit congruè de Cælo, ac Sideribus dici, aut intelligi, nisi habeatur Systema Mundi generale ob oculos; ideò subjiciendum heic Schema, quo dispositio partium Mundi, qualis vulgò & concipi, & tradi solet, representetur.


In ipso, quem Orbiculum viles intimum, Terra, & Aqua globum refert, succedentes duo circuli Aërem, & Ignem (quæ duo Elementa superiora sunt) representant.

A ij

92



# COELVM EMPYREV IMMOBILE.





Circuli undecim sequentes Calos undecim mobileis exhibent; septem scilicet Planetarum proprios, dictosque Luna, Mercurij, Veneris, Solis, Martis, Saturni: unum Stellarum Inerrantium, quod idcirco Aplanes, & Firmamentum dicitur: duos Crystallinos, ita dictos, quod, cum sint *αἱ ἀστροὶ*, expertes Sideribus, specialiratione pellucidi sint; ac unum denique Supremum, ipsum quoque *αἱ ἀστροὶ*, & Primum Mobile appellatum.

Dico verò Mobileis Calos; quia Theologi duodecimum, ipsumque Immobile statuunt, celum videlicet Empyreum, quod sit Mentium beatarum sedes, & habeatur formæ exterioris quadratæ, quod Ciuitas sancta in Apocalypsi descripta, posita in quadro dicatur.

Numero, ordinique Calorum memoriâ tenendis conferre potest hoc distichon,

Luna, & Mercurius, Venus, & Sol, Mars,  
Ioue, Satur,  
Firmamen, duo Crystalli, Primum, Empyreumque.

Cum in Mobilibus autem Calis duplex generatim obseruetur motus, unus dictus Primus, seu Diurnus, omnium communis; alter Secundus, & aliquorum, aut singulorum proprius; & Prio-



ri explicando excogitata sit, quam Spharam materialem vocant; Posteriori, quam Theoriam Planetarum appellant: heinc efficitur, ut due soleant Astronomiae partes distingui, quarum una Doctrina Spharica, alia Theorica nominetur.

Itaque & nos de utraque compendio dicturi, quoniam opera pretium est rem imprimis cognoscere iuxta receptam vulgò sententiam, quæ Systema Mundi, cuiusmodi est mox antè descriptum, supponit: eapropter id duobus exsequemur Libris; in quorum Primo trademus ea, quæ ad Doctrinam Sphericam, in Secundo ea, quæ ad Theoricam spectant.

Subinde verò, quòd per celebria iam evaserint duo alia Systemata, unum Copernici, alterum Brahei, quorum utrùmque nobileis fautores adipiscitur: ideò Tertium Librum, quasi appendicem aliquam hisce attexemus: ut cognoscere iam liceat, quanam illa sint, & quæ à Sectatoribus defendantur.





7

INSTITVTIONIS  
ASTRONOMICÆ  
LIBER PRIMVS,  
SIVE  
DOCTRINA SPHÆERICA.

---

CAPVT I.

*Quid Sphæra sit, & ex quibus constet.*



VM exordiendum igitur à doctrina Sphærica sit; supponendum est Sphære nomine intelligi heic Instrumentum illud vulgare, & mox (provt repræsentari in plano potest) exhibendum, quod ex varijs circulis, armillisve constans, & axe, cum globulo in medio, trajectum, vsurpari solet tum Machinæ Mundi, tum cælestibus motibus, ac præsertim Primo, seu diurno repræsentandis.

Nam primùm quidem Globulus ille, qui sustentatur in medio, Terram in centro machinæ mundanæ

me



constitutam refert; & trajicientis axis extrema, super quibus fit conuolutio, duos referunt Polos, alterum quidem Boreum, alterum verò Austrinum vocatos, super quibustota Machina cælorum eo voluitur motu, qui spatio horarum 24. peragitur, & vt Latinis dicitur diurnus, ita Græcis *νυκτεμεσπ*, quasi *nocti-dialis*, quòd diei, & noctis spatium complectatur.


Ac non est quidem Sphæra contexta ex tot orbibus, quot antè descripsimus cælos: sed tota tamen cælorum strues intelligi potest ex hac simplici circulorum compagine: quatenus vt ista mouetur super polis Sphæralibus, ita illa tota vnico abreptu mouetur super polis Mundi.

Nimirum tametsi inferiores cæli speciales motus obeant, quibus se in ortum veluti subducant, idque secundum eum circulum, qui mox dicetur Zodiacus: omnes tamen impetu vno à super-existente Primo mobili versus occasum abripiuntur, circūducunturque intra idem tempus, horarum nempe 24. Vnde & fit, vt quæ in ipsis constituta sunt Sidera, dietim oriri, & occidere, seu ire, rediréque appareant; & qui ipsis imprimitur, motus Raptus appellitur.

Supponit interim hic Raptus esse debere omneis cælos non modò perspicuos, sed etiam contiguos, solidos, ac duros; & sidera ipsis hære: vt scilicet simul possint abripi. Quod utcūque verum reipsa non sit; admitti tamen, vt Hypothesis explicandis motibus potest.

Ad circulos Sphære quod spectat, ij distinguuntur numero decem; & ex ipsis sex dicuntur Maiores (siue  
Maximi)





129



Maximi) quatenus eorum quilibet Sphæram in duas parteis æqualeis dispescit; Horizon putà, ac Meridianus, intra quos immobileis reliqui voluuntur; ac prætereà Æquator, Colurique duo, & Zodiacus, seu circulus latior, secundum cuius medium ea ducitur, quæ & appellatur Ecliptica linea.

Quatuor autem dicuntur Minores, quatenus eorum quilibet Sphæram diuidit in duas parteis inæqualeis; duo Tropici nempe, & duo Polares; qui etiam vnà cum Æquatore ideò Paralleli vocantur, quòd à se inuicem vndique æquidistant.

Quod obiter Zodiacum circulum esse latum dixi, supponit esse reliquos indiuisibileis concipiendos: ut cumque in Sphæra tales non habeantur, quòd tales parari, compingique non valeant. Concipiendos autem addo, quatenus illi non oculis, sed mente sola percipiuntur (horizonte tamen excepto) cum eos in cælo requirimus.

Et sunt alij quidem prætereà in cælo intelligendi circuli; sed de illis erit posterius dicendum.

Adnotandum heic, Quemvis circulum diuidi solere in gradus, seu parteis æqualeis 360. & quemlibet gradum subdiuisum intelligi in 60. particulas, quas Prima Minuta, & Minuta etiam simpliciter vocant: ac pari ratione, plarumque quodlibet Minutum primum subdistinctum intelligi in 60. vocata Secunda; quodlibet secundum in 60. Tertia, & ita deinceps, si quid opus fuerit, in Quarta, Quinta, &c.

Quo modo etiam diuiso Die in horas 24. solet Hora subdiuidi in 60. Minuta prima; quodlibet primum in 60. secunda; quodlibet secundum in 60. tertia, &c.



CAPVT II.

*De vocato Cæleſti Globo, quatenus idem cum Sphæra eſt.*

**S**OLENT circuli Sphære memorati repræſentari etiam in eo, qui manibus omnium vulgò teritur, appellaturque Globus Cæleſtis; idemque adeò cum Sphæra eſt, ſi quæ ſunt in Sphæra inania circulorum mobilium interſtitia, oppleta eſſe, contornataque; & illis Stellarum Imaginibus inſignita intelligantur.

Scilicet aliunde ſuperficies Globi repræſentat nobis Firmamenti faciem, proſpectumve Stellarum fixarum, redactarum pridem in certas Figuras, ſeu Imagines, quas ἀστρονομία, ſeu Conſtellationes, & Signa cæleſtia appellant; quaſque, quia Aratus, poſt Eudoxum, deſcripſit, non deſunt, qui Cæleſtem Globum vocitent Arateam Sphæram.

Fuere porrò Conſtellationes à priſcis uſque temporibus diſtinctæ 48. comprehendentes ſtellas in Græcia, totaque orbis terræ cognita tunc parte conſpicuas. Sunt verò ex iis 12. deſcriptæ in Zodiaco: 21. ad Zodiaci Boream: 15. ad Auſtrum eiufdem: exprimiſque ſolent his carminibus.

*Inſunt Signifero his ſex cæleſtia Signa;*

*Suntque Aries, Taurus, Gemini, Cancer, Leo, Virgo, Libra, Scorpius, Arcitenens, Caper, Amphora, Piſces.*

*Ad Boream verò ter ſeptem conſpiciuntur:*

*Ursa Minor, Major, Cuſtos, Draco, Gemma, Genuque Prolapſus, Lyra, Olor, Cepheus, & Caſſiopeia,*

B ij



*Perseus, Andromede, Deliotum, Auriga, Caballus,  
Rictus Equi, Delphin, Telum, heinc Aquila, Anguifer,  
Anguis.*

*Denique conuerſi ter quinque notantur ad Austrum:  
Cetus, & Eridanus, Lepus, & nimboſus Orion,  
Sirius, & Procyon, Argo ratis, Hydraque, Crater,  
Cornus, Centaurus, Lupus, Ara, Coronaque, Piſcis.*

Nuperis autem temporibus, & poſtquam nauigan-  
do in Austrum detectę ſunt Stellę, quę fuerant Priſ-  
cis inconſpicuę, diſtinctę ſunt præterea Conſtellationes  
duodecim, quę hocce diſticho continentur,

*Phœnix, Grus, Indus, Xiphias, Pavo, Anſer, & Hydrus,  
Paſſer, Apus, Triquetrum, Muſca, Chamaque-leon.*

Prætereo verò quaſdam minores Conſtellationes  
designatas in maioribus illis fuiſſe, vti Pleiadas, &  
Hyadas in Tauro: Pręſepe, & Aſellos in Cancro: Ca-  
pellam, ac Hædos in Auriga, &c.

Prætereo etiam aliquas ſtellas in ipſarum Conſtel-  
lationum interſitiis quaſi relictas, ideò Informeis  
appellari, quòd extra Formas, Imaginesve, ad quas  
ceterę attinent, viſantur.

Prætereo demùm, cùm forent pridem Stellę potif-  
ſimùm conſpicuę numeratę mille, & viginti due:  
fuiſſe earum præcipuas dictas Magnitudinis eſſe Pri-  
mæ, quales ſunt Sirius (dictus Canis major, & Cani-  
cula) itemque Lyra, Capella, Arcturus, & aliæ: non-  
nihil minores, Secundæ, quales ſunt, Polaris vocata in  
extrema cauda Vrfę minoris: & quę in Vrfã maiore  
appellantur Septentriones: non-nihil adhuc minores,  
Tertiæ: & rursus Quartæ, Quintæ, Sextæ, adiunctis



etiam aliquibus, quas & Nebulosas, & Obscuras dixerunt.

An adnotabo Nebulosas, vt vocatum Præsepe Canceri, deprehensas esse telescopio, opticove tubo, nihil esse aliud, quàm aggeries aliquas minutissimarum stellarum, quarum coniunctæ luculæ speciem alboris, ac veluti nubeculæ cuiusdam creent?

XB.

An, deprehensum quoque esse, Lactæum circulum in Globo descriptum, & veteribus habitum pro undecimo, (ipsoque, Zodiaci instar, lato) circulo, nihil esse aliud, quàm texturam quandam eiusmodi nubecularum, seu ineffabilem stellarum minutissimarum congeriem, qualem iampridem Democritus apud Plutarchum coniecerat?

XB.

CAP. III.

*De representata in medio Sphæra Terra.*

**I**AM, cum globulus, qui in medio Sphæra, representare Terram sit dictus; ideò sciendum imprimis est, esse Terram formæ Globosæ: neque enim montes vallesque ipsius rotunditati magis officiunt (spectata nimirum ambitus amplitudine) quàm malo arantio granulositas cutis.

Et probant quidem Physici hanc rotunditatem ex coitione omnium partium, quæ ex æquo in centrum nitantur; Sed Astronomi eam conuincunt, ex eo, quòd tendētibus in Boream, Austrumve, aliæ, aliæq; cæli partes heinc retegantur, inde occultentur, & Polus conspicuus euadat heinc elatior, inde depressior;

*rotunditas Terræ probat.*

B. iiij



quódque prout quisque est magis ad Orientem, aut Occidentem, astra videat citius, tardiusve oriri, & occidere; atque adeò, dum Luna, v. c. patitur Eclipsin, qui est orientalis, plureis horas à meridie, aut media nocte numeret; qui occidentalis, pauciores.

*na et terra vnu  
vnu efficiunt*

Est verò nomine Globi Terræ comprehendenda simul Aqua; quatenus Aquæ, & Terræ partes versus idem centrum conspirant, & maris superficies sic cum Terrestri continuatur, vt eadem, quæ dicta mox sunt, nauigantibus in Boream, Austrumve, & rursus ad ortum, occasumve positus contingant; ac vel illud probat non esse maris superficiem planam, quòd à portu soluentibus Terra sensim sic occultetur (à gibbo maris videlicet) vt nulla denique appareat. Ne memorem vmbra, quæ in disco Lunæ Eclipsin patientis à Terræ, & Maris superficie creatur, esse perinde circularem.

*na centrum mundi.*

Deinde, esse Terram in centro Mundi (atque ideo centrum ipsius cum centro Mundi idem esse) probari à Physicis, ex recessu omnium grauium à Mundi superficie, confluxuque in eius centrum, à quo recedere Ascendere fit; & in quo proinde Terra quasi suis ponderibus librata teneatur. Probari verò ab Astronomis, ex eo, quòd alioquin non appareret Mundus in duo Hemisphæria diuisus; & amplius idcirco, aut minus, quàm sex signa Zodiaci supra Terram conspicerentur; quodque Eclipses Lunæ non contingerent in oppositione cum Sole ex diametro facta (Terra scilicet non intercipiente) aliæque similia.

*na et terra vnu  
vnu efficiunt*



Ad-hæc, licet Terra ambitu suo contineat leucas mediocreis ( seu qualium vna ex Italicis tribus milliaribus conficitur ) octies mille, & proximè octingentas: esse eam tamen, ad Firmamentum dum comparatur, quasi punctum; idque probari, quatenus, vbi cūq; oculus in Terra sit, dimidium cæli conspiciat, & vnde cūq; Stellaras aspiciat, eas neque maiores, neque minores deprehendit. Quin-etiam dici posse punctum ad cælum Solis comparatam; prout videmus vmbras Solis circa instrumentorum, & horologiorum centra non minùs regulariter, quàm circa Terræ centrum moueri; planè, vt si inter Terræ superficiem, & centrum nihil interesset.

Denique Terram in medio Mundi constitutam quiescere, ex eo probari solere, quòd neque moueatur motu recto, quia exiret ex ipso centro, sicque ascenderet, quòd grauitati eius repugnat: neque circulari; quia id non potest, neque circa proprium, neque circa alienum axem. Nam si moueretur quidem circa proprium axem versus ortum, existentia in aère omnia, vt nubes, & volucres apparerent ferri in occasum; nihilque præterea secundum perpendicularum caderet; secus ac fieri obseruatur. Si circa alienum, variaretur nobis in Terræ superficie quiescentibus Poli altitudo; quod nusquam contingit.

*Terra punctus  
firmamenti.*

*Stabilitas terræ  
probat; Coper*



## CAP. IV.

*De Axe, & Polis, qui dicuntur Mundi.*

**H**ISCE præmissis de Globulo Terram, & Aquam repræsentante, dicendum quidpiam videretur de Interstitio, quod inter illum, compaginemque circularum est, quasi referente Aërem, & Ignem: Verùm quia seu Aër nihil aliud est, quàm textura halituum, corpusculorumve ex terra, & aqua prodeuntium, & vix ad paucorum miliarium altitudinem assurgentium; seu non exstat sub Luna Ignis ille, cuius crassitudo sit leucarum plusquàm septuaginta millium; sed ab aëre vsque crasso, terrenoque, succedens est ad Lunam vsque purissimus æther, aura-ve, vt iam dicunt, ætherea; idcirco necesse non est, vt quidpiam heic de Aëre, Igne-ve illo, comminiscamur.

Adnotandum est potius circa Axem, quo Globulus ille in medio huiusce interstitij sustentatur; non sustentari quidem similiter Terram Axe villo visibili, qui ad ipsum cælum terminetur; sed intelligi tamen lineam indiuiduam per ipsius, ac Mundi centrum transeuntem, quæ heinc inde producta ad vsque Primum mobile, in ea duo puncta desinat, quæ appellant Polos, seu Cardines Mundi; adeò proinde, vt Poli Mundi nihil aliud sint, quàm extrema Axis.

Diximus iam horum Polorum vnum esse Boreum, seu Septentrionalem, alium Austrinum, seu Meridionalem: Ille autem solet præterea dici Arcticus à vici-

niâ



nā Vrsæ geminæ, quæ Græcis ἀρκτος (quippe & iam diximus ab eius vicinia reciproçè dici Polarem eam Stellam, quæ in caudæ Vrsæ minoris extremo est sita, ac ab ipso distat, hocce tempore, duos gradus cū tribus quintis) iste verò Antarcticus, quòd sit Arctico è regione.

Appellantur autem Poli, seu Cardines Mundi, quòd præcipua pars Mūdi, cælorum nempe Machina, super ipsis diētim vertatur (πολεῖν enim vertere est) & cōuersionē integram ab ortu in occasum perficiat. Notum est fuisse quoque Polos Vertices latinè à vertendo dictos; ac Poëtam propterea ita expressisse conspicuum nobis Arcticum, & Antarcticum inconspicuum.

*Hic Vertex nobis semper sublimis; at illum*

*Sub pedibus Styx atra vider, Manesque profundi.*

Quin-etiam Poli Mundi dicuntur (ac etiam Primi Mobilis) vt distinguantur à Zodiaci Polis, super quibus scilicet sunt conuersiones propriæ Secundorum Mobilium, siue cælorum inferiorum (æque tendendo ab occasu in ortum obliquè) imprimis autem ipsius Solis, qui quòd continenter incedat per lineam dictam Eclipticam, idcirco Poli Eclipticæ & præcipui sunt, & frequentius nominantur.

Heinc Mundi quoque Axis vocatur, qui terminatur ad Polos Mundi, & circa quem verti tota cælorum Machina diurno illo motu intelligatur; cū Axis Zodiaci ille sit, qui etiam per terram traijci intellectus, ad inferiores cælos terminatur, & circa quē fieri concipimus propriam cuiusque conuersionem. Vnde & solent in quibusdā Sphæris concludi tum cir-

C



culi, tum portiones axium, quibus cæli, & axes, Solis, ac Lunæ potissimum, representari quoadatenus possint.

Tametsi verò quilibet Axis per mediam trajectus terram concipiatur; quia nullus est tamen præter Mundanum fixus, idcirco hic solus, qua parte ex terra heinc inde quasi egreditur, duo in terra designat puncta, quæ quòd directè subjiciantur cælestibus Polis, dicuntur ipsa quoque Poli (ipsius terræ videlicet) & alter quidem similiter Arcticus, seu Boreus; alter Antarcticus, seu Austrinus.

## CAP. V.

## De Horizonte.

**A**D Circulos quod attinet, ille Horizon dicitur, qui in Sphæra extremus est, & cæteros ambit.

Repræsentat verò in Mundo illum circulum, qui dum in planitie versamur, oculosq; circumducimus, apparet nobis quasi quædam cæli, terræque commissura; ac idcirco Græcè *ὁρίων*, & Latine *Finis*, *Finitorque* dicitur, quòd quicquid videmus ex terra, desinat; & partem etiam cæli visam à non visa dirimat; duoque Hemisphæria, quæ vocant Superius, Inferiusque distinguat.

Is est, supra quem emergentia Astra oriri dicuntur, infra quem labentia dicuntur occidere.

Quamvis autem Horizon respectu cuiusque specialis terræ loci immobilis sit; vniuersè tamen concipiendus mutabilis est, quatenus dum locum in terra mutamus, etiam Horizontem mutamus.




Potest verò Sphæræ Horizon hanc varietatem re-  
præsentare, quatenus tamen non moueatur ipse cir-  
ca Sphæram reliquam; mobilis est tamen reliqua  
Sphæra intra ipsum; ac nihil interest, vtrius sit mo-  
tus, vt eadem creari mutatio appareat.

Creatur porrò ista mutatio ob conuexitatem su-  
perficiei terræ, ac illius speciatim portionis, quam cir-  
cūspicimus; Quippe etiam quæ libellata est, licet plana  
esse ad sensum appareat; est tamen reipsâ leniter deue-  
xa; atque idcirco, dum mouemur, aliquid ipsius ex  
vna parte deperditur, aliquid ex opposita refarcitur.

Quod dico verò superficiem Terræ etiam libella-  
tam non esse planam, sed deuexam, intelligitur vel  
ex ipso mari, quod sponte se ad libellam componens,  
componit se simul in orbicularem figuram: vtcū-  
que illa in paruo spatio plana, siue recta ad sensum  
videatur; ac ea propter vsurpari soleat ad libellandum,  
probandum vè num quæpiam area plana sit.


Ex hoc obiter intelligitur, nulla duo perpendicu-  
la esse reipsâ parallela; atque  
idcirco neque duos etiam vici-  
nos parietes ad perpendicu-  
lum erectos parallelos esse, vt-  
cūque esse ad sensum appa-  
reant; quatenus cū omnia  
perpendiculara in superficiem  
conuexam cadant, cōitura in  
centro sunt, si producta intel-  
ligantur; vt perspicuè vel ex  
figura apposita intelligi licet.





Quod heic attingendum de Recto, Obliquo, Párallelo Horizonte foret, peragetur postea commodius.

Adnotandum heic solùm, distingui à quibusdam Horizontem duplicem, Sensibilem, ac Rationalem. Et Sensibilem quidem esse eum, qui hactenus descriptus est, quatenus planities apparet; Rationalem verò eum, qui appareret, si terrâ bisectâ, & altero dimidio euanido facto, è centro circumspiceretur.



Intelligi vtrumque licet ex Figura apposita, in qua circulo interiore referente Terram, exteriori Cælum, linea per centrum transiens repræsentat Rationalem, & quæ superficiem contingit, Sensibilem. Ambæ autem parallelæ in cælum vsque producuntur; vt intelligamus acceptum in cælo tantum interuallum, quanta semidiameter terræ est, habitum iri quasi punctum (lineis putà coïre visis, ob immensam distantiam) sicque stellam in eodem loco visum iri, siue ex terræ superficie, siue ex eius centro videatur.

## CAPVT VI.

### De Meridiano.

**A**LIVS in Sphæra circulus, intra quem immotum ceteri mouentur, Meridianus est: Is nem-



pe qui & Horizontem ad rectos secat angulos, & axis extrema, seu Polos sustentat.

Repræsentat autem in Mundo illum circulum, quem transire concipimus per polos Mundi, perque duo puncta, quorum vnum vertici imminens Verticale dicitur, & voce Arabica frequenter Zenith; alterum ipsi sub pedibus oppositum appellatur Nadir; ne memorem hæc duo puncta quasi Horizontis polos reputari.

Is diuidens Mundum in duo Hemisphæria, quorum alterum Orientale, alterum Occidentale sit, ideò Meridianus vocatur, quòd quoties Sol ad ipsum emergit, Meridies creetur; distans nempe tunc æquis interuallis ab ortus, & occasus punctis; vt proinde quantum ab ortu transactum fuerit temporis, tantum transigendum ad occasum restet.

Prætereo autem vt pars Meridiani superior diurnum tempus in duas æqualeis parteis diuidit; ita inferiorem in duas æqualeis nocturnum secare.

Quòd sit porro in Sphæra Meridianus immotus, repræsentat quidem specialis cuiusque loci Meridianum, qui ipse quoque est inuariatus; verùm quia quoties seu in ortum, seu in occasum deflectimus, sub nouis, nouisque Meridianis sumus; idcirco plureis, ac varios Meridianos non repræsentat, nisi quatenus Sphære reliquæ emotione fit instar plurium.

In ortum verò, seu occasum dico; nam si quis directè in Boream, Austrum-ve iter fecerit; erit illi semper idem Meridianus.

Notum est proinde, cur iis, qui sub eodem sunt

C iij



**P.** Meridiano, Meridies contingat eodem tempore; cum  
ijs qui sunt sub orientaliore, contingat maturius; ijs,  
qui sub magis occiduo, tardiùs; quòd Sol nimirum  
illis priùs, istis posteriùs Meridianum attingat.

Notandum autem, cum Sidera ad Meridianum  
vsque ascendant, & ex eo deinceps descendant: ideò,  
& maximam cuiusque altitudinem dici meridianam;  
& punctum illud Meridiani; per quod transit, dici  
Medium cæli, respectu ipsius; vti & Imum dicitur,  
quod illi è regione oppositum sub terra est.

**P.** Notandum etiam Eleuationem, siue Altitudinem  
Poli in vnaquaque regione nihil esse aliud, quàm me-  
ridiani arcum, qui inter Horizontem, Polumque cla-  
rum intercipitur, cuiusque complementum ad vsque  
Zenith, siue ad quadrantem circuli, est semper æqua-  
le altitudini Æquatoris.

Sic nimirum, cum in hac vrbe Parisina, exempli  
causâ, Altitudo Poli sit 48. graduum, & 50. minuto-  
rum; illius complementum, siue altitudo Æquato-  
ris 41. graduum, & minutorum 10. erit.

## CAPVT VII.

### *De Æquatore.*

**P**ORRÔ Æquator; circulorum in Sphæra Mo-  
bilium præcipuus, is est, qui ab vtroque Mundi  
Polo æquis vndique distat interuallis.

Quare & repræsentat in cælo illum circulum,  
quem concipimus ab vtroque polo ex æquo distare,



ac Mundum in duo Hemisphæria, alterum Boreale, alterum Australe partiri.

Dicitur verò etiam Æquinoctialis ( dicunt Græci, potius *ισμπεριον*, siue Æquidiale ) quòd Sol bis in anno, hoc est sub diem 20. Martij, & 23. Septembris eum secans ( nempe quà principia Signorum Arietis, & Libræ sunt ) duo creet Æquinoctia, exæquet-ve nocteis diebus, ob æqualem moram supra, infraque horizontem; quatenus sectus ab horizonte Æquator in duas abit parteis, alteram superiorem, alteram inferiorem, constanter æqualeis.

Vides obiter, nomine Diei heic intel'igi moram Solis supra horizontem; nomine Noctis moram infra: nempe quòd vocant tam matutinum, quàm vespertinum Crepusculum, computari in noctem solet.

Reticendum autem non est, esse Æquatorem præcipuam Temporis mensuram, quatenus ipse præcipuè est, penes quem primi Mobilis reuolutio attenditur: Adeò vt, si integra, seu 360. graduum ( cum addita particula, de qua infra ) reuolutio sit, duratio sit vnius diei ( sumpto iam nempe die alio sensu ) Sin partis solum vigesimæ-quartæ, siue graduum 15. duratio sit vnius horæ; atque ita de cæteris.

## CAPVT VIII.

### De Tropicis.

**E**X quatuor circulis Æquatori parallelis, duo, qui heinc inde in Sphæra propiores sunt, Tropici sunt.



Repraesentant illi in cælo duos circulos à Sole descriptos; vnum cùm accessit maximè ad Boream; alterum, cùm discessit maximè ad Austrum; vnde & propter τροπὰς *conuersiones*, dicuntur τροπικοὶ, quasi *Conuersorij*, quòd Sol, vbi ab Æquatore ad ipsos vsque promotus est, non progrediatur vltèrius, sed redeat versus Æquatorem.

Et circulus quidem, qui ad Boream, dicitur vulgò Tropicus Cancrì, quòd Cancrì Signum in eo incipiat; qui verò ad Austrum, Tropicus Capricorni, quòd ab eo incipiat Signum Capricorni.

Dicitur ille præterea circulus Æstatis, quòd Sole in ipso versante Æstas incipiat; iste circulus Hyemis, quòd Sole in ipso existente incipiat Hyems: intellige respectu nostri, qui ad Boream degimus.

Quin-etiam ille vocari solet circulus Solstitij alti, quòd Sole ipsum occupante, summèque, nostri respectu, alto, creetur Solstitium diei maximi: hic circulus Solstitij imi, quòd constituto in illo Sole, & nobis quidem summè depresso, diei minimi Solstitium creetur.

Notum verò est Solstitium vocatum, quòd die (hoc est mora Solis supra horizontem) neque crescente, neque decrescente sensibiliter, Sol stare, hoc est, neque in Boream, Austrumve procedere; neque versus Æquatorem recedere sensibiliter, per aliquot dies videatur.

Distantia autem Tropici vtriusque ab Æquatore est graduum 23. minutor. 31. tantumdem enim, & non amplius, potest Sol ab Æquatore recedere, declinareve; vnde



ve; unde & eadem dicitur maxima Solis Declinatio.

Et quia eadem met distantia est mensura Obliquitatis, qua Zodiacus, Eclipticæ lineæ sese habet ad Æquatorem; heinc fit, ut etiam Obliquitas Zodiaci, seu Eclipticæ 23. graduum, & 31. minutorum esse dicatur.

## CAPV T IX.

*De Polaribus.*

**C**ÆTERI duo Paralleli, qui heinc inde ab Æquatore remotiores sunt, Polares idcirco dicuntur (ac alter quidem Boreus, Arcticusque; alter Austrinus, & Antarcticus) quod vicini sint ipsis Polis.

Repræsentant autem in cælo duos Circulos, quos utrimque à Polo vicino tantumdem distare, quantum Tropicos ab Æquatore concepimus, hoc est gradibus 23. & minutis 31.

Id nempe, quia Zodiacus ad Æquatorem obliquus ita attingit Tropicos, ut ipsius Poli tantum necessario à Polis Æquatoris distent, quantum Tropici ipsi ab Æquatore; & aliunde concepimus circulos Polares à polis Zodiaci circa Polos Æquatoris, seu Mundi describi: atque ita quidem iuxta recentiores.

Iuxta Veteres, circuli Polares (seu, ut illis solùm appellabantur, Arcticus, & Antarcticus) paralleli quidem Æquatori erant; verùm cum possent paralleli innumeri intelligi inter æquatorem, & utrumque polorum ducti; alij quidem semper apparentes circa polum eleuatum; alij semper occulti circa polum de-

D



pressum; ceteri vna sui parte apparentes, alia occulti ob horizontis interceptionem; ideò circulorum Polarium, alter habebatur maximus semper apparentium, alter maximus semper occultorum: varijque adeò pro varietate altitudinis Poli erant, tanquam altera parte sui præter-radentes horizontem.

Hac ratione Parisius circuli Polares, hoc est tam maximus semper apparentium circa polum Boreum, quam maximus semper occultorum circa polum Austrinum, distarent à suo vterque polo 48. gradibus, & 50. minutis.

## CAPVT X.

*De Coluris.*

**S**EQVNTVR Coluri, seu duo maiores ex mobilibus Sphæræ circulis, qui se inuicem ad angulos rectos in polis Mundi interfecantes, mobileis alios interfecant, & in quaternas partes æquales distinguunt.

Repræsentant verò in cælo duos circulos, quos concipimus pari modo sese, & alios interfecare; ac ideò putantur *καλοῦροι*, quasi *muti* appellati, quòd nunquam neque integrè, neque vniuniformiter supra horizontem (intellige obliquum, seu in Sphæra obliqua, de qua dicetur postea) appareant.

Alter porrò Æquinoctiorum, alter Solstitiorum Colurus vocatur, quòd prior per puncta æquinoctialia transeat, principia nimirum Arietis, ac Libræ: &



posterior per solstitialia, principia nimirum Cancrī,  
& Capricorni.

Designant verò Coluri in Zodiaco quatuor appella-  
ta puncta Cardinalia, Principium nempe Arietis, in  
quo dum Sol est, nox diei æquatur, & Ver incipit:  
Principium Cancrī, in quo dum est Sol, maximus est  
dies, & incipit Æstas: Principium Libræ, in quo dum  
est Sol, æquatur iterum nox diei, & Autumnus inci-  
pit: Principium Capricorni, in quo dum est Sol, dies  
est minimus, & incipit Hyems. Hūc spectant vulga-  
ta illa carmina,

*Hæc duo Solstitium faciunt, Cancer, Capricornus;*

*Sed nocteis æquant Aries, & Libra diebus.*

Notandum autem illud proprium Coluri Solsti-  
tiorum esse, vt Zodiaci Poli in eo designentur; scili-  
cet ad duo opposita puncta, in quibus Polareis secant  
circulos, quæque vndique à Zodiaco æqualiter di-  
stant.

## CAPVT XI.

### *De Zodiaco, & Eclipticâ.*

**Z**ODIACVS demum est latus ille, & mobili-  
bus cæteris superductus circulus, qui Tropicos  
hinc inde attingens, & Æquatorem obliquè secans,  
duodecim Figuris notatur, ac mediâ in longum in-  
terstinguitur lineâ, quæ Ecliptica dicitur; Spharam-  
que in Boream, Austrinamque parteis discernit.

Repræsentat autem in cælo parem circulum, latum  
scilicet, obliquumque, & pari modo sese habentem.

D ij



ad Æquatorem, & Tropicos; ac similiter interstin-  
ctum lineâ vocatâ Eclipticâ, insignitumque 12. Aste-  
rismis: & distinguentem similiter cælum in duo He-  
misphæria, alterum Boreale, alterum Australe.

Dicitur verò Zodiacus, quòd huiusmodi Asteris-  
mi *ἡ Ζωδιακὸν Ἀνimalium* formis majori ex parte pin-  
gantur; vti & quòd tales Asterismi Signa dicantur,  
appellatur Signifer; cùm & à situs obliquitate non  
rarò vocetur circulus Obliquus.

Cæterùm latus decernitur, quòd cùm Planetæ per  
eum moueantur, non omnes eandem teneant viam,  
sed Sole quidem incedente medio, per lineam putâ  
Eclipticam, cæteri obliquos ad hanc lineam cursus in-  
stituant, & ob vias ab ipsa duobus in locis oppositis  
intersectas, nunc in Boream, nunc in Austrum defle-  
ctant; isti quidem plus, illi autem minus; ac ideò sit  
congruum isti circulo tribuere latitudinem, quæ de-  
flexiones has complectatur; existenteis putâ heinc  
inde sex, septem, octo, plus, minùs graduum.

Sed de motibus quidem Planetarum dicendum  
erit expressiùs in succedente Theorica parte; heic,  
propter illa, quæ dicenda supersunt circa Sphæricam,  
anticipandum est aliquid necessariò de Motu Solis.

Itaque, cùm Sol abreptus à Mobili primo circui-  
tum dietim ab ortu in occasum perficiat; ipse tamen  
interea proprio, lentòque motu regreditur, tenditque  
in ortum ( & oblique quidem, secundum Zodiaci duc-  
tum ) eo modo, quo nauta à naui abreptus incedere  
contrario motu, à prora nempe in puppim, potest.

Lentum dico: siquidem Sol non-nisi vnum pro-



ximè gradum hocce suo motu intra vnum diem, seu horas 24. conficit; neque circuitum integrum, nisi intra annum absoluit. Vnde & sicut potest Formica, dum à rota abripitur, & centies, pluriesque integrè circumagitur, potest, inquam, ipsa interim opposito motu incedens vnam integram circuitiōnem peragere: ita Sol abreptus à Mobili primo, trecenties sexagies, & quinquies circumagitur in occasum, dum interim ipse semel proprio motu versus ortum reuoluitur.

Hic porrò est motus, quo per medium Zodiaci describitur circulus, seu Orbita Solis, quam idcirco vocant Eclipticam lineam, quòd Luna ipsam pertransiens, dum Soli coniungitur, aut opponitur, sui, Solisve Eclipsin pariat; vt dicendum inferiùs est.

## CAPVT XII.

### *De Signis Zodiaci.*

**D**ICTVM est iam antè Zodiaci Signa esse numero duodecim; En verò quibus repræsentari characteribus soleant. Aries  $\gamma$ , Taurus  $\beta$ , Gemini  $\pi$ , Cancer  $\csc$ , Leo  $\varpi$ , Virgo  $\mho$ , Libra  $\sim$ , Scorpius  $\mho$ , Sagittarius  $\rightarrow$ , Capricornus  $\times$ , Aquarius  $\equiv$ , Pisces  $\chi$ .

Mos est, vt vnicuique Signo attribuantur 30. gradus (tamen si ipsi Asterismi inæquales inter se sint, seu alij breuiores, alij prolixiores) totidem enim gradus prodeunt, vbi 360. diuiduntur per 12.

Initium autem ducitur ab Ariete, hoc est à sectio-

D iij



ne verni Aequinoctij, prope quam Arietis Asterismus fuit, cum ante bis mille annos circiter, excoli in Graecia Astronomi accipit.

Tametsi enim hic Asterismus ob lentum Firmamenti motum, de quo dicitur postea, exinde iam recesserit, & totus penè transierit in locum, in quo erat Asterismus Tauri; ipsi tamen 30. primi gradus retinent semper nomen Arietis, vti & sequentes 30. nomen Tauri, licet pariter Asterismus Tauri locum Geminorum occupauerit; & ita de alijs.

Ex hoc autem fit, vt distinctionis gratia hi terdeni gradus non Asterismi quidem, sed Signa tamen Arietis, Tauri, Geminorum, &c. vocentur; & dicantur praeterea Dodecatemoria, quod sint duodenae Zodiaci partes.

Dicitur verò Sol, aut alius Planeta, esse in aliquo Signo, cum est sub ipso, seu cum inter oculum nostrum ac tale Signum intercipitur; Stellæ autem fixæ, quæ extra Zodiacum sunt, esse in eo Signo, seu potius referri ad id Signum dicuntur, inter quod, & proximum Zodiaci Polum, contingit ipsas intercipi.

Ex his Signis, γ, δ, ιι, ε, ζ, η, dicuntur Borealia; α, μ, θ, κ, π, χ Australia: At verò κ, π, χ, γ, δ, ιι Ascendentia; ε, ζ, η, α, μ, θ, Descendentia.

Rursus γ, δ, ιι, dicuntur Verna; ε, ζ, η, Αστια; α, μ, θ, Autumnalia; κ, π, χ, Hyemalia.

Prima autem quæque horum ternionum γ, ε, α, γ, dicuntur Cardinalia, quod Sole in eas ingrediente anni Tempestates, Quadrantesq; incipiant; itemque Mobilia, quod tunc fiat qualitarum mutatio: Media



verò  $\gamma$ ,  $\delta$ ,  $\eta$  dicuntur Immobiles, quòd tunc tempestates quasi fixæ sunt; Extrema  $\pi$ ,  $\nu$ ,  $\rho$ ,  $\chi$ . Communia, comparatè scilicet ad Mobilia, & Immobiles; itemque Bicorporea, quòd  $\pi$ , &  $\chi$  duplicia manifestò sint;  $\rho$  ex equo, & homine constet;  $\nu$  Spicam manu gestet.

Sunt & varia præterea denominationes Signis attributæ, maximèque ab Astrologis; nam (cætera inter) accipiendo illa ab  $\gamma$ , tribus quibusque intermissis,  $\gamma$ ,  $\delta$ ,  $\eta$  dicuntur Signa Ignea, Calida, Cholericæ;  $\gamma$ ,  $\nu$ ,  $\rho$  Terreæ, Sicca, Melancholia;  $\pi$ ,  $\mu$ ,  $\omega$  Aërea, Humida, Sanguinea;  $\omega$ ,  $\mu$ ,  $\chi$  Aquea, Frigida, Phlegmatica; ac dicuntur adeò  $\gamma$ ,  $\delta$ ,  $\eta$  constituere Trigonum Igneum;  $\gamma$ ,  $\nu$ ,  $\rho$  Terreum;  $\pi$ ,  $\mu$ ,  $\omega$  Aëreum;  $\omega$ ,  $\nu$ ,  $\chi$  Aqueum.

Sic alia dicunt Masculina, alia Fœminina; alia Humana, alia Bruta; alia Fœcunda, alia Sterilia; alia Pulcra, alia Deformia; alia Diurna, alia Nocturna; alia Planetarum Domos, alia Exsilia; alia eorundem Exaltationes, alia Casus; & alia id genus complura, quæ attingere nihil est necesse.

Adnotare præstat Solem ingredi mense quolibet in speciale Signum, vt putà Martio in  $\gamma$ , Aprili in  $\gamma$ , Maio in  $\pi$  atque ita porrò, quovsq; Februario ingreditur in  $\chi$ .

Vt noscatur autem, quo circiter die hic ingressus fiat mense quolibet, notari carmina hæc possunt.

*Liuvor mente latens insultat honoribus, horret*

*Grandia gesta, horrens insigni laude notatos.*

Nimirum, si has 12. dictiones in 12. mensibus sic tri-



buas, vt prima Martio, secunda Aprili, tertia Maio, ceteræ ceteris ex ordine respondeant; & attendens quota in Alphabeto sit prima cuiusque litera, totidem ex 30. vnitates detrahas, numerus residuus indicabit diem ingressus in Signum.

Exempli enim causâ, quia Martio dictio *Livor* respondet; & prima eius litera L in alphabeto decima est; subtrahe 10. ex 30. & remanentia 20. indicabunt Solem ingredi in Signum  $\gamma$  die 20. mensis Martij. Ac pari ratione litera M vocis secundæ respondentis Aprili, monstrabit 11. ex 30. detractis, Solem ingredi in  $\delta$  die Aprilis 19. Et non secus litera N vocis vltimæ respondentis Februario, suggeret, detractis 12. ex 30, Solem in  $\chi$  ingredi die Februarij 18. atque ita de ceteris.

Si quærat autem in quo proximè Zodiaci gradu sit Sol quolibet mensis cuiusque die; nihil aliud oportet, quàm addere ad propositum diem numerum literæ designatum.

Nam si numerus quidem prodiens excedat 30. excessus (vnitate addita) indicabit gradum Signi, in quod illo mense ingreditur Sol; Sin verò deficiat, ipsemet indicabit gradum eius Signi, in quod fuerit ingressus Sol à mense vsque antecedente.

Exempli causâ, si quærat ubi sit Sol die Septembris 28. ad 28. adde 7. ob literam G vocis *Grandia*, respondentis Septembri, in Alphabeto septimam; prodibunt 35. detrahe 30. & excessus 5. cum vnitate, hoc est 6. indicabit Solem versari in gradu 6.  $\sim$ , in quam illo mense ingreditur Sol. Et, si quærat ubi sit Sol



fit Sol die eiusdem mensis 12: Ad 12. adde iterum 7. confurgent 19. & hic numerus indicabit versari Solem in 19. gradu  $\pi$ , in quam ingressus fuerit à mense usque superiore.

CAPVT XIII.

*De alijs quibusdam in Sphæra intellectis circulis, vt qui dicuntur  
Verticales, Altitudinis, Distantiæ, Positionis, seu  
Domorum caelestium.*

**P**RÆTER circulos hætenus descriptos, intelligi possunt in Sphæra, aut cælesti globo (atque adeo etiam in cælo) alij circuli, quorum crebra est apud Astronomos mentio; adeo proinde, vt non sint aliqui præcipui ex ijs reticendi.

Verticales itaque circuli dicuntur, qui per Zenith, seu verticale punctum, & per Nadir ipsi oppositum transeunt; rectaque proinde horizontem secant. Solent autem hi circuli Arabica voce Azimutha dici.


Cùm huiusmodi verò circuli secare horizontem innumerari possint, ex quo à Meridiano (qui pro vno verticalium habetur) in ortum, occasumve disceditur; Primarius tamen Verticalis habetur is, qui transit per intersectiones Horizontis, & Æquatoris.

Altitudinis circuli ij sunt, qui supra horizontem ac ipsi horizonti paralleli sumuntur; sensimque decrescunt, seu semper minores, minoresque sunt, quo usque desinant in verticis punctum. Vocari autem & ipsi solent Arabica voce Almicantarath.

E



Mos est utrosque hos circulos in ipsis, ut vocant, Astrolabijs, Planisphærijsve repræsentari: cum & possint intelligi ex subiecto heic schemate Sphæra dimidium (pro ut in plano perspicui potest) repræsentante. Scilicet AB, est Horizon; C, Zenith; D, Nadir; CADB, Meridianus: Cæteri circuli à Zenith in Nadir per denos horizontis gradus ducti, ipsi Verticales; ac in illis CED, Verticalis primarius: at FG, HI, & alij ad horizontem paralleli, & per denos gradus meridiani ducti, circuli sunt Altitudinis.



Distantiæ Circuli appellantur, qui ex maioribus cum sint, transeunt per duo Sidera, quorum proinde



mutua distantia nihil aliud est, quàm interceptus inter ipsa arcus alicuius huiusmodi circularum.

Talem in schemate præmissio possumus intelligere circulum magnum KL, transeuntem per M, stellam Pollucis, & N, Spicam Virginis. Arcus nimirum MN, qui 90. graduum, cum dodrante est, ipsa est stellarum istarum distantia.

Positionis, siue Domorum cælestium circulos appellant tam Horizontem, ac Meridianum, quàm alios quatuor circulos, qui se inuicem, & cum ipsis, ad communeis eorundem meridiani, ac horizontis sectiones interfecant; & sex cum sint, vt totam Sphæram, sic vniuersum cælum distribuunt in duodecim parteis, quas Domos cælesteis appellant, quarumque sex infra, sex supra horizontem sunt.

Prima autem habetur, quæ est proximè infra horizontem ad ortum, diciturque & Horoscopus, & domus Vitæ; Succedens inferiùs dicitur domus Diuitiarum; Tertia consequens domus Fratrum; Quarta in imo cæli domus Parentum; cæteræque ex ordine, prout hisce duobus carminibus indigitantur,

*Vita, Lucrum, Fratres, Genitor, Natiue, Valetud',  
Vxor, Mors, Pietas, & Munia, Amici, Inimici.*


Notandum autem hos Positionis, siue Domorum circulos diuidere in parteis æqualeis, iuxta aliquos quidem, Æquatorem; iuxta alios, Zodiacum; iuxta alios, Verticalem primarium.

Intelligere rem licebit ex appposito schemate; in quo hemisphærium orientale repræsentante, AB, est Horizon; CADB, Meridianus; AEB, AFB, AGB,

E ij



AHB, Positionum circuli; IK, vel *Æquator*, vel  
*Ecliptica*; CD, Verticalis primarius; designatus au-  
 tem domorum ordo, infra horizontem quidem, I.  
 II. III. supra verò X. XI. XII. cùm & residuarum  
 numerum, ac seriem oporteat intelligere in hemis-  
 phærio occidentali.



Prætereo placere quibusdam, Positionum circulos  
 se interfecare non quâ dictum est, sed in polis Mundis;  
 quo casu rejecto horizôte, ad Meridianum  
 quintus. Quibusdam in polis Zodiaci; quo casu re-  
 jecto etiam Meridiano, adhibetur sextus: vt domus  
 semper sint duodecim.



CAPVT XIV.

*De Circulis itidem alijs, vt Declinationis, ac Latitudinis:  
vbi et de Ascensione, ac Longitudine Siderum.*

**P**RÆCIPVE verò cognitu necessarij sunt, qui circuli Declinationis, & Latitudinis appellantur.

Et Declinationis quidem circuli ij sunt, qui per polos Mundi ducti, secant Æquatorem ad angulos rectos. Cùm enim Siderum Declinatio computetur ab Æquatore, tendendo in polum mundi alterutrum; perspicuum est Declinationem cuiusque Sideris, alteriusve cæli puncti, nihil esse aliud, quàm cuiusque horum circulorum arcum, qui inter Æquatorem, & tale Sidus, aliudve punctum intercipitur.

Constat autem Declinationem esse proinde duplicem; aliam Borealem, aliam Australem; prout scilicet id punctum, aut Sidus, ad Boream, Austrumve Æquatoris est.

Sic in subjuncto schemate; cùm AB sit Æquator; C polus Mundi Boreus, D Austrinus; CADB colurus Solstitiorum, CED Colurus Æquinoctiorum; erunt tam ipsi Coluri, quàm Circuli CFD, CGD, CHD, CID Declinationum circuli; ac Stellæ K Declinatio (& Borea quidem) erit arcus HK; Stellæ L, Declinatio (& Australis quidem) arcus IL. Parique modo punctorum Solstitialium M, & N, Declinatio erit, Borea quidem BM, austrina verò AN.

E iij







arcus EB, cum toto reliquo hemisphærio ad vsque A; dodrans scilicet, seu gradus 270.

Dicitur autem Ascensio Recta; quoniam ubi est horizon obliquus, Ascensio quoque Obliqua est; neque illud idem Æquatoris punctum, cum designato cæli puncto, Sidereve oritur ampliùs; sed aliquod aliud prius, aut posterius. Ex quo efficitur, vt Æquatoris arcus hisce duobus punctis interceptus Ascensionalis differentia vocetur.

Sic in hac Vrbe, exempli gratiâ, differentia Ascensionalis Initiorum  $\infty$  &  $\times$  est 30. graduum; & quia Initium  $\infty$  posterius, Initium  $\times$  prius, quàm punctum Ascensionis rectæ oritur; fit, vt Ascensio obliqua Initij  $\infty$  sit Parisiis 120. graduum; & Initij  $\times$  240; quod idem proportionem intelligendum in Stellis est.

Latitudinis circuli ij sunt, qui per Polos Zodiaci, seu Eclipticæ ducti Eclipticam secant ad angulos rectos. Cum enim Siderum Latitudo ab Ecliptica computetur, perspicuum est Latitudinem nihil esse aliud, quàm cuiusque horum circulorum arcum, qui inter Eclipticam, & designatum Sidus (aliud-ve cæli punctum) intercipitur.

Constat verò similiter Latitudinem esse duplicem, aliam Boream, aliam Austrinam, prout Sidus ad Boream, Austrumve Eclipticæ est.

Sic in præmisso schemate, cum NM fit Ecliptica; O polus Eclipticæ Boreus, P Austrinus; ONPM idem Solstitiorum Colurus; Erunt tam ipse Colurus, quàm punctati circuli OQP, ORP, OSP, OTP,



O V P. Latitudinis circuli; ac Stellæ K Latitudo ( & Borea quidem) erit arcus V K; Stellæ L Latitudo) & Australis quidem) arcus T L.

Notandum autem copulari heic quoque cum Latitudine Longitudinem; Ita enim appellant Eclipticæ arcum, qui ab initio  $\gamma$ , ad punctum vsque, quo circulus Latitudinis Eclipticam secat, intercipitur.

Sic Longitudo Stellæ K, erit arcus Eclipticæ S V: Stellæ L, arcus S T. Ac pari modo Solis existentis in principio  $\varpi$ , Longitudo erit arcus S M; quadrans scilicet, seu gradus 90; existentis in principio  $\pi$ , idem arcus, cum toto hemisphærio residuo, ad vsque N; dodrans scilicet, seu gradus 270.

Prætereo porrò perspicuum esse, Quod Sidus est in Æquatore, carere omni Declinatione; & quod est in Ecliptica, carere omni Latitudine: ac præterea, tam Declinationem, quam Latitudinem non posse excedere gradus 90, siue quadrantem circuli; quòd utrâque terminetur heinc inde ad oppositos polos; cum tamen tam Ascensio recta, quam Longitudo excurrant ad vsque 360: videlicet secundum totum tam Æquatoris, quam Eclipticæ ductum, quovsque discessione facta ab initio  $\gamma$ , ad idem redeatur.

Prætereo item facile caueri æquivocationem, quam Geographi voces Longitudinis, Latitudinisque usurpant; quippe aduertendum solummodò est, dum ipsi quoque in Terra Æquatorem, & Meridianos, seu circulos transeuntes per polos designant, Longitudinem ab ijs dici, quam heic Ascensionem rectam dicimus; Latitudinem, quam Declinationem.

CA



CAPVT XV.

*De triplici positu Sphæræ, Recto, Obliquo,  
Parallelo.*

**E**XPOSITIS hæcenus Sphæræ circulis, sequitur paucis attingamus (quod iam semel, ac iterum circa Horizontem insinuauimus) cuiusmodi sint positus, iuxta quos Sphæra Recta, Obliqua, Parallela statuitur; ac potest idem proportionem intelligi in ipso Mundo.

Itaque Recta dicitur Sphæra, in qua utroque polo horisonti insistente, Sidera oriuntur, & occidunt recta; siue ascendunt, descenduntque, factis angulis ad horizontem rectis; vnde & in tali situ Horizon Rectus dicitur.


Obliqua, in qua altero polorum supra horizontem elato, altero infra depresso, Sidera oriuntur, occiduntque oblique; siue ascendunt, descenduntque factis angulis ad horizontem obliquis; vnde & in tali situ Horizon dicitur Obliquus.

Parallela, in qua altero polorum constituto ad Zenith, altero ad Nadir, Sidera neque oriuntur, neque occidunt; seu neque ascendunt, neque descendunt; sed mouentur motu ad horizontem parallelo; vnde & in tali situ Horizon Parallelus vocatur.

Potest triplex situs sic representari.

**F**





In Sphæra Recta, omnia astra oriuntur, & occidunt. In Obliqua, aliqua oriuntur, & occidunt; aliqua nunquam oriuntur, sed sub horizonte semper delitescunt; aliqua nunquam occidunt, sed perpetuò sunt supra horizontem. In Parallela, vt iam dictum, nulla neque oriuntur, neque occidunt; sed pars semper supra, pars semper infra horizontem sunt: nisi quòd Æquatore coeunte in eundem cum Horizonte circulum, & dimidio Zodiaci semper elato, dimidio semper depresso, ea, quæ percurrunt Zodiacum di-



midio decursus cōspicua, dimidio inconspicua fiunt.

In Recta sunt Sphæra, qui directè sub Æquatore habitant; in Parallela, qui directè sub polis; in Obliqua, qui degunt in locis inter Æquatorem, & alterutrum polum intermedijs.

In Recta perpetuum æquinoctium est, seu tam dies, quàm nox est semper 12. horarum; quòd Sol ubicumque in Zodiaco sit, tantum temporis supra, quantum infra horizontem moretur; vt potè omnibus eius circuitibus (siue parallelis quasi circulis) ab horizonte constanter bisectis.

In Parallela dies perseuerat totos sex menses continuos; & nox etiam continuos sex: quòd Sol, vt supra Æquatorem, ita & supra horizontem totos sex menses maneat (idque dum per treis gyando ascendit, & per treis descendit) ac infra consimiliter.

In Obliqua, inæqualitas est dierum, & noctium; quòd ab vsque Æquatore versus polum eleuatum, arcus diurni Solaris motus (ij nempe qui sunt supra horizontem) sint semicirculo maiores; & nocturni versus depressum, minores. Atque ita quidem, vt citra (v. c.) Æquatorem, maximus dies, qui contingit Sole exsistente in principio ☊, euadat sensim, tendendo nos versum, horarum 13. 14. 15, sitque heic Parisiis 16. ac porrò pergat fieri 17, 18, &c. quousque degentibus sub Polari circulo (vbi ipse Tropicus ☊ est apparentium maximus, horizontemque adeò stringit) sit horarum 24. Cum & exinde procedendo morâ Solis supra horizontem plurium, pluriumque dierum euadat, & fiat etiam mensis vnus, & duorum, & trium,

F ij



& quatuor, & quinque, & sub polo denique sex. Quod eodem proportionē modo concipiendum est circa noctem, existente Sole ultra Æquatorem.

Vbi illud est consideratu dignum, nullum esse in terra locum, cui intra annum integrum non sit ut diurnum, sic nocturnum tempus sex mensium: quatenus in Sphæra quidem Parallela, utrumque tempus est continens; in Recta, diem per alternas vices æqualeis distribuitur; in Obliqua, prolixitas dierum, & breuitas noctium per æstatem, compensatur cum breuitate dierum, & prolixitate noctium per hyemem. Et quot per æstatem sunt continentes ultra Polarem dies, tot per hyemem sunt continentes noctes.

## CAPVT XVI.

*De Zonis, ac ideò de Ventorum Plagis per Parallelos Sphæra circulos designatis.*

**H**ISCE cohærens est, ut dicamus de Zonis, seu ingentibus quasi fascijs, quas per descriptos Sphæra circulos Parallelos descriptas antiquissimum est in cælo agnoscere, iuxta illud Virgilij,

*Quinque tenent cælum Zonæ, quarum vna corusco  
Semper Sole rubens, &c.*

Fuere autem semper quinque habitæ; vna scilicet media, appellata Torrida, inter duos Tropicos contenta: duæ extremæ, Frigidæ vocatæ, ac inter Polares, vicinosque Polos comprehensæ: duæ heinc inde Temperatæ dictæ, & Tropicos inter, Polareisque



interiectæ. Ac Polybius quidem Torridam in duas, Æquatore medio, distinxit; verum sectatoribus caruit.

Notandum verò, cùm ab usque Thalete, Temperatæ, & Frigidæ separarentur per Polareis, quales sunt superiùs descripti, iuxta Veteres: primum memorari Posidonium, qui separârit per Polareis, quales in Sphæris iam habentur; sicque eas fecerit constantes, cùm priùs, prout varia erat Poli altitudo, aut dilatarentur, aut contraherentur.


Cùm ipse porrò Terræ globus cælo subiaceat undique; idcirco sunt eadem Zonæ ipsi Terræ attributæ, iuxta illud Ouidij,

*Vtque dux dextra cælum, totidemque sinistra  
Parte secant Zone, quinta est ardentior illis:  
Sic Onus inclusum, &c.*

Quin etiam Zonæ Terrenæ sunt, quibus propriè competit, ut Torrida, ac Frigidæ, Temperatæque nominentur: cùm & terrestris Torrida sit, quæ credita olim inhabitabilis fuit ob nimium feruorem, ex radiis Solis ad perpendicularum immixtis creatum; & Frigidæ similiter ob algorem nimium, ex obliquè nimium appellentibus radiis. Tamen si fuere non ita pridem tam in Torrida, quàm in Frigidis (sed in Torrida maxime) numerosissimi incolæ reperti.

Quomodo autem terrestres Zonæ respondeant ipsis cælestibus; videtur non incommode intelligi ex sequente Figura.





Cæterum, si quem internorem circulum repræsen-  
tare Terram vides, quasi Horizontem cuiuslibet re-  
gionis habeas; & præter punctum B, quo interseca-  
tur à Meridiano ad Boream, & punctum A, quo ad  
Anstrum, adnotes decem alia puncta, quinque vide-  
licet ad ortum, & quinque ad occasum, vt putà CD,  
EF, GH, IK, LM, quibus interfecatur ab Æquino-  
ctiali, Tropici, & Polaribus: ac tum ex his duode-  
cim punctis flare concipias totidem ventos versus



Punctum N, horizonis vmbilicum, ipsiusve spectato-  
ris locum; intelligere exinde licebit quomodo An-  
tiqui plagas cæli determinârint, ex quibus venti ad-  
uentarent ( nisi quod puncta designata à circulis Po-  
laribus fuere primitus propter causam iam declara-  
tam inconstantia. )

Nimirum à puncto B, flantem dixere *Απαρκίαν*, *Sep-  
tentrionem*: à puncto A, *Νότον*, *Austrum*: à puncto C,  
*Απυλιότιν*, *Subsolanum*: à puncto D, *Ζέφυρον*, *Fauonium*: à  
puncto E, *Βορέαν*, *Καινίαν*, *Aquilonem*: à puncto F, *Αγρίην*,  
*Σκίρατα*, *Ολυμπίαν*, *Ελλησποντίαν*, *Caurum*, seu *Corum*: à puncto  
G, *Εὐρον*, *Vulturnum*: à puncto H, *Λίβα*, *Africum*: à pun-  
cto I, *Μέσσην*, quibusdam *Boream*, quibusdam *Aquilo-  
nem*, quibusdam *Cæciam*: à puncto K, *Θεσσαλίαν*, aliqui-  
bus *Corum*: à puncto L, *Φοινικίαν*, *Ευρόνοπν*, aliquibus *Vul-  
turnum*: à puncto M, *Λιβόνον*, *Altanum*.

Prætereo autem, vt recentiores, ac Nautæ præsertim,  
distinguere soliti ventos numero 32. (horizonte nem-  
pe in parteis 32. æqualeis diuiso) non alia curent ex  
his punctis, quàm quatuor Cardinalia B, A, C, D,  
nominando Ventos, qui ab ipsis flant, in mari qui-  
dem Mediterraneo, *Tramontana*, *Ostro*, *Leuante*, *Po-  
nente*: in Oceano verò, *Nord*, *Sud*, *Est*, *Ouest*: & flanteis  
à punctis inter ipsa mediis, in Mediterraneo quidem,  
*Greco*, *Maestro*, *Sirocco*, *Garbino* (alias *Lebeccio*) in Ocea-  
no verò, *Nord-est*, *Nord-ouest*, *Sud-est*, *Sud-ouest*: ac flā-  
teis rursus à punctis intermediis, compositis vocibus,  
*Tramontana-Greco*, *Tramontana-Maestro*, &c. *Nord-  
nord-est*, *Nord-nord-ouest*, &c. incipiendo semper ab iis,  
qui flant à punctis Cardinalibus: flanteis denique à



punctis iterum intermediis, per quadranteis octantium, hoc modo, *Quarta di Tramontana-Greco, Quarta di Tramontana-maestro; Quarta di Greco-tramontana, &c. Nord-gen-esten, Nord-gen-ouesten, Nord-est-gen-norden, &c.* incipiendo semper ab iis, qui flant ab octo primariis punctis.

## CAPV'T XVII.

*De Climatibus, deque varietate Incolarum Terrarum, propter Parallelos.*

**C**VM Zonarum porrò distinctio antiquis non sufficeret, ut varietatem situs regionum citra Aequatorem notarent; idcirco adhibendos esse plures parallelos censuerunt, quibus quaedam veluti Zonae minores subdistinguerentur, eaque vocatae Climata, quasi dicas Inclinationes, siue deflexiones à Sphaera rectae situ.

Cum vnumquodque autem Clima ita limitarentur duobus parallelis, initio ab Aequatore ducto, ut in remotiore ab Aequatore maximus anni dies esset horarum dimidio, quam in breuiore, prolixior: non habuere tamen rationem primi Climatis, in altero cuius extremo maximus dies esset horarum 12. cum semisse: quasi illud foret prorsus inhabitabile: verum habuere quasi primum illum, in cuius altero extremo dies maximus foret tredecim horarum; quasi ille Torrida Zona propius accedens ad Temperatam, habitari inciperet.

Non fuerunt verò soliti distinguere plura Climata, quam



quàm septem, quòd ea abundè regiones omneis tum notas comprehenderent; indigitârunt autem illa nuncupationibus locorum quorundam celebrium, quæ in singulis comprehendebantur; appellâruntque adeò ipsa, *Διὰ Μερών, Διὰ Συήνης, &c.* hoc est, quasi transeuntia per Meroen, per Syenem, per Alexandriam, per Rhodum, per Romam, per Pontum, per Borysthenem.

At recentiores, ob Terram iam longè, latèque cognitam, distinguunt illa 24. ob 24. horarum semisseis, seu 12. horas, quibus dies maximus increfcit ab usque *Æquatore*, ad usque *circulum Polarem*, in quo *Climata* desinunt, die maximo excedente modum.

Prætereo autem vnumquodque *Clima* ita distinguere solitum, interducto alio parallelo, in duas parteis, siue *Zonas* adhuc minores, vt in alterius cuiusque extremis discrimen diei maximæ sit vnius quadrantis horæ. Taleis porrò *Zonulas*, siue semisseis *Climatum*, nuncupauere (speciali vocis usurpatione) *Parallos*; quos proinde constar distinguere iam posse 48.

Hac ratione, cum in hac Vrbe, v. c. dies maximus sit horarum 16. patet quorsum dici possit constituta vrbs in fine octauæ *Climatis*: ac simul in fine *Parallici sexti*.

Quamquam non designant iam amplius *Astronomi* loca, per *Climata*, & *Parallos*; sed per *polareis Eleuationes*; aut etiam (*Geographorum* more) per ipsas locorum *Latitudines*, distantias-ve ab *Æquatore*.

Addendum verò, si *Parallos* quotlibet distinctos

G



in Sphæra concipias, tum concipi quemadmodum singuli Incolarum terræ suos habeant, quos dicunt *Περίοικους*, quasi dicas *Circumcolas*; *Ἀντίκους*, quasi *Aduersicolas*; & *Ἀντίποδας*, quasi *opposita habentis vestigia*; seu *Ἀντίχθονας*, quasi *Incolas oppositæ terræ*; nisi quod degentes directè sub polis (quòd in parallelo nullo sint) Antipodas solum, seu Antichthonas habent.

Nam alioquin Pericæci quidem inuicem dicuntur, qui sub eodem sunt parallelo; sed speciatim tamen, qui ad parteis meridiani oppositas, hoc est in diuersis à polo ad polum semissibus. Antæci, qui sub parallelis, cis, ac vltra æquatorem æquè distitis; sed ad eandem partem meridiani acceptis. Antipodes, Antichthonesve, qui sub æquidistantibus quidem vtrimque ab æquatore, sed ad parteis tamen meridiani oppositas sitis.

Notum verò est pro hac situs incolarum diuersitate, eam varietatem dierum, noctiumque, & tempestatum contingere, vt Pericæcis quidem sint diuersis temporibus dies, & nox; sed iisdem æstas, ac hyems: Antæcis verò dies, & nox iisdem; sed æstas, ac hyems diuersis: Antipodibus denique diuersis omninò tam dies, & nox, quàm æstas, & hyems.

Addendum quoq; Incolas Parallelorum omnium intra tropicos cõtentorū appellari solitos *Ἀκροταίους*, quasi *vtramq; vmbra habentis* (meridianam videlicet) quatenus Sole existente ad Boream, vmbra habent versam ad Austrum; & existente ad Austrum, habent versam ad Boream. Incolas verò à Tropiciis inclusivè ad vsque polareis, *ἑτεροταίους*, quasi *habentis alteram*



*solum umbram* ( vt nos habemus ad Boream ) huc-que  
adeò spectare, quod habet Lucanus de Arabibus intra  
Torridam degentibus, & ad Temperatam appulsis,

*Ignotum vobis, Arabes, venistis in orbem,*

*Umbras mirati nemorum non ire sinistras.*

Incolas demùm à polaribus ad-vsque Polos inclu-  
siuè, *Περικλίου*; quasi, Sole non occidente, *umbram ha-*  
*bentis circum-actam* per omneis plagas horizontis. Di-  
co Sole non occidente; quoniam cùm, exceptis iis,  
qui sub polis sunt, Sol interdum cæteris & oriatur, &  
occidat; ij possunt illo tempore in Heteroscijs ha-  
beri.

CAPVT XVIII.

*De Crepusculis, quæ ad horizontem in quouis  
Sphæra situ visuntur.*

**Q**UONIAM Primi mobilis motus, qui circum-  
ductione Sphære declaratur, Siderum ortum,  
& occasum, prout ad horizontem refertur, inducit  
ideò de ortu, occasuque consequenter dicturis, præ-  
mittendum est aliquid de Crepusculis, & Refractio-  
nibus ad Horizontem obseruatis.

Imprimis verò Crepusculum nihil est aliud, quàm  
crepera illa, seu quasi dubia, vel media lux, quæ tam  
ante Solis exortum in regione orientis apparet, ac  
Aurora speciatim vocatur; quàm post Solis occasum  
in regione occidentis, & Crepusculi nomen retinet.

Causa illius est Atmosphæra, seu regio vaporum,  
quæ Terra quasi circumvestitur; Ea quippe produ-

G. ij



Etior, quàm extremum terræ conspicuum, tum citius manè recipit, tum ferius vespere amittit degentis infra horizontem Solis radios, ac illos reflectens ad nos, præstat, vt lucida videatur.

Nempe, si nulli essent vapores, sed purissimus solum aër; nihil planè lucis, siue ante exortum, siue post occasum Solem cerneremus; verum transitus fieret ex tenebris meris ad diurnam lucem; ex diurna luce ad tenebras meras.

Obseruandum est autem, initium matutini, & finem vespertini Crepusculi tum contingere, cum Sol est infra horizontem octodecim plus minùs gradibus, secundum verticalem circulum, perpendiculariterve acceptis. Et quia quantò minùs Sol ab horizonte abest, tantò ampliùs ex Atmosphæra supra horizontem exstante illustrat; ideò tantò quoque fit crepusculum clarius.

Prætereo deductum heinc fuisse, Altitudinem Atmosphære supra terram esse 40. circiter Italicorum milliarium: tametsi videtur esse longè minor; Quoniam prima illa, vltimaque lux esse non directè à Sole, sed per reflexionem ex partibus eiusdem Atmosphære inferioribus factam, potest.

Ad noto potius Crepusculum ideò in Sphæra recta breuissimùm esse, quòd in quocumque parallelo sit Sol, Ascensus, descensusque eius perpendicularis sit; & gradus illi octodecim vt in verticali, sic in parallelo proximè absumantur.

In Sphæra autem obliqua, esse Crepusculum prolixius, quòd arcus paralleli inter punctum orituri, oc-



casive Solis in vno verticali, & punctum gradus decimi-octavi in alio verticali, interceptus, obliquè se habeat, sitque adeò octodecim gradibus prolixior. Vnde & quia per æstatem prolixior, quàm per hyemem est; fit, vt crepusculum æstiuum prolixius, quàm hyemale sit; & in hac Vrbe, exempli gratiâ, cum per hyemem non accedat ad horas duas, accedat tamen per æstatem proximè ad quatuor.

Quin-etiam obseruari potest, continuari in hac Vrbe vespertinum crepusculum cum matutino per dies octo ante, & totidem post æstiuum Solstitium; sicque ne in media quidem nocte crepusculum deficere, quòd tunc non demergatur Sol totis gradibus 18. infra horizontem, sed in ipso quidem Solstitio deficient minuta 20.

Nihil autem est opus admonere Crepusculum iri continuatum per dies tantò plureis, & euasurum etiam in media nocte tantò clarius, quantò Sphæra fuerit obliquior; quòd Sol sit tantò propiùs ab horizonte abfuturus, quovsq; supra horizontem circuitum perficiens (sub Polari nempe circulo, & vltra) diem vt continentem, ita sine vlllo crepusculo creet.

Prætermittendum porrò non est, obliquitatem horizontis, & parallelorum inæqualitatem causam fieri, vt cum maximum Crepusculum per æstiuum Solstitium sit longissimum, non sit tamen breuissimum per Solstitium hibernum; sed in hac quidem Vrbe breuissimum sit sub diem primum Martij, & sub duodecimum Octobris.

In Sphæra demùm Parallela esse continuum Cre-

G iij



pusculum per dies proximè 52. quòd Sol aut descen-  
dens non citiùs, aut ascendens non tardiùs ab hori-  
zonte absit 18. gradibus secundum verticalem acce-  
ptis.

## CAPVT XIX.

*De Radiorum Sidereorum Refractionibus, quæ ad horizontem  
maximè contingunt.*

**A**D Refractiones quod attinet; cùm notum  
sit radios transeunteis obliquè ex medio rario-  
re in densius, refringi, & versus eum radium, qui  
perpendicularis habetur, deflecti (veluti ex opposito  
transeuntes ex densiore in rarius refringuntur, & ab-  
eunt ab eodem perpendiculari) Eapropter & Solis,  
& cæterorum Siderum radij, dum ex purissimo athe-  
re in iam memoratam Atmosphæram incidunt obli-  
què, ac transitori per ipsam sunt, refringuntur ver-  
sus perpendicularem, seu versus illum radium, qui  
dirigitur ex Sole versus centrum terræ, quod idem  
cum centro Atmosphæræ est.

Et quia tendentes versum nos radij sunt tum ma-  
ximè versus perpendicularem obliqui, cùm Sidus est  
in horizonte; idcirco tum fit maxima refractionis; eâ-  
que euadit, in Stellis quidem minorum 30. in Sole  
autem, & Luna 33. aut 34. ac deprehenditur tantò  
minor, quantò Sidus euectius est; adeò vt Stella vl-  
tra vigesimum, Sol, & Luna ultra 35. aut 38. gradum  
altitudinis, sensibilem nullam refractionem patian-  
tur.



Ex illa porrò horizontali refractione efficitur, vt Sol, v. c. in horizonte constitutus, & per radium refractum visus, appareat nobis 34. aut proxime minutis altior, quàm reuerâ sit, & quàm appareret, si sublati vaporibus, directo radio conspiceretur; & cùm ipsius diameter dimidij gradus, seu minutorum 30. sit, ideò possit videri totus, cùm est tamen totus reuerâ infra horizontem.

Id perinde fit, ac dum posito in fundo peluis calculo, caput ita firmas, vt labium peluis obstat, ne calculum videas, quem sis tamen aquâ infusâ visurus, calculo licet, oculoque immotis: Nimirum, qui radius directus desinebat prius in frontem, ita refringitur transeundo ex aqua in aërem, vt allabatur oculo, calculumque ipsi visibilem faciat.

Ex hac interim causa est, cur interdum Luna Eclipsin patiente propter terram ipsi, Solique interpositam, vtrumque tamen Luminare supra horizontem exstans obseruetur; Scilicet vtrumque est reuerâ infra; licet propter radios refractos super-exstare appareat.

Ex eâdem etiam, cur in Noua Zembla post noctem continuam duorum mensium, ac semissis, Hollandi Solem recuperârint aliquot diebus maturius, quàm meritò expectaretur; Atmosphæra videlicet speciem illius euehente.

Prætereo autem obliquitatem, qua species Solis in Atmosphæram respectu nostri allabatur, causam esse, quamobrem Sol horizonti vicinus, non præcise orbicularis, sed ellipticus, ouatave specie appareat;



perpendiculararem nempe diametrum transversâ contractionem habens.

## CAPVT XX.

### *De Ortus, Occasusque Siderum Horizontali.*

**V**T iam de Ortus, Occasusque Siderum aliquid dicamus; is distingui solet vniuersè duplex, Astronomicus, & Poëticus. Non quòd istum quoque Astronomi non curent; sed quòd Poëtæ ipsum, reliquo neglecto, potissimùm vsurpent.

Et Astronomicus quidem Ortus, Occasusque, cùm nihil aliud sit, quàm recta, obliquave Ascensio, & Descensio penes Æquatorem spectata; ideò cùm iam dictum de recta, obliquaque Ascensione sit: non est, quorsum heic nos quicquam moretur.

Poëticus autem attenditur, vel penes Horizontem, supra quem emergunt, aut infra quem demerguntur Sidera; vel penes Solem, à cuius radijs reliqua Sidera aut liberantur, aut occultantur.

Qui porrò penes Horizontem attenditur, distinguitur duplex: alter scilicet Cosmicus, alter Acronychus vocatur.

Cosmicus, seu quasi Mundanus tam ortus, quàm occasus est, qui spectatur propriè circa ipsum tempus exorientis Solis (nempe quasi tunc Mundus, seu Naturæ facies instauretur.) Nam si quod Astrum oritur, quo tempore oritur Sol; id dicunt Cosmicè oriri. Et si rursus quo tempore Sol oritur (hoc enim inculco,



inculco, ut caueatur confusio) aliquod Astrum occidit; illud Cosmicè occidere dicunt.

Cosmico ortu intelligitur oriri Taurus Mense Aprili, quo Soli in ipso existenti cooritur, iuxta illud Virgilij,

*Candidus auratis aperit cùm cornibus annum*

*Taurus, —*

Cosmico occasu intelliguntur occidere Pleiades per ipsum Autumnum, cùm oriente Sole vnà cum Scorpione, in quo est, ipsæ in Tauro sitæ horizontem ex aduerso subeunt, iuxta illud eiusdem,

*Antè tibi Eoæ Atlantides abscondantur,*

*Debita quàm sulcis committas semina. —*

Dico autem propriè: quoniam volunt etiam Cosmicè oriri, & occidere (tamen si minùs propriè) quod Astrum oritur, occiditve interdium, seu donec Sol est supra horizontem.

Acronychus autem tam ortus, quàm occasus est, qui spectatur propriè circa ipsum tempus occidentis Solis, seu initij noctis; vnde factum nomen (deprauatè nempe Chronicum appellant.) Nam, si quod Astrum vnà cum Sole occidentè occidit, occasus est Acronychus; &, si quod iterum occidentè Sole (hoc enim etiam heic inculco) ex aduerso oritur, Acronychus habetur ortus.

Acronycho ortu intelliguntur oriri per Autumnum Pleiades, coorientes scilicet Tauro, in quo ut dictum est, sunt sitæ, donec Sol in Scorpione degens ex aduerso occidit, iuxta illud Ouidij,

H



*Vt careo vobis, Scythicas detrusus in oras,*

*Quatuor Autumnos Pleiās orta facit.*

Quo loco vides obiter, eundem Autumnum exprimi, à Virgilio quidem per occasum, ab Ouidio verò per ortum earundem Pleiadam. Sed videlicet prout ille occasum Cosmicum intelligit; Pleiades enim per illud tempus manè occidunt: iste ortum Acronychum; eadem enim tunc vespere oriuntur.

Acronychi occasus rariora sunt exempla; nam quòd volunt quidem Sagittarium intelligi occasu hoc occidere, cum Lucanus expressurus crepusculum, proximè æstiuum Solstitium, ait,

*Nam Sol Ladea tenebat*

*Sidera, vicino cùm lux altissima Cancro est,*

*Nox tum Tbessalicas vrgebat parua Sagittas;*

constat non posse Sagittarium occidere tunc, nisi Cosmicè, oriente putà Sole cum Geminis; ac fortiri dumtaxat posse occasum Acronychum, dum Sol est in ipso, ac vnà cum eo occidit.

Dico verò etiam heic propriè; nam minùs propriè appellant etiam Acronychum ortum, & occasum illum, qui per noctem fit, seu Sole versante infra horizontem.

Nota proinde posse tam ortum, quàm occasum Cosmicum appellari Matutinum; & tam ortum, quàm occasum Acronychum, dici Vespertinum.



CAPVT XXI.

*De Ortu, Occasusque Siderum Heliaco.*

**Q**VI penes Solem attenditur reliquorum Siderum Ortus, & Occasus, is ab ipso Sole, qui Græcis est  $\text{ἡλιος}$ , Heliacus vocitari solet.

Occidere porrò Heliacè illud Astrum dicitur, quod, cum prius manè, vespereve conspiceretur, ob sui à Sole infra horizontem versante distantiam, conspici deinceps posse desinit, ob Solis viciniam, ipsiusque Astri immersionem in Solareis radios; ut pote quorum splendore quicquid circumquaque est, obducitur, & ut sic dicam, euanescit.

Oriri verò illud, quod cum prius foret, ob Solis viciniam, eiusque radios, inconspicuum, conspici deinceps manè, vespereve posse incipit, ob factam à Sole distantiam, emersionemque ex eius splendore.

Causa autem, eür aliqua Sidera occidant manè, & orientur vespere, est, quod suo per Zodiacum, seu in ortum motu velociora sint, quam Sol; sicque eum manè assequantur, & vespere deferant.

Huiusmodi verò est Luna, quam constat suo in ortum motu & manè subire, & vespere exire ex radiis Solis.

Causa cur aliqua occidant vespere, & orientur manè, est, quod Sol suo motu per Zodiacum sit ipsis velocior, sicque ipsa suo splendore assequatur vespere, & deferat manè.

Huiusmodi verò sunt tam Stellæ Fixæ, quam tres

H ij



superiores Planetæ, Saturnus, Iupiter, & Mars. Celebrant autem Poëtæ præsertim occasum, ortumque Fixarum; Sic innuit Ovidius occasum Delphini, dum Sol Capricornum percurrit, illo disticho,

*Quem modò calatū stellis Delphina videbas,*

*Is fugiet visus nocte sequente tuos.*

Sic Virgilius occasum Canis (supple maioris, quem Caniculam quoque, & Sirium, appellari iam diximus) dum Sol versatur sub finem Tauri, illis versibus,

*Candidus auratis aperit cū cornibus annum*

*Taurus, & aduerso cedens Canis occidit Astro.*

Vti & occasum Heliacum Coronæ Septentrionalis, dum Cosmicus est Pleiadum, cuius iam meminimus, illis,

*Antè tibi Eoæ Atlantides abscondantur,*

*Gnosique ardentis decedat Stella Corona,*

*Debita quàm sulcis, &c.*

Sic innuit Ovidius Aquarij ortum, dum Sol est Pisceis subiturus, illo disticho.

*Iam lenis obliqua subsedit Aquarius urna;*

*Proximus ætherios excipe Piscis equos.*

Et nemo penè Authorum est, qui non celebrârit Caniculæ ortum, vti & consequenteis ipsum 30. 40. aut 50. dies (Authores nempe varij sunt) Canicula-reis ex eo vocatos.

Prætereo autem, num tales dies, qui numerabantur pridem à die Iulij circiter 17. quo ortus Canis contingebat, numerari debeant etiam-num ab eodem, vt solet vulgò fieri; cū iam ortus Canis con-



tingat dumtaxat sub medium Augusti.

Caterùm Planetas dixi superiores; nam duo inferiores Venus, & Mercurius aliquando oriuntur mane, & occidunt vespere; aliquando oriuntur vespere, & occidunt manè.

Causa est, quia cum Solem circumeant, & non semper in ortum cursum dirigant; sed aliquando etiam versus occasum regrediantur, vt dicendum suo loco est: efficitur, vt cùm aliunde sint velociores ipso Sole: Tum assequantur illum manè, dum ab occidente adueniunt, & vespere eum deferant, dum procedere in orientem pergunt; Tum vespere in Solem incurrant, dum ex oriente regrediuntur, & manè ipsum deferant, dum ire pergunt in occidentem.

## CAPVT XXII.

*De partibus Temporis (cuius mensura est Primus Motus reuolutione Sphære designatus) ac primùm de Die.*

**D**ICTVM est antè Reuolutionem, seu motum Primi Mobilis, qui explicari per Sphæram solet, ac penes Equatorem præsertim spectatur, mēsuram esse Temporis; quamobrem incongruum non est, vt heic pauca quædam de partibus Temporis, quatenus in eiusmodi mensuram cadunt, attexamus.

Cùm verò Dies primùm occurrat, vt quo tempus notius non sit; Notandum est Diem accipi bifariam, sicuti iam antè insinuaturn est; primò nempe pro duratione integræ circumductionis Solis circa Ter-

H iij



ram; & secundò pro duratione, siue mora Solis supra horizontem. Priore sensu Diem Naturalem, posteriore Artificialem appellari vulgare est.

Dies Naturalis, qui etiam <sup>Nox Inuesp.</sup> quasi *Noctidialis* vocatur, quòd tam diem artificialem, quàm etiam noctem comprehendat, aut Astronomicus est, aut Civilis.

Astronomicus est temporis spatium, quo reuolutio integra Æquatoris peragitur, vnà cum portione eiusdem æquatoris respondente illi Eclipticæ portioni, quam interim percurrit Sol.

Nam si Sol quidem non moueretur per Eclipticam, & cum eodem Æquatoris puncto, quo à meridiano, v. c. discedit, ad meridianum rediret, tum integra vna Æquatoris reuolutio præcisè mensuraret diem; At quia Sol continuò promouetur, & diutius quidem vno proximè versus ortum gradu; heinc fit, vt puncto Æquatoris, cum quo Sol discessit, ad meridianum redeunte, Sol adhuc non redeat, sed cum vno gradu proximè posterius.

Proximè, inquam; nam partim quidem propter Zodiaci obliquitatem, partim ob Eccentricitatem, de qua dicendum inferius est, nunc aliquid ampliùs, nunc aliquid minùs vno gradu addendum occurrit; ac ex eo proinde aliqua creatur inæqualitas dierum. Nota verò obiter, cum Sol motu mediocri percurrat diebus singulis minuta  $59 \frac{1}{4}$  ex Zodiaco, seu Ecliptica, percurrere interdum duo proximè minuta ampliùs; interdum duo proximè minùs.

Civilis est, qui pro communi Ciuitatis, nationisve



lege, aut usu, quod ad sui principium, finemve spectat, determinatur. Sic enim olim Babylonij diem auspicabantur ab exortu Solis ( quod etiam-num Norimbergenses faciunt. ) Iudæi, & Athenienses ab occasu ( quod etiam-num faciunt Itali, Austriaci, Bohemi, Silesij. ) Ægyptij à media nocte ( quod etiam-num Mysienses, imò & Nos quoque; nisi quod videmur, vti & Germani, duplex initium facere, quatenus exactis in meridie horis 12. ab unitate iterum inchoamus 12. residuas. ) Umbri à meridie ( quod etiam-num Arabes, & plerique alij. ) Ne memorem Astronomos inchoare quoque diem à meridie; nisi quod Tabulæ Prutenicæ dictæ, principium statuunt in media nocte.

Quæ insuper varietas sit dierum Festorum, Professorum, Comitiorum, cæterorumque huiusmodi, infinitum sit dicere: cum gens vnaquæque suos spectiatim habeat.

Circa diem Artificialem, acceptumve pro mora Solis supra horizontem, illa debent sufficere, quæ dicta sunt circa positum multiplicem Sphæræ.

Addendum heic solum dies Artificiales inæqualiter crescere, ac decrescere, ob Zodiaci obliquitatem. Siquidem circa Æquinoctia crescunt, ac decrescunt admodum sensibilibiter, quòd arcus diurni amplificentur, contrahanturque admodum; circa Solstitia verò valdè insensibilibiter; quòd arcus diurni ferè augeantur, aut minuantur nihil.



## CAPVT XXIII.

*De Hora.*

**S**OLET dies proxima diuisione resolui in Horas; & proxima compositione euadere in Hebdomadas.

Horæ vox antiqua est quidem; sed sumpta nempè pro tempestate; nam vsurpata posterius est pro parte diei vigesima quarta; cùm Priscis vix alia ratione diuideretur dies, quàm in matutinum, meridianum, & vespertinum tempus.

Est autem genus Horarum duplex; nam aliæ *Æquales*, aliæ *Inæquales* dicuntur.

Hora *Æqualis* (quæ etiam *Æquinoctialis* dici solet) est pars diei Naturalis vigesima quarta; seu id tempus, quo gradus *Æquatoris* 15. meridianum prætercurrunt (nisi quòd exiguum fit additamentum ob causam non multò antè memoratam.) Ac tale est genus Horarum, quo semper vsi Astronomi, quòque omnes ferè gentes iam vtuntur.

Prætereo autem Astronomos talem Horam diuidere in 60. scrupula, seu minuta prima; & quodlibet primum subdiuidere in 60. secunda; quodlibet secundum in 60. tertia, &c. vt supra insinuatum est: Computatores verò Annaleis diuidere horam in 4. quadranteis, seu, vt vocant, puncta; & quodlibet punctum variè subdiuidere in ostenta, momenta, &c.

Hora



Hora Inæqualis ( quæ etiam Temporaria ) est pars duodecima diei artificialis, & pars item duodecima noctis; qualibet nimirum die artificiali in duodecim partes æqualeis diuisa, & nocte consimiliter; Adeò proinde, vt Hora Inæqualis dicatur, non comparata ad alias horas eiusdem diei, sed ad horas aliorum dierum; cum constet horas diurnas per hyemem, esse longè breuiiores horis diurnis per æstatem; & horas nocturnas per hyemem, æstatemque ex opposito.

Isto Horarum genere vsi sunt Iudæi, vt ex variis Scripturæ locis intelligitur; in quibus cum hora Prima sit ea, quæ immediatè ortum Solis consequitur; Tertia est ea, quam nos dicimus nonam matutinam (intellige verò præsertim circiter ipsum Æquinoctium) Sexta, quam meridiem; Nona, quam tertiam pomeridianam; Vndecima, à qua superest unica ante occasum Solis.

Eodem genere vsos esse Græcos vel ex eo intelligitur, quòd Achilles Tatius quærit; explicatque, cur in ea regione diceretur Sol in æstiuo Solstitio creare diem 15. horarum, in hiberno nouem: cum in mechanicis horologiis, hydrologiisque dies videretur perpetuò constare ex 12. horis.

Eodem quoque vsos Romanos innumera loca Authorum conuincunt: cuiusmodi sunt, v. c. illa,

*Prima salutanteis, atque altera continet hora;*

*Exercet raucos tertia causidicos, &c.*

Et, *Sterimus, indomitum quod despumare Falernum*  
*Sufficiat, quinta dum linea tangitur vmbra.*



Vbi constat intelligi horam vndecimam matutinam, seu vnam horam ante meridiem.

## CAPVT XXIV.

*De Hebdomade.*

**H**EBDOMADEM esse dierum collectionem omnium antiquissimam, ex Sacro-textu Geneseos patet.

Illa vfos fuisse ab omni memoria omneis Orientaleis propemodum constat: Occidentaleis autem dumtaxat à Christiana Fide recepta. Nam Græci quidem Decade, Romani Enneade potius utebantur.


Indigitauere Ethnici singulos Hebdomadis dies nominibus Planetarum singulis; ac retinentur etiam-num vulgò appellationes apud nos; nisi quòd loco diei Solis, diem Domini, seu Dominicam dicimus, ob reuerentiam eius diei, qua Christus Dominus surrexit à mortuis; & loco diei Saturni, diem Sabbathi, quasi diem Quietis, ob memoriam eius, qua Deus initio legitur quieuisse ab omni opere, quod patrârat.

At, cur post diem Solis sequitur dies Lunæ; post hunc dies Martis, &c. nusquam seruato ordine, quo se Planetæ habent in cælo?

Id intelligendum est ex circulo, cuius circumferentiâ in septem parteis æqualeis diuisâ, & ab vtro-



que fine cuiusque partis ductis lineis in punctum oppositum, triangula septem æquierura creentur, in quorum cuspidibus Planetæ ex ordine collocentur; ut videre licet in apposito schemate.



Videlicet, si ex  $\hbar$  sequaris ductum lineæ, quæ est ad læuam, incidēs in Solem; si ex Sole sequaris ductum alterius, incidēs in Lunam; Si ex Luna alterius, in Martem; atque ita porrò eo ordine, quo dies Hebdomadis nuncupantur.

Exinde etiam intelliges, quâ fiat, quod putant hunc ordinem sequi ex eo Dominio, quod tribuunt Planetis singulis in singulas horas. Cum enim velin primâ diei horâ (incipiendo à meridie) dominari Planetam, qui diei nomen dat; & horâ secundâ Plane-

I ij



ram sequentem, iuxta ordinem, quem descendendo habent in cælo; ac tertiâ alium, & sic deinceps; etiam redeundo ad supremum, cùm ventum fuerit ad infimum, iuxta vulgaria hæc carmina,

*Luna, & Mercurius, Venus, & Sol, Mars, Ioue, Satur,*

*Ordine retrogrado sibi quivis vendicat horam:*

Cùm id, inquam, velint, eueniet, vt attribuendo singulos Planetas horis singulis, postquàm perueneris ad vigesimam-quartam, sequatur pro hora vigesima-quinta, hoc est prima diei insequentis, Planeta ille, qui diei illi nuncupationem tribuit; vt circum-eundo circulum descriptum, fiet manifestum.

Cæterùm in vsu Ecclesiastico, dies indigitamus nomine, ordinèque Feriarum ( nisi quòd loco Ferie primæ dicimus rursus Dominicam; loco septimæ Sabbathum ) quoniam initium veteris anni Ecclesiastici à Paschate fuit, & dies omnes Hebdomadis primæ Feriati fuerunt (vtcumque iam sint non ampliùs, quàm tres) factumque est inde, vt sequentium quoque Hebdomadum dies auspicio, ac imitatione primariæ illius, sint Ferie vocatæ.

## CAPVT XXV.

### *De Mense.*

**M**ENSIS est quidem propriè tempus decursus Lunaris per Zodiacum; sed hoc nomine venit etiam tempus, quo à Sole decurritur duodecima



Zodiaci pars; unde alius mensis Lunararis, alius Solaris appellatur.

Lunararis autem mensis aut Periodicus, aut Synodicus est; ac sunt, qui distinguant præterea mensem, quem appellant Illuminationis.

Periodicus est temporis spatium, quo Luna digressa ab vno Zodiaci puncto, ad idem-met redit; estque dierum 27. cum diei proximè triente.

Synodicus, quo Luna à conjunctione cum Sole digressa, ad conjunctionem aliam redit; estque dierum 29. cum diei proximè dimidio.

Nempe debet Luna, postquam ad punctum redierit, in quo fuerit Soli conjuncta, duos, & amplius dies adhuc progredi, ut Solem, qui interea motum non intermiserit, assequatur.

Illuminationis mensem vocant illud tempus, quod fuit, ex quo primùm Luna apparet recens vesperi, quousque iam vetus manè occultetur: estque præterpropter 26. dierum.

Solaris mensis, si assumatur medius inter excessum, defectumque aliquantulum, est dierum 30. & horarum 10. cum proximè semisse.

Cum Mensis porrò alius Astronomicus, alius Civilis distinguatur; Astronomicus est propriè Lunararis, tam periodicus, quàm synodicus; synodicus verò præsertim.

Civiles autem menses sunt, quibus Ciuitates, nationesque variæ pro institutis quæque suis vtuntur; nam quibusdam quidem Lunares, quibusdam verò Solares placent.



Lunaribus vsi sunt olim Iudæi, Græci, Romani, alij (vtuntur & iam Mohammedani) sed illis nempe synodicis. Quanquam quia semisses illi, & alia id genus fragmenta dierum ex vsu ciuili non sunt; idcirco familiare fuit, vt menses alternis 30. & 29. dierum haberentur, ac dicerentur Pleni, & Cui.

Solaribus vsi sunt Egyptij; sed qui tamen essent omnes dierum 30. Nam confectos quidem dies quinque ex fragmentis illis denarum horarum rejiciebant in finem anni; & confectas sex prope horas ex illis semissibus, nullo quasi habebant loco.

Dici & nos possumus vti; tametsi duodenas circuitus Solaris parteis inæqualiter in eos distribuamus; & sex illas horas quarto quoque anno solum colligamus, habeamusque pro vno die, qui inter 23. & 24. mensis Februarij inferatur.

Prætereo Iulium Cæsarem fuisse, qui annum Lunarem à Romulo vsque, Numaque acceptum, in Solarem commutans, hanc mensium inæqualitatem partim retinuerit, partim fecerit, vt à Macrobio, aliisque narratur.

Prætereo & varia apud varios Mensium nomina: cum sit vulgare, nostrum quidem Martium, sequentibusque fuisse à Romulo institutos, ac nominatos (nisi quod post Cæsaris mortem Iulius dictus est pro Quintili, Augustus pro Sextili) Ianuarium autem, Februariumque fuisse additos, sicque nuncupatos à Numa: ac notum sit Græcorum menseis dici Hecatombæonem, Anthesterionem, Elaphebolionem, &c. Iudæorum Tisri, Marchesuan, Casleu, &c.



*Ægyptiorum Thoth, Paophi, Athyr, &c. nequid de cæteris attingam.*

Prætereo demùm varias dierum, partiumque mensis nuncupationes; quod genus fuere apud Romanos Kalendæ, Nonæ, Eidus; apud Græcos Neomenia, Decas, Eicas, &c.

CAPVT XXVI.

*De Anno.*

**T**AMETSI Annus accipiatur interdum pro tempore reuolutionis cuiusque Planetæ per Zodiacum (imò & interdum pro integra reuolutione Firmamenti secundum eundem Zodiacum; quippe eam nonnulli Magnum Annum vocant) nihilominus Annus propriè est id tempus, quo Sol integrè Zodiacum perlustrat.

Distingui autem solet annus in Astronomicum, ac Ciuilem; & Astronomicus alius Vertens, alius Sidereus appellitari.

Vertens est, quo digressus Sol ab vno Zodiaci puncto (vt Æquinoctij, aut Solstitij) ad idem-met reuertitur; Sidereus, quo digressus à Sidere aliquo, ad idem-met redit.

Et cum Sidereus sit Vertente insensibiliter prolixior, ob motum Fixarum in ortum, quem mox insinuauimus, & de quo inferius dicetur; continet Vertens dies 365. cum horis 5. & minutis proximè 49.

Ciuilis est, quo Ciuitates, nationesve pro arbitrio



utuntur; & vel spectando quidem solum motum Solis; vel adsciscendo etiam motum Lunæ; ex quo annus alius Solaris, alius Lunaris dicitur.

Solaris, aut constat perpetuò diebus 365, qualem iam insinuauimus fuisse vsui apud Ægyptios; constantem nimirum ex duodecim tricenarum dierum, mensibus, ac diebus quinque, qui dicti sunt *επαγόμηναι*, quasi superadjecti.

Quo loco notandum; cum illi nihil morarentur abundanteis illas quotannis horas propè sex; ideo solitum fuisse euenire, ut intra annos 1640. Æquinoctia, & Solstitia per omneis anni mensibus, mensiumque dies decurrerent; quatenus, si hoc anno, v. g. Æquinoctium contingat in meridie diei 20. Martij, contingeret post annum hora 6. vespertina eiusdem diei; & rursus post annum, in media nocte insequente; & iterum post annum, hora 6. matutina diei 21. & post annum denique quartum, in meridie eiusdem diei 21; ac pari modo procedendo, post quatuor alios annos, in meridie diei 22. atque ita de cæteris.

Aut annus quisque ordine quartus constat diebus 366. intercalato scilicet die; quem innumus iam confici ex illis sex propè horis asseruatis. Notum autem est intercalationem fieri, ut Æquinoctia, & Solstitia intra eosdem mensibus, mensiumque dies contineantur, neque excurrant, ut dictum est apud Ægyptios fieri.

Notum etiam est annum illum quartum idcirco Bis-sextilem dici, quòd cum intercalatio fiat, die illo inter 23. & 24. Februarij interposito, dicatur illo

anno



anno bis, Sexto Kalendas Martij.

Horas autem prope sex dico: quandoquidem defunt II. proximè minuta. Ex quo proinde intelligitur nimium esse, quod additur quolibet anno Bissextili; ac posse idcirco Æquinoctia, & Solstitia excurrere sensim non procedendo, sed regrediendo; atque exinde euenisse, ut cum tempore Concilij Nicæni Æquinoctium vernum cōtingeret circiter diem Martij 21, deprehensum fuerit contingere, Patrum nostrorum memoriâ, circiter diem II. eiusdem. Adeo proinde, ut anno Christi 1582. suppressi fuerint 10. dies, ut rediret ad 21.

Prætereo verò, quia hæc vocata Kalendarij reformatio, facta est à Gregorio XIII. Pontifice Max. ideò anni formam, qua iam utimur, dici Gregorianam, ac nouam; cum vetus illa, quam Prouinciæ, reformationem non amplexæ, adhuc retinent (numerantes proinde Æquinoctia, Solstitia, aliaque anni tempora totis decem diebus posterius, quàm nos) Iuliana vocetur, quasi existens eadem-met, seu sine vlla interruptione, quæ fuerit à Iulio Cæsare instituta.

Lunaris Annus est, qui constat ex 12. mensibus Lunaribus synodicis; seu diebus 354, cum proximè triente, siue octo horis: sicque Solari minor est diebus ferè II. quos quia quotannis adjicimus, ut Lunarem cursum ad Solarem accomodemus, ideò Epactaleis, Epactal-ve vocamus.

Veteres, cum Lunarem annum dierum præcisè 354. haberent; ideò reputantes deesse ad Solarem dies II. cum quadrante, qui intra octo annos euade-

K



rent dies 90: ideò assumebant hos dies, & conficiebant ex ipsis mensis ( *εμβολιμους* appellatos ) siue treis, dierum tricenū, quos post tertium, quintum, octauum annos intercalarent, quemadmodum Græci; siue quatuor, qui essent alternis 22. & 23. dierum, quos alternis intercalarent annis secundo, quarto, sexto, octauo, vt Romani.

Intercalabant porrò eos Romani post diem Februarij 23, seu post Terminalia (vt minùs sit mirum, fuisse idem tempus delectum ad intercalandum Bis-sextilem diem) cū Græci potiùs intercalarent inter 5. & 6. mensis; vnde quia sextus mensis erat illis Posideon, mensis intercalatus vocabatur Posideon prior. Quo modo quoque apud Iudæos intercalatus ante 6. qui Adar, prior Adar appellabatur.

Nihil heic addendum de principio Anni, quod constat existisse semper apud varias nationes varium. Nam cū Ægyptij haberent vagum per totam anni seriem; cœpere Iudæi Ecclesiasticum annum à mense Nisan, seu à nouilunio, quod fuit proximum verno Æquinoctio; & Ciuilem à mense Tisri, seu à nouilunio, quod fuit proximum Æquinoctio autumnali. Sic cœpere Græci ab eo, quod proximum Solstitio æstiuo; Romani à Bruma, seu ab ipso hyberno Solstitio: nisi quòd propter expectatum à Cæsare, annum instituentem, sequens proximè nouilunium, vt in eo die Kalendas Ianuarij, principiumve anni defigeret, euasit hocce anni principium (quo nos etiamnum vtimur) aliquot diebus Brumâ posterius. Sic alij aliis temporibus.



Nihil quoque addendum de diuisione anni in tempestates quatuor, aut treis, quas Ægyptij pridem habuisse leguntur (imò etiam menses interdum) pro totidem annis: vt minùs sit mirum, quòd hominum vitam adeò longæuam, seu annorum, tam numero-  
forum perhibuerint.

Nihil rursus de temporibus, quæ per repetitos annos mensurantur, vt Olympiade, annorum 4. Lustris, annorum nunc 4. nunc 5. Indictione, 15. Periodo Metonis, seu Cyclo Lunari, Numero ve aureo, 19. Cyclo Solari, literarũve Dominicalium, 28. Iubilæo 49. aut 50. Periodo Calippi, 76. Sæculo, 100. Periodo Hipparchi, 304. Periodo Dionysij, 532. Periodo Iuliana nuper excogitata à Scaligero, 7980. Anno Magno, qui non modò, pro Reuolutione iam memorata Firmamenti, sed etiam pro Restitutione omnium rerum in eundem statum, quem initio habuerint, vsurpatus est, habitusque non modò ab Astrologis 25. 36. 49. millium annorum; sed ab alijs etiam vt pauciorum, ita quam-longissimè plurium.

CAPVT XXVII.

*De Epochis Temporum.*

**N**ECESSE est Astronomis, dum cælestis supputant motus, non modò certa cæli puncta, à quibus motus Siderum deducantur, supponere; verum etiam illa quasi alligare certis momentis temporis, à quibus vsque, tanquam principiis, & capitibus, supputatio incipiat. Huiusmodi porrò principia, seu

K ij



capita sunt, quas Epochas vocant, quasi sint quædam veluti fixa, determinataque, & cohibita, non vaga momenta. Dicuntur verò etiam vulgò *Æra*, non tam fortè ex vsu Hispanorum vetere, quam ex abusu, quo singularis, fœmineaque vox facta est ex plurali, neutráque *Æra*: sic enim vocabantur pridem ærei illi clauiculi, quibus Abaci supputatorii erant instructi. Dicuntur & Radices; quòd vt plantæ radicibus, sic temporum series Epochis incrementum accipiant.

Illustrissima porrò omnium, familiarissimáque nobis, Epoche est Natiuitatis Christi, seu Kalendæ eius Ianuarij, quem supponimus proximè insequentem Natiuitatem Christi Domini, & à quibus ad vsque Kalendas Ianuarias anni huius labentis dicimus fluxisse annos completos 1645.

Etenim, tametsi nonnulli contendant natum esse Christum non statim à Bruma, sed sub Autumnale æquinoctium; & sint Chronologi eruditi, qui defendant natum non modò vno, sed etiam duobus, sed tribus, sed quatuor, sed quinque annis priùs, quàm hæc incipiat Epoche: Ea nihilominus & probari, & retineri non desinit, tum propter vsum, tum quia nihil refert ad veritatem supputationis, circumstantia actionis, aut rei, quæ Epochæ nomen, aut occasionem dat; si constet modò de quoto ab heinc anno, & de quo illius momento sit sermo, cum in ipso supponimus Astrum occupasse id punctum, à quo eius motum, seu antecederet, seu consequenter deducimus.

Constat interim cur hanc *Æram* vocent vulgæ



rem, ac Dionysianam. Vulgarem scilicet appellant, ad discrimen eius, quam reputant veram, & iuxta quam nobis numerandus foret hic annus, non supra millesimum sexcentesium, quadragesimus sextus, sed aut 47. aut 48. aut 49. aut 50. aut 51. Dionysianam verò ob Dionysium Abbatem, cognomento Exiguum, qui Author illius exstitisse creditur, annis post Christum paullò plus quingentis: à quo vsque tempore cœperunt anni ab ipsa Christi Natiuitate numerari; cùm prius solùm per Consules, per Olympiadas, ab Vrbe condita putarentur.

Cæterum, vt aliquas alias, quibus partim in Chronologia, partim in Astronomia vsus est, attingamus; Prima inter Sacras meritò celebratur Epoche Orbis conditi; de qua vtcùmque sit insignis controuersia; videntur tamen illi propiùs ad veritatem accedere, qui conditum Mundum deducunt annis ante Christum (seu vulgarem Christi Epochen) 3950.

Prima autem inter prophanas meritò habetur Epoche Olympiadum; quarum initium ob instauratos ab Iphito Olympicos Ludos, pertinet ad æstatem anni ante Christum 777.

Proxima illi est Epoche Urbis conditæ, quam communior opinio est spectare ad annum ante Christum 752.

Apud Astronomos potissima fuit semper Epoche Nabonassari, Babyloniorum, vt putant, Regis, spectans ad annum ante Christum 747, & ad diem quidem Februarij (tunc suppositi) 26. à quo vsque, coincidente cum prima die mensis Thot, supputatio fit

K iij



per annos Ægyptios, quibus Ptolomæus, & alij præ-  
rique Astronomorum, etiam Copernicus, vsi sunt.

Sequitur Epoche Obitus Alexandri Magni, ad  
quam est consimiliter annorum Ægyptiorum vsus;  
pertinet autem ad annum ante Christum 324. &  
diem Nouembris 12.

Celebris est etiam ante Christum Epoche Iulij Cæ-  
saris, præcedens Christi Epochen annis præcisè 45.

Post Christum autem celebris fuit Æra Diocle-  
tiani, siue Martyrum ( qui nimirum sub eo sunt passi  
in Regione Coptitarum, prope Nilum ) dicitur verò  
etiam Æra Abyssinorum, & Æthiopum, pertinens  
ad annum Christi 283.

Itemque Epoche Arabum, alias Hegiræ, seu Fugæ  
Mohammedis, pertinens ad annum Christi 622. &  
diem Iulij 15.

Ac rursus Epoche Persarum, siue Iesdagird vltimi  
Persarum Regis, quem deuicit, interfecitque Oth-  
man, pertinens ad annum Christi 631. & diem Iu-  
nij 16.

Addi his potest Epoche Reformationis Kalendarij,  
de qua iam antè diximus, pertinens ad annum Chri-  
sti 1582. & diem 5. mensis Octobris, à quo vsque ha-  
bito pro decimo quinto, desunt deinceps ad anno-  
rum Iulianorum formam, dies 10.

Prætereo id moris iam esse, vt tam ipsa Christi,  
quàm ceteræ Epochæ (imo & reliqua tempora) refe-  
rantur ad seriem annorum Periodi, idcirco vocatæ  
Iulianæ, quòd anni, ex quibus componitur, Iuliani  
sint.



Illius modum vt percipias: cū memoratus Dionysius Exiguus ducto cyclo Solari 28. in Lunarem 19. obtinuisset Periodum annorum 532, quibus exactis isti cycli, qui simul cœpissent, simul rursus inciperent; Scaliger hac Periodo in cyclum Inductionum, videlicet 15. ducta, Periodum (quæ est ipsa dicta Iuliana) obtinuit annorum 7980, quibus exactis tres hi Cycli, qui simul inceperint, simul iterum incipere possint.

Et quia, vt iam in vsu sunt huiusmodi Cycli (provt scilicet, v. g. numeramus hoc anno ex Solari 3. ex Lunari 13. ex Indictionali 14.) fieri non potest, vt inceperint, incipereve potuerint (nempe si fingamus nostri anni formam retrò ante Christum productam) nisi ante annos 6360; efficitur, vt cœpisse hæc Periodus intelligatur ante conditum Mundum.

Quare & extensa Periodo, deprehendemus Epochen Mundi incidere in annum Periodi Iulianæ 764. Epochen Nabonassari in 3967. Epochen Christi in 4714. atque ita de cæteris.







INSTITVTIONIS  
ASTRONOMICÆ  
LIBER SECVNDVS.  
SIVE  
DOCTRINA THEORICA.

---

CAPVT I.

*De Phenomenis varijs, quæ Secundorum Mobilium  
Theoriæ occasionem fecerunt.*



T pars Astronomiæ, de qua hætenus, Sphærica doctrina dicitur à Sphæra, cuius beneficio Motus Primus explicatur: Sic ista, quam aggredimur, appellatur Theorica, quòd per quasdam Machinulas, aut orbiculareis figuras, quas Theorias vocare solent ( forte, quod quadam scrupulosiore contemplatione indigeant ) Secundi Motus declarantur.

Cùm principio porrò prænoscentia sint Phænomena quadam præcipua, quibus obseruatis homines  
cœpe-



cœperunt tum cogitare motus alios, præter primum; tum excogitare Hypotheseis, iuxta quas ij fieri intelligerentur; ideo adnotari hæc possunt.

Primum vniuersè circa omneis Planetas; obseruârunt imprimis ipsos nunc istis, nunc illis horis locis oriri, & occidere; & sub meridianum nunc altius in Boream, nunc humilius in Austrum attolli; ac vtrumque quidem certas inter metas. II. incedere omneis nunc ocyùs, nunc segniùs. III. aliquando maiores, aliquando minores (etiam citra negotium refractionum) apparere. IV. configurari variè tum inter se, tum etiam cum Fixis: & donec quidem coniunguntur, interdum Fixas ab ijs regi; interdum ipsos a se mutuo, siue alios ab aliis; & non tamen pariter omneis respectu omnium Terræ incolarum.

Deinde speciatim circa ipsum Solem; I. Vbi occasum subiit, habere ipsum stellas conspicuas post se occasuras, quæ aliquot post dies amplius non appareant; & oriturum habere ante se inconspicuas, quæ aliquot post dies appareant, & præexoriantur. II. Tendentem Solem ab Æquinoctio Verno in Autumnale, insumere dies 187, & ab Autumnali in Vernum, non-nisi 178. adeò vt versetur totos nouem dies in signis Boreis, plusquàm in Austrinis. III. Pati Solem Eclipsin interdum totalem, plerùmque partialem; & in Nouilunio quidem dumtaxat; neque tamen omnino. IV. Visum esse maximam Solis Declinationem tam in Boream, quàm in Austrum decrefcere; neque enim tantam iam, quantam olim haberi.

Circa Lunam; I. Ex quo noua apparet, ipsam sic die-

L



tim remoueri à Sole, vt magis, magisque versus stellas orientiores semper accedat, quousque circuitum perficiat. II. Ipsam interim variis apparere Phasibus, nempe in crescendo corniculatam, semisectam, vtrimque gibbosam; & post plenum orbem decrescendo, iterum gibbosam, bisectam, corniculatam euadere. III. Eclipsin interdum pati, nunc totalem, nunc partialem, & plenilunio quidem dumtaxat; non omni, verum contingenti ferè post sex menseis. IV. digredi aliquando tam in Austrum, quàm in Boream, nunc non-nihil magis, nunc non-nihil minùs, quàm Solem.

Circa Mercurium, ac Venerem; I. Eiusmodi planetas esse quasi affeclas Solis; neque enim ab eo discedere procùl; sed Venerem quidem vix quicquam amplius, quàm sesqui-signo: Mercurium ne signo quidem integro. II. Ipsos aliquando antecedere, aliquando subsequi Solem. III. Esse eos interdum Directos, hoc est moueri in consequentia, siue secundum seriem, successionem-ve Signorum, vt ab  $\gamma$  in  $\delta$ , à  $\delta$  in  $\epsilon$ : interdum Retrogrados, hoc est moueri in Præcedentia, siue contra Signorum seriem; vt ab  $\gamma$  in  $\chi$ , à  $\chi$  in  $\omega$ : interdum Stationarios; hoc est apparere per aliquod tempus neque in antecedentia, neque in consequentia moueri. IV. Ipsos quoque in Austrum, ac Boream digredi, nunc magis, nunc minùs, quàm Solem.

Circa Martem, Iouem, Saturnum; I. Non esse ipsos perinde, ac reliquos duos alligatos Soli, sed ita ab eo digredi, vt interdum quoque oppositi sint,



seu ab eototis sex Signis distent. II. Fieri quidem ipsos quotannis promotiores versus stellas orientiores; verum fieri quoque aliquando Directos, aliquando Retrogrados, aliquando Stationarios. III. Tum constanter Retrogrados esse, ac simul celerrimos, & adspectu maximos, cum ipsi Soli opponuntur; & spatium retrogradationis competere amplius Marti, quàm Ioui, Ioui, quàm Saturno; Tempusque è contrà retrogradationis competere amplius Saturno, quàm Ioui, Ioui, quàm Marti. IV. Et ipsos denique nunc magis, nunc minùs, quàm Solem digredi in Austrum, ac Boream.

Circa Fixas denique; Non tueri eas semper eandem à punctis Æquinoctialibus distantiam, sed tendere quoque lentissimè in consequentia; & (vt visum quidem aliquibus est) inæqualiter, hoc est nunc velociùs, nunc segniùs. Nam Spicam  $\mu$ , v. c. quàm Timocharis non longè ab obitu Alexandri obseruauit præcedere punctum Æquinoctij Autumnalis octo gradibus; obseruatam esse ducentis post annis ab Hipparcho, præcedere tantum sex; & 260. post à Ptolemæo, non multò amplius gradibus tribus; ne adjiciam hoc tempore, seu annis 1500. post, obseruari subsequi ipsum idem punctum gradibus propè 19. Quo modo quoque Stella prima Arietis, quæ Timocharidis tempore distabat solum ab Æquinoctio Verno duobus gradibus, deprehenditur iam distare ultra gradus 28. & dictum antè obiter est stellam in extrema cauda Cynosuræ, Polarem vocatam, distare solum iam à Polo duobus gradibus, cum paullò am-

L ij



plius semisse, quæ tempore tamen Hipparchi distabat vltra 12. atque ita de cæteris.

## CAPVT II.

*Varia genera Hypotheson saluandis, siue explicandis  
huiusmodi Phenomenis.*

**H**ÆC igitur sunt, aliaque id genus, quæ quæri fieri possent, apparerentve, vt explicaretur, varij varia commenti sunt.

Vniuersè supposuerunt omnes (Pythagoras verò, ac Plato imprimis) tametsi nobis cælestes motus inæquabiles, irregularesque appareant, debere tamen æquabileis regulareisque secundum se esse (neque enim difformitatem aliquam competere posse corporibus cælestibus, immortalibus, ac diuinis.) Quare & quæsiere quomodo per motus circulares, æquabileisque saluari apparentia possent.

Et quia generale fuit, vt id conarentur vel ex supposita quiete, vel ex supposito motu Terræ, sicque haberi potest duplex vniuersè Hypothesis: idcirco, cum sequente libro de posteriore (seu iuxta quam Terra mouetur) dicendum sit; cognoscendum paucis heic est, quàm multiplex facta sit prior.

Supposita ergo Telluris quiete, Hypothesis prima fuit Anaxagoræ, Democriti, quorundam aliorum, qui censuerunt Astra moueri liberrimis spatiis, ac nullas proinde esse Sphæras solidas, quibus alligentur; nullum Primum Mobile, à quo abripiantur; nullum Motum secundum, quo reipsâ ferantur in



ortum; sed competere solum ipsis motum simplicem in occasum; ac illa apparere moueri in ortum, quæ feruntur seignius in occasum; sicque cum Stellæ Fixæ ferantur omnium velocissimè in occasum, circuitumque absoluant intra horas 24. Lunam v. c. ferri omnium seignissimè, non absoluentem putà circuitum, nisi intra horas proximè 25. Atque adeò non ipsam proprio motu moueri versus stellas orientales; sed deferi potius à Stellis magis occidentalibus: Neque rem carere exemplo in ijs, qui ad eandem metam inæquali cursu contendunt.

Hicce adstipulati sunt recentiorum quidam, qui & addiderunt fieri motus Siderum, ac Errantium præsertim, non directè, seu per circulos parallelos versus occasum, sed obliquè, siue per Spiras; & ex hoc esse, cur ex Austro in Boream, ex Borea in Austrum sensim promoueantur.

Debuerunt autem etiam addere Planetas cum retrogradi, v. c. apparent, debere cursum intendere, moueriue celerius, quàm Fixas; & tunc apparere maiores, quòd cursum demittant, siue propius Terram ferantur: aliaque id genus similia.

Altera Hypothesis eorum fuit, qui censuere Astra illigata, seu quasi implantata esse Sphæris solidis, ad quarum motum circumferrentur, & vnà cum ipsis abriperentur (si in inferioribus quidem forent) à Mobili supremo, seu primo.

Atque hi quidem propriè fuere, qui inuexere Secundos motus; supponentes nempe non posse vni, & eidem mobili duos per se motus competere; sed



solum, cum vnus per se fuerit, competere posse alium ex accidenti, siue ab extrinseco; vt dum Nauta à pro-  
ra in puppim, idque, v. c. in austrum mouetur per  
se: nam interim ex accidenti, seu ad motum nauis  
mouetur in partem contrariam, videlicet in septen-  
trionem.

Cum ipsi porrò Sphæras totaleis singulorum Pla-  
netarum in plureis Sphæras, orbisve partialeis sub-  
distinguerint; aliqui tamen fecere omneis istos orbis  
*ἁποκέντρος*, *Concentricos*, hoc est idem cum ipsa Terra, si-  
ue Mundo centrum habentis; aliqui verò aut ex to-  
to, aut ex parte *ἐκκέντρος*, *Eccentricos* hoc est centrum  
extra, seu aliud habentis, quàm Terram, aut Mun-  
dum.

Hypothesis Concentricorum inducta fuit ab Eu-  
dodoxo; à Calippo autem, & Aristotele amplificata.

Nam Eudoxus primùm, præter Sphæram Inerran-  
tium singularem, attribuit Soli Sphæras partialeis  
treis, Lunæ totidem; singulis aliorum Planetarum  
quatuor; Et ea quidem lege, vt suprema quæque in  
omnibus Planetis sequeretur motum Sphære Iner-  
rantium, siue primi Mobilis (neque enim aliud ab  
ea agnoscebat) succedens ferretur in ortum secundum  
longitudinem; tertia faceret varietatem latitudinis;  
quarta, quibus adesset, faceret libratione quadam di-  
rectionem, & retrogradationem. Ille proinde Sphæ-  
ras Planetarum 26. numero statuit.

Calippus autem nullam quidem Sphæram adjun-  
xit in Saturno, ac Ioue; sed in ipsis Marte, Venere,  
ac Mercurio singulas; in Sole, atq; Luna binas. Quo



consilio, reticent omnes. Ille proinde Sphæras Planetarum 33. numero fecit.

Aristoteles denique singulis Planetarum Sphæris, quæ non sequerentur motum Inerrantium, adjecit alias totidem, quas & Reuoluentes vocauit; quod cæteras reuoluerent, easque Inerrantium motui conformarent (nisi quod Lunæ, vt infimæ nullos Reuoluentes necessarios censuit.) Quare & Calippicis super-addens 22. constituit Planetarum Sphæras numero 55. & vniuersè cælestis Sphæras (adjuncto primo Mobili, seu Sphæra Inerrantium) numero 56.

Cùm dici inter cætera ex hac Hypothesi non posset, quorsum Planetæ nunc maiores, nunc minores conspicerentur (neque enim motu ipsorum existente concentrico explicari res potuit per minorem, maioremque à Terra distantiam) censuit, qui superiore sæculo reuocauit Concentricos, ipsosque Circumducentes, Circitores, Anticircitores, Contravectos appellitauit Fracastorius; censuit, inquam, posse id saluari dicendo Planetas maiores, minoresque apparere pro conditione partium cæli, quas peruadunt, quæque refractionem, instar vitrorum variè figuratorum, sic variant, vt talem magnitudinis apparentis varietatem inducant.

Omitto autem ipsum multiplicasse Sphæras Planetarum ad vsque 63, attribuentem nempe Soli 4. Lunæ 7. Marti 9. Saturno 10. Mercurio, Veneri, ac Ioui, singulis ij. & præter Sphæram Inerrantium, adjecisse 3. ad variandum ipsius motus; ac insuper Mo-



bile primum; adeò vt ex eius sententia sint cælestes Sphæræ numero 70.

Hypothesis Excentricorum videretur quidem referenda esse ad Pythagoreos; sed quia illi eâ vti sunt ad motum Terræ explicandum; idcirco quod spectat ad communem sententiam, videtur omnino auctores habere tum Hipparchum, quatenus illam Homocentricorum farragine non potuit; tum Ptolemæum maximè, quatenus Planetarum Theoriam per Eccentricos declarauit.

## CAPVT III.


*Hypothesis Ptolemæica, seu communis, quæ est per Eccentricos, & Epicyclos.*

**A**C fuit quidem Ptolemæus ea moderatione, vt contentus fuerit describere Planetarum vias per circulos Eccentricos; at quia inualefcente opinione de soliditate Sphærarum cælestium, requirebatur sollicitè, quâ stare earum soliditas cum eccentricitate posset; ideò à 200. iam annis cœpit Georgius Peurbachius taleis Sphæras excogitare.

Esto heic Sphæra quapiam totalis, v. c. ipsius Solis, quæ centro Mundi, Terræ existente A, concentrica sit tam secundum extimam, conuexamve superficiem B, C, D, E, quæ ambitur à Sphæra Martis, quam secundum intimam, siue concauam F, G, H, I, quæ ambit Sphæram Veneris. Assumatur punctum K, & ex ipso, vt centro, conceptoque aliunde Sole



Sole prope extimam superficiem in L, ducantur  
duo circuli, qui eum complectantur; constat profectò  
orbem totalem sic discretum iri in partialeis treis, vt  
extimus, & intimus futuri sint crassitudinis inæqua-  
lis; & medius ille inter ipsos quasi excauatus, æqua-  
lis.



Et quia iste medius est descriptus totus ( hoc est  
tam secundum conuexam, quàm secundum conca-  
uam sui superficiem ) ex centro alio, quàm ipsius  
Mundi; idcirco ipse est, qui propriè, ac simpliciter  
appellatur Eccentricus; cæteri autem duo appellan-

M



tur Eccentrici secundum quid, quatenus non-nisi secundum alteram sui superficiem Eccentrici sunt, extimus putà secundum concavam, intimus secundum conuexam.


Iunctis porrò centris per lineam traductam B D, & ductâ ipsi ad normam, ac per centrum Terræ A, lineâ C E; tum distantia inter duo centra A K, dici Eccentricitas solet; punctum L, quod in Eccentrico remotissimum à Terra est, Apogæum, itemque Aux, & summa Apfis; punctum M, quod proximum, Perigæum, itemque Augis oppositum, & ima Apfis; linea ipsa B D, vel L M, linea Apfidum; & ipsa C E, vel N O, linea Mediarum longitudinum; quasi cum Sol motus per Eccentricum L N M O, summè à terra elongetur in L, minimùm in M; elongatio in N, & O, sit mediocris.

Scilicet volunt Eccentricum, cùm solidus sit, reuolui ipsum intra illos duos orbeis inæqualeis; ac Solem ipsi illigatum, implantatumve, vnâ cōuolui. Vocatur autem medius ille, qui à centro Solis describi concipitur circulus, Deferens Solem; vti & crassorum orbium exterior, Deferens Apogæum; interior, Deferens Perigæum.

Adnota verò, solum circulum Deferentem Solem retineri ex tota ista compagine, à Ptolemæo; ac ipsum propriè esse, qui intelligatur, & vocetur Eccentricus; nempe quatenus ipsa est Solis via, quam pari ratione habes in sequente schemate cum Eccentricitate, & Apfidum, Mediarumque longitudinum lineis. Circulus autem ille exterior, & concentricus



intelligendus est repræsentare Firmamentum, aut  
extimum cælum.



Esto & alia Sphæra totalis, v. c. Iouis, quâ, superio-  
ris instar, distinctâ in orbeis treis, describatur intra  
crassitudinem Eccentrici simpliciter circellus PQRS.  
Is circellus est, quem Epicyclum vocant, & quem  
moueri quidem volunt vnâ cum Eccentrico secun-  
dum ductum L N M O; sed interim tamen reuolui  
circa proprium centrum L, ac existentem in sui  
superficie Planetam circumvoluere secundum du-  
ctum PQRS.


M ij







rum circulus exterior refert Firmamentum, cælumve  
Supremum.



Præterea autem, quod ille censet, posse per Concen-  
tricum cum Epicyclo, idem explicari, quod per so-  
lum Eccentricum; ac rursus per Concentricum,  
cum duplici Epicyclo, idem, quod per Excentricum  
cū Epicyclo vno, facile esse intellectu: quatenus ipsum  
corpus Planetæ apparet semper eandem viam circa cē-  
trum Mundi ( à quo perinde nunc remotius, nunc  
propius, nunc mediocriter distans efficitur) tenere.

Enimverò, vt Hypothesis iuxta specialeis Planeta-  
rum, Firmamentique Theorias declaretur, paullo vbe-

M iij




94 INSTITUTIONIS  
rius, & quæ recitata Phænomena sunt, explicentur  
distinctius; age singulas paucis attingamus.

# CAPVT IV.

## De Theoria Solis.

**V**T exordium verò ducamus à Sole, tanquam  
principe, ac Moderatore caterorum Lumi-  
num; repetatur primum huiusmodi schema.  
Sit A centrum Terræ, seu Mundi, ex quo describa-





tur B C D E, repræsentans Eclipticam in primo cælo (aut si velis in Firmamento) sub qua, & signis in ea descriptis, annuo motu moueatur Sol. Sit autem Eccentricus, qui hoc motu, & ipso quidem existente æquali, describitur, circulus F G H I; eiusque centrum K. Ducatur linea Apfidum, quæ centra connectat, B D; sitque Excentricitas A K; Apogæum F; Perigæum H; & linea Mediarum longitudinum ducatur C E, transiens per centrum Mundi A.

Hoc posito; cum Sol moueatur æquabili motu per Eccentricum; Si oculus quidem noster existeret in centro K, obseruaret haud-dubiè illum moueri sub Ecliptica æquabiliter: at quia videt illum ex A, ideo apparet ipsi Sol inæquabiliter moueri.

Discedat Sol, ex. gr. ex Apogæo F, & perueniat ad L; tunc oculus ex K, videret illum quasi occupantem in Ecliptica locum M; at ex ipsa Terra, apparet quasi occupans N. Discedat ex perigæo H, & perueniat in O: ex K, videretur in P; at ex A, videretur in Q; & ita de cæteris locis.

Linea porrò K M, & quælibet alia procedens à centro K (vt K R, K S, &c.) in Eclipticam, vocatur linea Medij motus; linea autem A N, & quælibet alia à centro A, ducta (vti A C, A T, &c.) in eandem Eclipticam, linea Apparentis, siue Veri motus.

Nempe Medius motus appellari solet progressio Solis à principio  $\gamma$ , seu Veruo Æquinoctio, ad vsque illam priorem lineam, vt putà arcus  $\gamma$  B M. Apparens autem, seu Verus, eadem progressio ad vsque posteriorem hanc; vt puta arcus  $\gamma$  B N. Et tametsi pro-



clue foret, vt motus Verus diceretur idem, qui Medius; solent tamen Astronomi eundem dicere Apparentem, ac Verum; Ex eoque fit, vt etiam punctum N, appelletur locus Solis Verus; & punctum M, locus Solis Medius.

Differentia illa inter motum Medium, ac Verum; arcus scilicet MN, appellari solet *Æquatio*; & facta etiam iam familiari voce, *Prosthaphæresis*, qua *Additio* simul, & *Subtractio* significatur; quoniam habito per obseruationes motu Vero, talis differentia ipsi nunc addenda, nunc detrahenda est, vt eliciatur motus Medius: Addenda quidem, Sole descendente ab Apogæo in Perigæum; quoniam Verus motus Medium sequitur; subtrahenda verò, Sole ascendente à perigæo in Apogæum; quoniam Verus motus medium antecedit. Oppositum autem faciendum est, cum motu Medio habito, inquiritur Verus.

Vides interim Sole existente in Apogæo, aut Perigæo, nullam esse Prosthaphæresin; quia tunc ambæ lineæ Veri, ac Medij motus concurrunt; & Prosthaphæresin aliunde esse maximam, Sole existente in alterutra Mediarum longitudinum G, aut I; ac tantò semper esse minorem, quantò propior est Apogæo, aut Perigæo.

Prætereo verò arcum interceptum inter Apogæum, & locum Medium Solis, id ipsum esse, quod vulgò vocant Anomaliam Solis mediam (Argumentum etiam appellant) interceptum autem inter Apogæum, & locum Solis Verum, Anomaliam veram.

Prætereo quoque, tum Apogæum Solis (quod repe-

etur



ritur hoc tempore non longè ab initio septimi gradus  $\ominus$ ) progredi motu admodum lento in consequentia (annis scilicet singulis dodrante dumtaxat unius minuti) tum ipsam Eccentricitatem reputari varietati obnoxiam; adeò vt, cum iam comperiatur esse pars semidiametri Eccentrici proximè vigesima octava, reputetur lentè, & aliquò vsque increfcere, decrefcereque.

Heic Nota, cum Ecliptica contineat 360. gradus, & Sol non percurrat illam integrè, nisi diebus 365. & horis 5. ac minutis proximè 49. idcirco Solem singulis diebus non conficere motu Medio gradum integrum; sed solum minuta 59, & 8 secunda: cum aliunde motu apparente, seu Vero conficiat, in Apogæo quidem 57. minuta dumtaxat; & in Perigæo gradum vnum, cum minuto vno, pauculisque secundis.

## CAPVT V.

*De Theoria Luna.*


**S**EQVITVR dicamus de Theoria Luna, in qua, & cæteris, qui supersunt Planetis, attendendus est non modò Longitudinis, sed etiam Latitudinis motus.

De priore autem vt priùs dicamus, & crassiores illos orbeis nihil moremur; Esto in sequente Figura A centrum Mundi; BCDE Ecliptica; F centrum Eccentrici (quod mobile sit circa centrum Terræ) G N M O Eccentricus ipse; A F Eccentricitas; F L

N



Eccentricitas dupla: G apogæum Eccentrici; M perigæum; GM linea Apfidum: CE, vel NO linea Mediarum longitudinum; PQRS Epicyclus Lunæ, cuius est G centrum; Q, aut R Luna in superficie Epicycli.



Triplex heic attendendus motus. Primò apogæi in antecedentia (hoc est à G, in T, V, &c.) regulariter super centro mundi, diebus singulis graduum



11. minut. 12. ita vt periodus eius absoluator intra dies 32. hor. 3. min. ferè 5.

Secundò centri Epicycli in consequentia (hoc est à G, in X, Y, &c.) regulariter quoque circa centrum mundi, diebus singulis graduum 13. min. 11. ita vt periodus eius absoluator diebus 27. hor. 7. min. 43. & hic propriè sit, quem superius diximus Periodicum mensem.

Tertiò ipsius Lunæ in Epicyclo, supernè quidem in antecedentia (h. e. à P, versus Q R) infernè verò in consequentia (h. e. ab R, versus S P) regulariter circa punctum L, quod opponitur Eccentrici centro, diebus singulis grad. 13. min. ferè 4. ita vt periodus eius absoluator diebus 27. hor. 13. min. ferè 9.

Existente centro Epicycli in ipso Eccentrici Apogæo G, dum vtrumque subest, v. c. initio  $\alpha$ , in quo etiam supponatur versari Sol; Quia linea Medij motus Lunæ est ea, quæ ducitur à centro mundi per centrum Epicycli; idcirco coibunt in vnam, linea motus Apogæi, ac linea motus Medij (imò & linea quæque motus Veri; si Luna quidem fuerit in Q; cum linea Veri motus ea sit, quæ ducta à centro mundi per ipsum corpus Lunæ transit) ac denique etiam linea Medij motus Solis, quasi existentis in B. Suppono autem locum tam Medij, quàm Veri motus Lunæ; supputari, sicut in Sole, à principio  $\gamma$ .

Perueniat Apogæum ex G, in T, factò Eccentrici centro Z; peruenerit centrum epicycli in X; sicque erit A T linea Apogæi; A  $\alpha$  linea medij motus; A  $\beta$  linea Veri motus; linea autem medij motus Solis A B

N ij.



erit omninò media inter lineas Apogæi, & Medij motus Lunæ; quòd, licet Apogæum procedat seigniùs dietim duobus circiter gradibus, quàm centrum Epicycli; Sol tamen vnum circiter gradum in consequentia dietim percurrentes, illum detrahat motui centri Epicycli, apponat motui Apogæi.

Nota verò gradum, quo Sol insequendo Lunam dietim promouetur, causam esse, cur Luna ad eandem rediens periodum, non ampliùs ibi reperiat Solem, sed debeat adhuc duos & ampliùs dies incedere, vt eum assequatur, ipsique rursus congregiatur; sicque cum mensis Periodicus sit dierum 27. ac ferè trientis; Synodicus fiat dierum 29. ac dimidij, cum horæ proximè dodrante; vt superiùs iam adnotatum fuit.

Perueniat porrò etiam Apogæum in V, in γ, in δ, centro Eccentrici facto s, n. L; peruenierit & centrum Epicycli in Y, θ, δ: & Luna perueniens ad s, totum circumierit Epicyclum; ac linea Medij motus Solis A B intermedia semper inceserit, &c.

Quod de hac autem Schematis medietate dico; idem & de alia pari proportionem est intelligendum; vtcumque Epicycli ducti in ipsa non sint; neque item lineæ, occultique circuli designantes varios Eccentrici situs; ne nimia intricatio, confusioque inde crearetur.

Exinde interim colligere licet, centrum Epicycli occupare semper Apogæum Eccentrici in omni Coniunctione, & Oppositione media cum Sole; & Perigæum in Quadraturis; & reliqua loca intermediis



proportione temporibus; adeò proinde, ut bis in mense totum Eccentricum percurrat.

Exsistente rursus Epicyclo in X, Elongatio Lunæ à Sole est GX; & duplum illius, seu distantia Lunæ ab Apogæo TX; quæ cum diceretur in Sole Anomalia, seu Argumentum; dici heic solet Centrum Lunæ.

Argumentum autem hoc loco vocatur distantia ipsius corporis Lunæ exsistentis v. c. in  $\alpha$ , ab Apogæo Epicycli, aut Vero, quod heic est  $\lambda$ ; aut Medio, quod heic est  $\mu$  ( hoc autem designatur per lineam ductam ex puncto K, quod centro Eccentrici opponitur ) unde & illud Argumentum Verum; hoc autem medium appellatur.

Cumque arcus  $\lambda \mu$  dicatur Prostaphæresis, seu Aequatio centri; tum  $\alpha \beta$  dicitur Aequatio Argumenti. Et cum illa addatur ad Argumentum medium, ut habeatur Verum, si centrum Lunæ fuerit minus sex Signis; subtrahatur, si majus; Ista ex opposito, subtrahitur, si minus; additur, si majus.

Ut taceam illam esse nullam, si centrum Epicycli fuerit in Apogæo, vel Perigæo Eccentrici; hanc nullam, si Luna fuerit in Apogæo, Perigæove Epicycli; Ac rursus, illam maximam esse, paullo infra medias longitudes, ut  $\xi$ , Epicyclo exsistente in  $\theta$ ; istam maximam, cum centrum Epicycli est in Perigæo Eccentrici, ac Luna in contactu Periphæriæ Epicycli, & lineæ ductæ ex centro mundi, ut C  $\sigma$ , Epicyclo in Y.

Taceo &, cum ipsa diameter Epicycli exsistentis in Perigæo Eccentrici appareat maior, quàm in Apogæo.

N III



vt vel arguit ipsum discrimen inter arcum Zodiaci  
 quem diameter occupat in perigæo; & arcum  
 quem in Apogæo; ac proportionē aliunde seruata in  
 locis intermediis; idcirco totam diuersitatem distribuere  
 solere in particulas 60, quas appellant scrupula,  
 seu minuta proportionalia; vt proportionē diuersitatis  
 adiiciatur, quod congruum, est ad æquationem argumenti.

Taceo denique ipsum corpus Lunæ, vbi descendendo  
 ex Q per  $\alpha$ ,  $\phi$ , & peruenit ad  $\gamma$ ; & exinde pari ratione  
 per medietatem aliam redierit ad Q, intelligi  
 descripsisse non circulum, sed speciem quamdam  
 ellipseos, seu ouatam lineam. Atque hæc sunt quidem  
 capita præcipua Longitudinis motum attinentia.

Quod ad Latitudinis motum spectat; Notandum  
 est, vt via Solis, seu Ecliptica Æquatorem oblique  
 interfecat in duobus oppositis Æquinoctialibus punctis:  
 sic Orbitam Lunæ, seu descriptum Eccentricum,  
 non jacere directe sub Ecliptica, sed eam oblique  
 interfecare in duobus oppositis punctis, quos Nodos  
 appellant; & Ascendentem quidem, quo ex Austro  
 in Boream; Descendentem, quo ex Borea, in Austrum  
 transitur.

Et, cum id sit commune Lunæ, cum Planetis cæteris;  
 tum eius est proprium, vt Nodus Ascendens hac  
 forma  $\oslash$  pingatur; & Descendens hac  $\otimes$ ; & illud  
 Caput, iste Cauda Draconis vulgò appelletur.  
 Fortè quod, vt Draco, serpensve tenuatur in caput,  
 & caudam, tumescit in ventrem; ita spatium dimi-



dio Orbitæ Lunæ, ac Eclipticæ comprehensum tenuetur ad Nodos, tumescat ad medium, quâ limes est, maximave digressio; vt ex hac figura intelligitur.



Notanda verò heic solùm duo; Vnum, cùm Luna à Nodo discedens acquirat paullatim latitudinem, quovsq; ad limitem Boreum, Austrinumve peruenit; maximam latitudinem, distantiamve, quam in vtrovis limite obtinet, esse graduum quinque.


Alterum, Nodos non esse fixos in certis Eclipticæ punctis; sed progredi sensim in antecedentia; & diutius quidem paullò ampliùs, quàm tribus minutis; adeò vt circuitum absoluat intra 19. ferè annos; vnde existit, quem superius & Cyclum Lunarem; & Numerum aureum, & Periodum Metonis appellauimus. Solet autem propterea fingi seu orbis, seu



CAPVT VI.

*De Theoria trium Superiorum Planetarum, nempe  
 Saturni, Iouis, & Martis.*

**Q**VOD horum trium motus non formâ, sed  
 quantitate sola discrepent inter se; ideo sufficiat  
 vniuersè pro illis huiusmodi schema.





In ipso, A est centrum Mundi: B C D E, Ecliptica; F centrum Eccentrici; G H I K Eccentricus: L centrū circuli Æquantis vocati, tantum distans à centro Eccentrici, quantum hoc à centro mundi; M N O P Æquans ipse, Eccentrico æqualis, & in plano eodem cum ipso. Æquans autem hic siue orbis, siue circulus inducitur, quòd huiusmodi Planetarum motus in Eccentricis, & Epicyclis æquabiles, regularesque sint, non super suis centris, sed super alieno; huius nempe Æquantis centro. G Apogæum Eccentrici; I Perigæum; M Apogæum Æquantis; O Perigæum: B D linea Apfidum; C E linea Longitudinum mediarum; Q R S T Epicyclus; G illius centrum; R Planeta in superficie Epicycli.

Triples autem heic attenditur motus. Primus Apogæi in consequentia. Hic autem fit, non semper sub Ecliptica, quemadmodum in Sole; non accedendo, recedendoque ab illa, quemadmodum in Luna: sed secundum parallelum Eclipticæ circulum; adeò ut habeat quidem diuersum centrum, sed eundem tamen axem; neque aliam periodum, aut irregularitatem, quàm tribuendam Eclipticæ, cum de Firmamento agatur, obtineat.

Secundus Eccentrici, seu maioris centri Epicycli G, in consequentia; h. e. à B, in C, D, E. Hic autem fit obliquè ad Eclipticam, & ad circulum motus Apogæi; ac secat illorum axem non in centro, sed versus Eccentrici perigæum; unde & maior Eccentrici pars remanet versus Apogæum.

Est verò Diurnus Motus, in Saturno minorum

O



2. In Ioue, minut. 5. In Marte, minut. 31  $\frac{1}{4}$  Et Circuitus totus peragitur, in Saturno, annis Ægyptiis 29, diebus 169. In Ioue ann. Ægypt. 11. diebus proximè 316. In Marte, an. 1. diebus proximè 322.

Tertius epicycli, seu maioris Planetæ in superficie epicycli; & superiore quidem eius parte (secus ac in Luna) in consequentia, ut putà in Q, R, S; inferiore in antecedentia, ut putà in S, T, Q.

Estque dietim, In Saturno, minut. 57. In Ioue, 54. In Marte, ferè 28. Et periodus eius absoluitur, In Saturno, anno 1. & diebus 13  $\frac{1}{4}$  In Ioue, an. 1. & diebus ferè 34. In Marte, annis 2. & diebus ferè 60.

Esto epicycli centrum in V; apogæum epicycli medium X, designatum putà per lineam ex centro mundi: Erit tum linea mediæ motus LZ; linea Veri A $\alpha$ , & arcus VBZ motus Medius; arcus VB $\alpha$  Verus. Et cum linea Veri loci Planetæ existentis in  $\beta$  sit A $\gamma$ , idè Verus Planetæ motus erit VB $\gamma$ .

Cum autem distantia ab apogæo Eccentrici appellari heic quoque soleat non tam Anomalia, aut Argumentum, quàm Centrum Epicycli, illudque aut Medium, ut BZ, aut Verum, ut B $\alpha$ ; tum heic etiam specialiter Argumentum dicitur distantia Planetæ ab apogæo Epicycli; Medium à Medio, ut arcum X $\beta$ ; Verum à Vero, ut arcum Y $\beta$ .

Vt præteream heic eodem modo accipi Prostaphæresin, seu Equationem Centri, arcum videlicet  $\alpha\gamma$ ; & Minuta proportionalia ex diuersitate apparente diametri Epicycli; & tēpus, quo Equationes sunt aut nullæ, aut maximæ; & quo addendæ, aut subtrahen-



da; & si qua sunt huiusmodi; eodem, inquam, modo heic accipi, quo dictum in Luna; vt vel ex ipsa Schematis inspectione intelligi potest.

Quanquam non est existimandum, cum Epicyclus, illiusve centrum ex G, peruénit ad V, Planetam esse solum promotum per superficiem Epicycli ex R, aut Y, in  $\beta$ ; & cum ad H, in  $\delta$ ; & cum ad I, in  $\epsilon$ ; Siquidem priusquam Epicyclus Saturni, v. g. peruenerit ex G, ad I, ipse Planeta Epicyclum totum percurrit proximè quindecies. Quamobrem Planeta eo fine dumtaxat in ijs locis depictus est, ac præterea in  $\zeta$ , cum Epicyclus peruénit ad  $\eta$ , vt mox dicta intelligantur; vtque præterea videas quomodo, cum Epicyclus peruénit ad I, Planeta esse possit in Perigæo Eccentrici, & Epicycli simul.

Quod mirabile interim heic est, ipsa est consensio reuolutionis Planetæ per Epicycli superficiem, cum ipso Sole; siquidem talis reuolutio completur præcisè tanto tempore, quantum est ex vna Coniunctione, aut Oppositione Media cum Sole ad aliam; adeo vt in omni Coniunctione Media, Planeta existat in Apogæo medio Epicycli; & in omni Oppositione, sit in Perigæo; Sicque tantum semper distet Planeta ab Apogæo medio Epicycli, quantum linea Medij loci Solis à linea Medij motus Planetæ; ac subtrahendo proinde Medium motum Planetæ ex Medio motu Solis, Argumentum Medium Planetæ remaneat.

Ex quo licet intelligi, quantò centrum Epicycli circuit tardius Eccentricum, veluti in Saturno, tantò Epicyclum Planetamve in ipso reuolui celerius; Sol

Q ij



nempe Planetam assequitur citius. Ac licet rursus intelligi, medium planetæ motum iunctum motui eius in Epicyclo, æquari Medio motui Solis.

Ad Latitudinem quod spectat; dependet ea quidem ex obliquitate, qua se habet planetæ Orbita, seu Eccentricus ad Eclipticam; sed contingit nihilominus ipsam augeri, vel minui ex inclinatione, obliquationeque Epicycli non fixa, sed mutabili, librati-que.

Vix autem potest Latitudo maxima peruenire, in Saturno quidem, ad gradus 2. & min. 5. aut 6. In Ioue ad grad. 1, & min. itidem 5. aut 6. In Marte demum ad gradus 7.

## CAPVT VII.

*De Theoria duorum Inferiorum Planetarum, Veneris nempe, & Mercurij.*


**H**OS CE duos quoque conjunctim spectamus, propter formam motus communem, qua à memoratis tribus discrepant.

Et primum quidem istis quoque duobus, tam Eccentricus, quàm Epicyclus competunt; verum linea medij motus ipsorum non discedit vnquam à linea medij motus Solis; sed ita est vna, eademque cum ipsa, vt Epicyclorum centra lineæ medij motus Solis veluti illigata sint; neque possint proinde Planetæ longius euagari à Sole, quàm ipsi illorum Epicycli patiuntur; secus profectò, ac Superiores, qui propter diuersas medij motus lineas, etiam ad vsque ipsam



cum Sole oppositionem à Sole discedunt.

Exinde interim fieri constat, vt non alium medium longitudinis motum, quàm Sol habeant; vtque ratione huiusce motus sint semper cum Sole conjuncti; ac eadem proinde periodo, vnus anni scilicet; Excentricum suum vterque percurrant. Quæ omnia intelligi, vel ex sola huius figuræ inspectione possunt.





Et conueniunt quidem rursus cum Superioribus, vt in superiore Epicycli parte, secundum; in inferiore, contra successione Signorum moueantur: Ac rursus, vt habeant in ipso Epicyclo Apogäum tam medium, quam Verum, à quo ad ipsorum vsque corpora accipiat, numereturve Argumentum tam medium, quam verum; Et pari proinde ratione Prosthaphæresis, æquatiove tam centri, quam argumenti; adhibitis quoque minutis proportionalibus vsurpetur: Verum differunt, quòd donec versantur non modò in Apogæo, sed etiam in Perigæo, sint cum ipso Sole coniuncti; vti vel ex eadem figura mox adhibita intelligitur.

Quod superest autem, Veneris Theoria non alia est à Theoria trium Superiorum; quippe ex iisdem, orbibus constat, Eccentrico nempe, ac Epicyclo, & Æquante. Quare & eadem vti Figura, quæ pro illis est vsurpata licet; Si modò lineam mediū motus Solis, vna transferri, & transire semper per Epicycli centrum concipiamus.

Mercurii verò Theoria eo solùm differt, quòd inter duos orbeis crassos, Eccentricosve secundum quid, concipiant alios duos itidem inæqualeis; & inter duos illos collocent Æquantem; inter duos istos Deferentem Epicyclum, seu Eccentricum propriè appellatum; cuius centrum mobile sit in superficie circelli attingentis Diametro sua centrum Æquantis, & centrum mundi; eo penè modo, quo de centro Eccentrici Lunæ in superficie circelli circumducto declaratum est; vnde neque noua Figura heic videtur opus.



Prætereo porrò motum Veneris in Epicyclo esse dietim grad. 1. min. 36. ac totam proinde ipsius Periodum absolui intra dies proximè 225. seu menseis 7. cum semisse: vtcùmque ob Solem interim progressum, non appareat nobis conjuncta iteratò in Apogæo, aut iteratò in Perigæo, nisi post 19 menseis.

Mercurij autem motum in Epicyclo esse dietim grad. 4. min. 5.  $\frac{1}{4}$  ac Periodum ipsius absolui intra dies proximè 88, seu treis propè menseis; vtcùmque ab vna conjunctione Apogæa cum Sole ad Apogæam aliam, aut à Perigæa ad Perigæam, non-nisi post 4. ferè menseis redeat.

Quod ad Latitudinis motum spectat; oritur is etiam partim ex obliquitate Eccentrici, partim ex inclinatione Epicycli; & ea quidem vtriusque contemperatione, vt in Venere maior sit Latitudo ad Boream, in Mercurio maior ad Austrum; & in Venere quidem Latitudo interdum ad 9. gradus perueniat; in Mercurio autem non ampliùs, quàm ad quinque.

## CAPVT VIII.

*De Theoria Firmamenti, & super-exstructi vnus, alterius-ve Crystallini.*

**D**ENIQUE, vt & pauca quædam de Firmamento attingamus, ac simul quæ allata de ipso Phænomena sunt, explicentur; Sciendum est imprimis, quandiù nullus fuit circa Stellas Fixas, præter diurnum, obseruatus motus, tandiù Firmamentum,



cui illæ inhaerent, fuisse habitum pro extimo Cælo, seu Mobili primo; vti Aristotelis æuo, & sequentibus sæculis, ad Hipparchum, & Ptolemæum vsque. Ex quo autem ipsæ quoque Fixæ deprehensæ sunt in consequentia promoueri; tum Nonum cælum cœpisse addi, quod esset Primum mobile, cuiusve diurnus motus esset proprius; & Firmamentum habitum pro Secundo mobili, cuius motus ille in consequentia specialis foret. Nimirum, quod duo per se motus vni mobili non competere crederentur; veluti suprà attigimus.


Porro quia hic motus adnotatus fuit inæquabiliter peragi, ac etiam, iuxta aliquos, interdum retrogradus esse; ac obseruatum aliunde est, Eclipticam vnà cum Fixis sic mutare situm, vt illius Obliquitas, atque adeò Declinatio Solis maxima, euaderet nunc maior, nunc minor (quippe quæ tempore Ptolemæi, aut paullò antè, fuit maxima, vt putà grad. 23. minut. 52. Ea deinceps ita decreuit, vt superiore sæculo credita minima, exstiterit grad. 23. min. 28) Idcirco cœpit superaddi cælum Decimum, quod esset Primum mobile; ac retineri simul cælum Nonum, dictum plarisque Crystallinum, cui ille in longum, seu in consequentia motus tribueretur; ipsi autem Firmamento assignatus est motus, quem Accessus, & Recessus; ac Trepidationis, Alphonsini præsertim dixerunt.

Nempe assignata vt mobili Primo, ita Nonæ sphaeræ Ecliptica immobili, fecere ipsam Firmamenti Eclipticam variabilem, seu ita luxatam in superficie duorum circellorum circa puncta Æquinoctialia descriptorum,



scriptorum, vt exinde duplex huiusmodi irregularitas crearetur. Res operosè declaratur; sed ne tot implicemur tricis, ac in re præsertim, quæ fortè non admodum firmo fundamento innititur; conemur dumtaxat eam percipere ex translatis circellis, facilitatis gratiâ, circa ipsa Solstitialia puncta.

Sunto in sequente Figura ABCD Colurus Solstitionum in Nona Sphæra; A, & C Initia ☊, & ☋ in eadem; EFGH, & IKLM circelli ipsis circum-



ducti; E, & I, Initia ☊, & ☋ in Octaua sphæra, dum Ecliptica ytriusque Sphærae coincidit, & obli-

P.



quitas minima est. Intelligatur punctum E procedere versus F, ad Boream; & punctum I versus M, ad Austrum; tum & crescet obliquitas, quovsque sit maxima ad F, ac M; & Ecliptica Octauæ sphaeræ facta promotior versus ortum, euadat FM. Intelligantur eadem puncta procedere ab F in G, ab M in L; tum & decrescet obliquitas, quovsque sit minima, & Ecliptica Octauæ facta adhuc promotior in ortum, coëat cum Ecliptica Nonæ. Intelligantur eadem pergere à G in H, ab L in K; tum & crescet iterum obliquitas, quovsque fiat maxima in H, & K, & Ecliptica Octauæ in occasum regressa euadat HK. Intelligantur denique eadem pergere ex H in E, ex K in I; tum & decrescet iterum obliquitas, quovsque fiat minima, & Ecliptica Octauæ adhuc magis in occasum regressa coëat iterum cum Ecliptica Nonæ.

Atque hæc omnia quidem ea ratione, vt cum Nonæ sphaera moueat Eclipticam Octauæ continenter, & æquabiliter versus ortum; ipsa tamen Ecliptica Octauæ luxatione hac sua huiusmodi motum irregularem reddat; ac velociorem faciat cum vterque motus conspirat in ortum; memoratis nimirum punctis procedentibus per medietates circellorum EFG, & IML: segniorem autem, cum alter motuum in occasum est; iisdem videlicet punctis procedentibus per medietates oppositas GHE, & LKI.

Denique autem visum est ex Nono illo cælo duos facere, & ipsum Primum mobile in Vndecimum locum relegare; ac ipsi quidem Firmamento motum Longitudinis, tanquam ipsi proprium restitue-



re; motum verò Trepidationis partiri in duas Librationes, quarum vna ab occasu in ortum, ab ortu in occasum attribueretur Nonæ sphaeræ; altera à Borea in austrum, ab austro in Boream attribueretur Decimæ; Sicque prior faceret illum Longitudinis motum nunc velociorem, nunc tardiorē; & posterior nunc maiorem, nunc minorem Obliquitatem.

Itaque solet iam Firmamento motus ille in consequentia, Longitudinisve attribui, qui ab usque Copernico Præcessio, seu Anticipatio Æquinoctiorum appellatur; quòd ille, ob motum Terræ attributum, existimârit non tam stellas Æquinoctia immota prætergredi, tendendo versus consequentia; quàm ipsa Æquinoctia stellas immotas deferere, tendēdo versus præcedentia. Solet & Nonæ sphaeræ tribui illa Libratio, quæ ideò vocatur Anomalia Præcessionis Æquinoctiorum, quòd motum Præcessionis Æquinoctiorum inæqualem faciat; ac solet demùm Decimæ attribui Libratio, quæ Anomalia Obliquitatis Eclipticæ ideò dicitur, quòd Obliquitatem Eclipticæ non semper eandem esse patiatur.

Et Motus quidem Firmamenti, seu Octauæ sphaeræ peragitur lentissimè super polis Eclipticæ; siquidem iuxta Ptolemæum, circuitum vnum non peragit, nisi intra annorum 36. millia: vt putà vnum tantum gradum intra annos centum conficiens; tametsi successio temporis nos docuit peragere potiùs intra annorum proximè 25. millia: vt putà vnum intra annos 70. gradum absoluens; vtcùmque aliunde

P ij



Alphonfini statuerint circuitum non peragere, nisi intra mille Iubilæa, seu millia annorum 49.

Motus verò Nonæ sphæræ fit quidem super iisdem polis; at non circuitum perficiendo, sed leuiter solum librando. Nam postquam Sphæra progressa est versus ortum per duos gradus, cum trientē, hoc est gradum 1. min. 10. citra, & grad. 1. min. 10. vltra Æquinoctialia puncta; reditus ab ortu in occasum fit: atque id quidem etiam per quā lentē; Nam vna Libratio eundo, redeundōque peragitur solum intra annos 1700.

Motus denique Sphæræ Decimæ habens pro suis quasi polis ipsa Æquinoctialia puncta, secundum colurum Solstitiorum peragitur, libratione adhuc minore; nempe per minuta non plura, quā 24. quorum sint 12. citra, 12. vltra Solstitialia puncta, habita quasi fixa in ipso primo mobili; ac præterea duplō lentiore; cum vna Libratio percuratur solum intra ter mille, & 400. annos.

Ac circelli quidem heic etiam describuntur, ad explicandum quomodo Librationes sub medium celeriores, sub principium, ac finem lentiores appareant; sed, vt tunc adnotabitur, cum quemadmodum rem Copernicus declarauerit, attingetur; videtur res esse magis commentitia, quā vt scrupulosius illam prosequamur.



## CAPVT IX.

*Quare Planeta nunc Majores, nunc Minores appareant.*

**N**UNC quemadmodum ea Phænomena, quæ sunt initio commemorata, quæque magna ex parte Passiones planetarum vulgò dicuntur, ex Hypothesi, Theoriisque iam recensitis explicentur; difficile dictu admodum non est.

Ac illa quidem primùm prætereo, quæ ex deductis superiore libro abundè satis intelliguntur; cuiusmodi sunt, Obseruari Solem, aliosque planetas nunc heic, nunc illeic oriri, & occidere; nunc altiùs, nunc humiliùs in meridianum euehi; cæteros à Solis splendore nunc occultari, nunc reuelari, aliâque similia.

Cætera vt attingam; videtur imprimis nihil esse mirum, si planeta interdum Maiores, interdum Minores appareant. Siquidem, cùm in Apogæis sint longè à terra, quàm in Perigæis distantiores; necesse est illeic sub minore specie, heic sub maiore repræsententur.

Nihil necesse est admonere, non esse heic quæstionem de specie, quæ propter vapores iuxta horizontem increfcit, quæque decrefcit, prout Sidera sublimè attolluntur; quippe heic agimus de specie, quæ in eadem planetæ supra horizontem altitudine, etiam meridiana, apparet.

Ac in superioribus quidem planetis res est facilis obseruatu, manifesta que admodum. Nam quoties Soli opponuntur, idcirco maximi apparent, quòd in

P iij



Perigæis sint Epicyclorum: ne memorem ipsorum speciem tantò adhuc magis incrementum, quantò magis Epicyclus ad Eccentrici perigæum accedit. Mars certe speciatim, qui aliàs vix stellæ secundæ magnitudinis exæquatur, in oppositione tamen, siue dum Acronychus est, ac utròque potissimum perigæo concurrente, ea euadit specie, ut Iouis, atque Veneris magnitudinem æmuletur.

Facilis verò etià est in duobus inferioribus, Venere puta, ac Mercurio: sed Venere potissimum; quippe quæ versus perigæum, etiam interdiu, ac sub ipsum meridiem facillè videatur. Quamobrem autem non perinde videatur, cum versus Apogæum est, etsi eius species per noctem non esse minor appareat, intelligendum est ex infra dicendis, ubi de eius cornibus.

In Luna res est paullo difficilior: obseruauimus ipsi tamen eius diametrum, dum est tam in Eccentrico, quàm in Epicyclo Perigæa, esse minorum 31. secundorum 6. Et cum Apogæa, minorum 26. ac 36. secundorum: utcumque alij ipsam ad tantam exilitatem non deducant.

In Sole difficillima; sed ipsi tamen illius quoque diametrum obseruauimus, dum Perigeus quidem est, minor. 31. secund. 6. quantam nempe ipsius Lunæ; Et cum Apogæus, minut. 30. secund. 12; planè ut non integrum omnino minutum intersit.



## CAPVT X.

*Quare nunc Veloces, nunc Tardi.*

**P**ARI ratione mirum non est, si Planetæ incedere nunc ocyus, nunc segniùs appareant. Videlicet tametsi ipsi suis in Eccentricis, & Epicyclis æquabili motu incedant, vti & incedere nobis apparerent, si quemadmodum dictum est, in eorum centrīs existeremus; necesse est tamen obseruemus ipsos ferri inæquabiliter, quòd ipforum motum ex centro alieno spectemus.

Heinc in Sole, exempli gratiā; cū linea Mediarum longitudinum Eclipticam nobis in duas æqualeis partē diuidens, sic Eccentricum dirimat, vt quæ eius portio versus Apogæum est, maior eā sit, quæ versus Perigæum; idcirco necesse est Sol appareat nobis percurrere alterum Signorum dimidium tempore prolixiore, quā alterum; atque ea de causa vno tempore incedere lentius, quā alio; sicque inæquabiliter ferri; & tardissimè quidem in Apogæo, velocissimè in Perigæo.

Et quia Solis Apogæum subest hisce temporibus, vt iam antè attigimus, initio gradus septimi Cancrī; ac Perigæum ad eò initio gradus Septimi Capricorni; heinc apparet causa, cur ea anni portio, quæ est ab Æquinoctio verno in autumnales transeundo per æstatem, sit nouem diebus longior illā, quæ ab autumnali in vernum, transeundo per hyemem. Ni-



mirum portio Eccentrici percurrenta est per illam  
quàm per istam, maior.

Atque exinde est, cur cùm Sol obseruetur medio  
tempore conficere dietim motu apparente minuta  
59; in Apogæo tamen conficiat solum 57. & in Peri-  
gæo 61; ut supra quoque est adnotatum.

In Luna res secus se habet. Nam quia centrum  
Epicycli non mouetur regulariter super centro Ec-  
centrici, sed super centro Mundi, quod versus Peri-  
gæum semper est; idcirco necesse est ipsum in Apo-  
gæo Eccentrici ferri apparere velocius, quàm in Peri-  
gæo; videlicet illeic maiores portiones Eccentrici  
competunt arcibus Zodiaci æqualibus, quàm heic.  
Quod idem proportionem dicendum est de motu Lu-  
næ in Epicyclo, quatenus mouetur regulariter non  
super centro proprio, sed super puncto, quod oppo-  
nitur ipsius Eccentrici centro.

Exinde verò causa est, cur tametsi Luna tam in  
Coniunctione, quàm in Oppositione cum Sole Apo-  
gæa sit; celerius tamen tunc moueri appareat, quàm  
dum fuerit in Quadraturis Perigæa.

Causa etiam est, cur cùm Luna mediocri motu  
appareat conficere dietim circiter gradus tredecim;  
interdum tamen conficere non omnino undecim;  
interdum ultra quindecim appareat.

De Planetis cæteris alia quàm de Luna, est ratio.  
Nam licet moueantur regulariter non circa centra  
Eccentricorum, sed circa centra Æquantium; ista  
tamen Æquantium centra sunt respectu nostri, siue  
centri Mundi, ultra centra Eccentricorum; atque  
idcirco



idcirco necesse est, vt moueri tardiùs circa Apogæa, quàm circa Perigæa appareant.

## CAPVT XI.

*Quare nunc Directi, nunc Retrogradi, nunc Stationarij.*

**H**Æc affectio competit solùm quinque Stellis Errantibus, quatenus in partibus variis Epicyclorum suorum versantur.

Nam quia Planeta in superiore Epicycli parte imitatur motum ipsius Eccentrici, centriue Epicycli, qui est semper in consequentia; heinc fit, vt duplicato motu Planeta velut dirigatur, seu secundum seriem Signorum suum cursum intendat, & per ipsum quidem Apogæum ocysimè; heinc, inde autem tantò segniùs, quantò ampliùs ab ipso abest.

Et quia in inferiore parte aduersatur motui Eccentrici, ac celerius fertur per Epicyclum in antecedentia, quàm deuehatur ab Eccentrico in consequentia; inde fit, vt retrogredi, seu contra Signorum successionem moueri appareat; ac per ipsum quidem Perigæum citissimè; heinc, inde tantò lentius, quantò longiùs ab eo versatur.

Quia demùm in parte epicycli descendente, seu orientali, & qua parte ex Directo Retrogradus fit; ac in ascendente, seu occidentali, qua ex Retrogrado fit Directus, hære videtur, & eundem sub Fixis quodam tempore locum occupare; heinc est, cur vtroque stare, seu Stationarius fieri dicatur; & in

Q




descendente quidem parte esse dicatur Statio prima; in Ascendente verò Statio secunda; cùm in Venere, & Mercurio illa prætereà Matutina, ista Vespertina vocetur.

Et mouetur tunc quidem Planeta, perinde ac aliàs, æquabiliter per Epicyclum; sed non percipit tamen oculus illius progressum; quòd motus tunc fiat oculi respectu secundum rectam quasi lineam ab ipso protensam, non secundum ductum transversum, vt idè possit animaduerti.

Non sunt autem Stationes in maximis ipsis Planeta à Sole Elongationibus, designatis per duas lineas, ab oculo, aut centro Mundi ductas, & Epicyclum heinc inde contingenteis; sed infra ipsas. Ex quo fit, vt arcus Retrogradationis minor semper sit arcu Directionis: cùm & aliunde arcus Retrogradationis tantò breuior sit, quantò motus Eccentrici motui Epicycli ampliùs detrahit; arcus Directionis tantò productior, quantò motus Eccentrici motui Epicycli ampliùs addit.

Quæ omnia intelligi vt possint, attendendum solum est ad Schemata in ipsis Errantium Stellarum Theoriis allata; aut etiam dumtaxat inspiciendum in hoc, in quo centrum Mundi, seu spectatoris oculus A; Zodiacus secundum signorum successionem BCD; Eccentricus EFG; Epicyclus E H G I: contingentes, seu maximarum Elongationum lineæ AB, AD; Arcus Directionis E H G; Retrogradationis G I E; Statio prima K; Statio secunda L.





Interim ex ijs, quæ mox dicta sunt, & ex ijs, quæ de singulorum Planetarum motibus tam in Eccentricis, quàm in epicyclis antè attigimus, intelligitur fieri; vt ex tribus quidem Planetis Superioribus, non Retrogrediatur Saturnus, nisi 7. gradibus; aut aliquantò plus; Iupiter, nisi 10; Mars, nisi ad summum 20 (interdum enim, nisi 12.) Ex duobus autem Inferioribus, Venus Retrogrediatur circiter 16. aut 17; Mercurius interdum tantumdem; interdum circiter yndecim.

Præterè verò, cùm in istis duobus Coniunctio cum Sole sit media inter duas Stationes; esse in illis

Q ij



tribus Oppositionem mediam; & dum Stationes celebrantur, distare à Sole, Saturnum quidem, vltra quadrantem circuli; Iouem, triente; Martem, vltra trientem.

Præterea & , cùm ex ijs duobus plures sint Stationes Mercurij, quàm Veneris, quoniam longè citiùs percurrento Epicyclum, sapiùs heinc inde à Sole fit; Ex tribus superioribus opposito modo, plures sunt Saturni, quàm Iouis, & huius, quàm Martis; quoniam cùm Saturnus sit tardior, quàm Iupiter, Sol ipsum citiùs assequitur; & pari ratione cùm Iupiter sit tardior, quàm Mars, Sol assequitur quoque ipsum citiùs.

Dixi porrò hanc affectionem competere solum 5. Stellis Errantibus; quoniam Sol quidem non mouetur per Epicyclum, sed per Eccentricum dumtaxati in quo proinde potest quidem videri vno tempore moueri tardiùs, quàm alio; at non propterea vnquam retrogrèdì, aut stare; Luna verò mouetur quidem per Epicyclum, & superiore quidem parte contra successionem Signorum; at quoniam motus Eccentrici (seu centri Epicycli per Eccentricum) est longè velocior, quàm motus Lunæ per Epicyclum; atque idcirco Luna tunc quoque velociùs deuehitur ab eccentrico in consequentia, quàm reuehatur per Epicyclum in antecedentia; heinc fit, vt tardiùs quidem moueri; at non propterea stare, regredive appareat.



## CAPVT XII.

*Quid Parallaxis, ob quam Planetae altiores, aut humiliores indicantur.*


**P**ARALLAXEOS nomine intelligitur heic non quavis commutatio; sed commutatio Visus, quæ appellatur etiam Visus aberratio, & Adspetus diuersitas; ac describi solet, Differentia inter verum, & visum locum alicuius Astri.

Verus porrò locus alicuius Astri est punctum in Firmamento, aut supremo cælo; ad quod terminatur recta linea ex centro Terræ, siue Mundi, per ipsum Astri centrum traducta. Visus autem locus est punctum in eodem, ad quod terminatur recta linea, quæ ex oculo, per idem Astri centrum traducitur. Vnde & quia ista duo puncta incidunt in eundem verticalem circulum; definiri quoq; Parallaxis solet, Arcus verticalis, qui intercipitur inter verum, & visum locum.

Esto v. c. A centrum Terræ, vel Mundi; C B D Terræ superficies; B oculus; E F G verticalis in Firmamento, seu supremo cælo. Astrum sit imprimis in Horizonte sensibili H; tunc Verus locus erit I, terminans nempe lineam A I: Locus Visus K, terminans putà lineam B K; & arcus I K Parallaxis; scilicet discrimen inter ytrumque locum.

Q iij





Quòd si deinde Aſtrum eleuatum fuerit ad L; conſtat Parallaxin eius fore M N; Si ad O, Parallaxin fore P Q; & ita de cæteris locis.

Vbi interim adnota Parallaxin horizontalem eſſe maximam; ac ipſam, aſcendente Aſtro, ſic decreſcere, vt ſi Aſtrum ad verticem R peruenerit, nulla demùm ſit Parallaxis futura; quòd lineis veri & viſi locorum in vnã coeuntibus, idem futurus ſit Verus, ac Viſus locus.

Adnotare verò etiam licet, quòd aliquod Aſtrum eſt Terræ propinquius, eò maiorem ipſi Parallaxin creari. Nam Aſtrum, v. c. in S; hoc eſt in eadem horizontali linea cum H, creat Parallaxin T K; in V, hoc eſt in eadem veri loci linea cum L, creat Parallaxin N X; in Y, hoc eſt in eadem cum O, creat Parallaxin Q Z.

Quin adnotare etiam oportet angulum, qui ſit in centro Planetæ ex lineis Veri, ac Viſi locorum, & cui ſemidiameter Terræ opponitur, qualis eſt v. c. angulus A H B, aut A L B, &c. ipſum propriè eſſe,



qui & dicitur Angulus, & est mensura, Parallaxeos. Nimirum prout ipse est aut magnus, aut paruus, aut nullus; arcus quoque ille, qui Parallaxis dicitur, magnus, paruus, aut nullus est.

Prætereo porrò esse aliam quandam Parallaxeos speciem, quæ in Luna attenditur, & tam secundum longitudinem, quàm secundum latitudinem fit. Ea nempe non attenditur in verticali circulo; sed aut in ipsa Ecliptica, quam circuli latitudinum veri, ac visi locorum in diuersis partibus intersecant, arcumque intercipiunt Longitudinis Parallaxin dictum: aut in circulo ad Eclipticam recto, quem intersecant duo circuli per loca verum, & visum ducti, Ecclipticæque paralleli; & intercipientes arcum, qui Parallaxis Latitudinis appellatur.

## CAPVT XIII.

*Quæ sit proinde singulorum, & Fixarum etiam, à Terris distantia: quisque adeò Cælorum ordo.*

**C**VM, quò major est Parallaxis, eò res visa propinquior sit; quò minor, eò distantior: idcirco in eo sunt Astronomi, vt Parallaxes Siderum, sintne, & quantæ sint, obseruent, quò de ipsorum propinquitate, aut remotione à Terra pronuncient.

Enim-verò, cùm in ipsa Luna Parallaxis fiat admodum sensibilis (videlicet Horizontalis integrum etiam gradum excedit) in cæteris nihilominus res est subtilis adeo negotij, vt verisimilitudinem non excedat.



Quippe in Mercurio, Venere, Sole, Marte, difficillimè aliqua notatur; In Ioue, ac Saturno vix vlla est; & ad Fixas quod attinet, eæ sunt longè euectiores, quàm vt vllam penitus prodant.

Non memoro causam huius rei esse, quam suprà insinuauimus; quòd Terræ nimirum Semidiameter, quæ & pro communi mensura, & quasi pro duarum stationum dimensoriarum interstitio accipitur, sensibilem quidem rationem ad Lunæ distantiam obtineat: ad cæterorum autem distantiam, adeò exilem habeat, vt ferè, aut etiam prorsus euanescat; quasi Terra iam velut punctum sit; nihilque intersit, Siderus aliquod ex Terræ superficie, aut ex eius centro spectetur.

Vt hoc tamen loco Siderum distantiam, quam ex mente Ptolemæi, Albategnius præsertim, & Alphraganus deduxerunt; aliiq; amplexi sunt, proponamus; quoniam illa per repetitas Terræ semidiametros explicatur; ideò attingendum est paucis, quanta-nam Terræ semidiameter sit.

Cùm ergo, licet variæ de ambitu Terræ opiniones sint, nobis tamen propemodùm constet, esse ipsam milliariū Italicorum 26255, quòd in maximo ad Terræ superficiem circulo respondeant vni gradui milliaria proximè 73; ea de causâ, tum Diameter Terræ erit milliariū Italicorum 8354; tum Semidiameter milliariū 4177.

Suppono autem, vt rem tritam, Milliare dici, quòd mille passus ( seu Stadia 8 quæ singula sunt 125 passuum ) contineat; & Passum intelligi Geometricum ( seu



( seu duplum vulgaris ) quinque scilicet pedes continentem; Pedem verò etiam Geometricum intelligi; & talem quidem, qui minor sit Parisino, seu Regio vocato, vna decima quam-proximè parte. Scilicet diuiso Parisino pede in mille particulas, deprehendimus Romanum antiquum continere ex illis non-gentas, & quatuor.

Vsurpo verò Italicum milliare, potiusquàm Leucam Gallicam, quòd mensura constantior sit. Tamen si, cùm Leuca Gallica mediocris contineat plus minus tria milliaria Italica, nihil veter allatas mensuras sic reducere, vt ambitus Terræ censeatur continere Leucarum Gallicarum 8752: Diameter 2785: Semidiameter 1392.

Vt cùmque sit; ecce distantiam, quam Arabes illi ex Ptolemæi principiis, non modò circa Solem, & Lunam; verùm etiam circa quinque Erranteis stellas, ac Fixarum quoque Sphæram, deduxerunt. Intelligenda verò est in ipsis planetis distantia mediocris, acceptave, cùm ij versantur circa longitudines medias; alioquin enim in apogæo longius, in perigæo propiùs distant.

|  |            |  |       |
|--|------------|--|-------|
| Distantia<br>mediocris,<br>qua absunt<br>à Terra | Luna,      | est terrena-<br>rum semi-<br>diametro-<br>rum. | 49    |
|  | Mercurius, |  | 115   |
|  | Venus,     |  | 618   |
|  | Sol,       |  | 1165  |
|  | Mars,      |  | 4584  |
|  | Iupiter,   |  | 10423 |
|  | Saturnus,  |  | 15800 |
|  | Fixæ,      |  | 19000 |
|  |            |  | R     |



Interim verò ex ipsa serie, qua istæ distantia in-  
crescunt, comprobatus manet, qui Cælorum ordo in  
huiusce Institutionis Procœmialibus propositus est;  
saltem ad usque cælum Fixarum; nam quod de cæ-  
teris dici potest, id attigimus circa Theoriam Firma-  
menti.

Ac solent quidem aliæ nonnullæ, præter Paralla-  
xin, rationes afferri comprobando huic ordini; ve-  
rùm illæ aut sunt fallaces, ut quæ ex umbris petitur  
(falsum est enim breviorē umbram à luminoso cor-  
pore distantiore projici, si in eadem supra horizon-  
tem altitudine, hoc est eodem gradu, accipiatur, quo  
propius) aut à decoro assumptæ, non perinde suadent;  
ut dum consentaneum esse perhibent, Solem, qui  
princeps omnium sit, solium in medio obtinere.

Hæc certè ratio neque Platonem, neque Aristote-  
lem mouit, qui ut Lunam in infimo, sic Solem in  
loco succedente collocârunt. Non mouit item Ana-  
ximandrum, aut Metrodorum Chium, qui Solem in  
supremo; Lunam in sequente; stellas Erranteis in lo-  
cis succedentibus; Inerranteis in infimo habuerunt.  
Non item alios, qui alias, aliasque Soli, cæterisque se-  
deis assignârunt.

Et dicendum quidem hoc loco videretur, quem-  
admodum probabile sit Mercurium, & Venerem ita  
Soli circumduci, ut aliquando quidem inferiores,  
propioresque; sed & aliquando etiam superiores, di-  
stantioresque à Terra sint, quàm Sol: verùm res est  
intelligenda ex ipsis tam Copernici, quàm Tychonis,  
Systematibus sequente libro proponendis, cum heic



referamus dumtaxat communem, Ptolemaicamque sententiam.

## CAPUT XIV.

*Quæ item eorundem, & Fixarum sit (sed habitis simul apparentibus diametris) vera Magnitudo.*

**Q**UIA ex supposita distantia, & observata apparente visibilis rei diametro, iudicare licet de vera illius tum diametro, tum superficie, tum crassitudine, corporeave mole: eapropter, ubi, præter distantiam, adnotarunt etiam, illi iidem Astronomi, quantæ cuiusque Sideris diameter apparens, seu visibilis foret; pronunciârunt etiam quæ foret Sideris cuiusque vera Magnitudo.

Cæterum videtur id quoque negotium longè difficilius, quàm reputari soleat; definire, quæ sit habenda Sideris cuiusque diameter apparens. Nam Sol quidem suo splendore seu spectetur ipse, seu aliâ industriâ eius diameter exploretur, negotium facit maximum; aliorum verò Astrorum disci nunc maiores, nunc minores (etiam in eadem à terris distantia, ac in ea supra horizontem altitudine, quæ sit refractione immutis) apparent, prout oculus eos spectat ex variis lucis, tenebrarumque gradibus: tantò siquidem maiores videntur, quanto sunt tenebræ densiores; & ne lux quidem, qua apparent exilissimi, illos, quantum par est, deminuit; ut nobis quidem constat.

Sanè, ne illud repetam, quod de observatis à nobis

R. ij



Solis ac Lunæ diametris apparentibus est iam antè dictum; ac ne aliquid etiam heic subijciam de cæteris; adnoto dumtaxat diametrum Mercurij, quæ alioquin apparet, haberique solet minorum duorum, aut trium, fuisse à nobis obseruatam triente minuti non maiorem; idque, cùm hac in Vrbe, anno 1631, & die Nouembris 7. manè, in ipso Solis disco apparuit, ac suâ se vmbellâ, citra telescopium, in papyro pinxit, potuitque eius diameter cum diametro Solis comparari impunè. Prætereo autem illum exiisse è margine occiduo Solis (fuit enim retrogradus) hora 10. cùm minutis 28. latitudinem Boream assequutum minorum 6. secund. 20.

Enimverò, quia, vt iam monuimus, Ptolemæi, Sectatorumque sententiam heic referrimus; ecce imprimis quantas diametros apparenteis habuerint; & maximè quidem sub mediocrem illorum à Terra distantiam.

|                      |          |                      |                  |
|----------------------|----------|----------------------|------------------|
| Diameter<br>apparens | Lunæ     | } est minu-<br>torum | 33 $\frac{1}{2}$ |
|                      | Mercurij |                      | 2                |
|                      | Veneris  |                      | 3                |
|                      | Solis    |                      | 31 $\frac{1}{2}$ |
|                      | Martis   |                      | 1 $\frac{1}{2}$  |
|                      | Iouis    |                      | 2 $\frac{1}{2}$  |
|                      | Saturni  |                      | 1 $\frac{1}{2}$  |

Circa Fixas autem nihil definierunt, nisi quòd Albategnius stellis Magnitudinis primæ vnus minuti, ac semissis (seu quantam & Marti) diametrum attribuit.

Deinde verò ex habita Sideris cuiusque distantia,



ac visibili diametro, obtinere diametrum veram; eamque cum diametro Terræ comparantes, cubicęque multiplicantes, Sideris cuiusque crassitudinem, corpuse ita deduxerunt, vt quantum à corpore Terræ excederetur, aut ipsum excederet, designauerint. Designatio autem, quod ad Planetas spectat, huiusmodi fuit.

|      |           |           |   |       |
|------|-----------|-----------|---|-------|
| Sunt | Luna      | } minores | { | 39    |
|      | Mercurius |           |   | 19000 |
|      | Venus     |           |   | 28    |
|      | Sol       | } majores | { | 167   |
|      | Mars      |           |   | 1.    |
|      | Iupiter   |           |   | 81    |
|      | Saturnus  | } vicibus | { | 79    |
|      |           |           |   |       |

Quod ad Fixas verò, arbitraria quadam assumptione, huiusmodi.

|                           |     |           |   |     |
|---------------------------|-----|-----------|---|-----|
| Sunt Fixæ<br>Magnitudinis | I   | } majores | { | 108 |
|                           | II  |           |   | 90  |
|                           | III |           |   | 72  |
|                           | IV  |           |   | 54  |
|                           | V   |           |   | 36  |
|                           | VI  |           |   | 18  |

Atque hoc quidem potissimum iuxta Alphraganum; alioquin enim Albategnius habens stellas I magnitudinis vicibus 102. majores, quàm Terram, & stellas VI sexdecim; docet ex Mundanis corporibus secundum magnitudinem spectatis, primo loco esse Solem; secundo stellas Fixas I magnitudinis: tertio Iouem; quarto Saturnum; quinto Fixas cæ-

R iij



teras; sexto Martem; septimo Terram; octauo Venerem; nono Lunam; decimo Mercurium.

## CAPVT XV.

*Qui Planetarum Adfectus sint.*

**P**LANETARVM Adfectus, quos Græci, <sup>Σχηματισμοίς</sup> Latini appellant *onfigurationes*, nihil aliud sunt, quàm mutuæ habitudines, quibus planetae se inuicem, quatenus sunt in variis Zodiaci partibus constituti, respiciunt.


Et quia numerus duodenarius, quo Zodiaci Signa distinguuntur, sortitur aliquotas partes, Semissem 6, Trientem 4, Quadrantem 3, Sextantem 2: ea de causa, si planeta vno constituto in certâ Zodiaci parte, alius ab eo distet per semissem, sitque proinde è regione, dicitur esse inter illos adfectus Oppositus, siue Diametralis; si per trientem, Trinus; si per quadrantem, Quadratus, si per sextantem, Sextilis.

Et videbatur quidem prætereà assignandus adfectus, qui Vncialis diceretur; quatenus Vnitas 1, est etiam aliquota duodenarij pars; & potest etiam vnus planeta abesse ab alio per vnâ duodecimam Zodiaci partem: at talis adfectus admitti non solet, & vice illius admittitur alius, qui quasi cyphræ 0. attribuatur; cùm nimirum vnus planeta nihil distat ab alio, sed illi quasi coniungitur; vnde & dicitur adfectus Coniunctionis.

Res intelligenda est ex hac Figura, in qua, consti-



tuto planeta vno in principio v.c.  $\gamma$ , patet, si alius sit constitutus in principio  $\sim$ , Oppositionis adspcetum esse: si in principio  $\Omega$ , aut  $\Rightarrow$ . Trinum: si in principio  $\ominus$ , aut  $\times$ . Quadratum; si in principio  $\pi$ , aut  $\approx$ . Sextilem. Si denique in principio  $\gamma$ , adspcetum Coniunctionis; vt & inscriptæ lineæ demonstrant, & characteres, quibus solent singuli adspcetus depingi; vt putà  $o-o$ ,  $\Delta$ ,  $\square$ ,  $*$ ,  $o-$



Porro, cum Adspcetus solus Coniunctionis Syzygia dici mereatur; solet tamen vox etiam tribui & Oppositioni, & Adspcetibus cæteris, abusu quodam ampliacionis.



Prætereo autem solere adspectum aliquem dici Partilem, cum planeta vnus distat ab alio exquisitè, per aliquotam partem; Platicum verò, cum aut minuta aut gradus etiam aliqui defunt. Et cum Partilis speciatim Coniunctio ea sit, qua planetae sunt in eadem Longitudine; eam conjunctionem dici Centralem, & Corpoream, qua iidem existunt quoque in eadem latitudine, & inferior supponit suum centrum centro superioris, corporeque suo eius corpus regit. Quod idem proinde proportionem est de quovis planeta, tanquam inferiore, respectu Fixarum, quibus applicatur, dicendum.

Prætereo item hosce adspectus factos esse potissimum celebres apud Astrologos, qui ipsis tribuunt vim maximam tum in ciendis variis aëris mutationibus; tum in moderandis hominum fortunis; docentes, præter cætera, Oppositionem, & Quadratum adspectus esse maleficos; Trinum, & Sextilem Beneficos; Coniunctionem indifferentem.

Prætereo rursus, admissis solum quinque illis Adspectibus; constare Venerem, & Mercurium referri ad Solem non posse, alio Adspectu, quam Coniunctionis; cum illa quidem, vix vnaquam, plusquam sesqui-signo; hic, ne signo quidem integro ab ipso recedat.

Prætereo insuper Kepplerum induxisse nuper Adspectuum genera longè plura; nempe Semi-sextum, seu Duodecilem, Decilem, Octilem, Quintilem, &c: quatenus attendit non posse ex iis solis quinque admissis, rationem reddi mutationum omnium in aëre obseruatarum.

Præ



Prætereo demum quas speciatim Coniunctiones Magnas, & Maximas vocant. Nam, ut Coniunctio quatuor inferiorum Planetarum simul, interdum Magna dicitur; sic frequentius Magna vocatur, quæ Saturni, ac Iouis est, & vigesimo quoque anno contingit; cum & Magna propriè, seu potius Maxima ea sit, quæ trium Superiorum est, & contingit solum octingentesimo quoque anno; vti contigit anno huius sæculi quarto.

## CAPVT XVI.

*De varijs Lunæ Phasibus, pro varietate Adspectuum,  
Configurationum-ve ipsius cum Sole.*

**Q**UIA Luna corpus sphericum, opacumque est, & lucem illam primariam, argenteamve mutuatur à Sole, ac ab ipso semper dimidia sui parte (aut etiam aliquantò amplius, prout minor est) illustratur; necesse est, ut, cum aliunde situm circa nos, ac ipsi Soli interueniendo, continenter commutetur; necesse est, inquam, ut ad nos conuertatur nunc amplius, nunc minus ex illuminato dimidio; sicque quod ex illo apparet, variis formis, figurisque, quas Phaseis dicunt, exhibeatur.

Solent verò Phasès censerì, ac nominari quatuor, pro quadruplici illo primùm recitato genere adspectuum: nam ut aliunde ipsa Coniunctio minus propriè adspectus est, sic Phasis propriè tunc est nulla; ut potè parte illuminata existente tota nobis auersa, conuersaque in ipsum Solem.

S



Non memoro autem Lunam, donec est inconspicua, sitientem, silentemque dici; & cum totum id tempus Interlunium vocetur; ipsum speciatim diem Conjunctionis appellari <sup>Νοῦμηνίαν</sup> *Novilunium*; itemque <sup>Ἐπὶ τῷ ἡμέρῳ</sup>, quod Luna eo die sit *Vetus, ac Nova*.

Prima itaq; Phasis dicitur, cum Luna à Conjunctione recens, vespereque emergens è Solaribus radiis, obuertit nobis portiunculam, & ipsam quidem quasi excavatam, partis illius illuminatæ (residuo, quod supra, cælum respectante) ac tum dicitur, & maximè quidem sub ipsum Sextilem adspectum, Corniculata, Falcataque, & Græcè <sup>Μυρτιάδης</sup>, ob formam videlicet propriam, quam, quæ imitantur cætera, *Lunulata* appellitantur.

Secunda est, cum Luna sub septimum iam, aut octauum diem, quo quadrante à Sole abest, cauitate illa iam euanida, obuertit nobis integrum illuminatæ partis dimidium; ac idcirco <sup>Δικοτῆους</sup>, seu *Bisecta* dicitur, quod ex semi-globo nobis obuerso dimidium adhuc obscurum sit; & vt semiglobus nobis ob distantiam quasi discus apparet; sic communis illa Lucis, & Vmbræ sectio, quasi recta linea discum hunc bifecans, appareat.

Tertia est, cum exinde Luna ad Oppositionem properante, & maximè sub Trinum adspectum, amplius quàm dimidium illuminatæ partis ostentat, ac ideo vocatur <sup>Αμφίγυτος</sup>, *virimque gibbosa*, quod non amplius altera parte caua, aut rectè secta, verùm tumida ex vtrâque videatur.

Quarta demùm est, cum prouecta ad Oppositio-




nem Luna, obuertit nobis inter Solem, ipsamque consistitibus, atque adeò ipsi ad eandem regionem cum Sole spectatis, totam partem illuminatam; ac integro proinde disco (plenove orbe) fulgens, plena dicitur, & Græcè Πανσέληνος, quasi *Toti-lunis*.


Notum porrò est easdem Phaseis Lunæ decrescen-  
ti (sed ordine retrogrado) quæ sunt in crescenti attri-  
butæ, competere; prout iterùm sub Trinum adspe-  
ctum Ἀμφίκυρτος, sub Quadratum Δικόπμος, sub Sextilem  
Μηροειδής, apparet.

Notum & eam partem Lunæ, quæ est vmbra, ef-  
se semper à Sole auersam; ac ipsa speciatim cornua  
in vetere Luna spectare ad occasum, quæ in recente  
spectant ad ortum.

Potest hæc Phaseon varietas sequente figura sic re-  
presentari, quasi Luna à conjunctione orbem suum  
percurrans, talis succedenter appareat, qualis heic per  
circuli parteis, albas relictas, exhibetur.








Moris verò est, vt eadem varietas figura proximè consequente repræsentetur, vt intelligi quadamtenus possit, quemadmodum circumeunte Terram Luna, Sol quidem ipsius dimidium continenter illuminet; sed eiusce dimidij nunc ampliùs, nunc minùs, hunc nihil nobis obuertatur. Tametsi semicirculi ad Terram, oculumve conuersi concipiendi sunt, quasi semiglobi; & curuatura, quæ in plano repræsentari non potest, imaginatione supplenda est.







Pauca quædam heic adnoto. Vnum, quando requiritur, Quare, cum Phases Lunæ omnes demōstrent Lunam easdem semper maculas Terræ obuertere, admittant tamen ipsam volui circa centrum Epicycli; quo casu pars globi illius antica facta in Apogæo, deberet postica fieri in Perigæo? Responſionem esse, idcirco id fieri, quod ipsum Lunæ corpus ita reuoluatur circa sui centrum, vt quantum à motu Epicycli auertitur, tantum à proprio conuertatur.

Alterum, Lunam à conjunctione primùm apparere tenuissima falce, aliquando vno, aliquando altero, aliquando etiam tertio solùm die (quod idem proportionem de eius ante conjunctionem occultatione dicendum est) Quoniam prout est velocior, aut tardior, & partim propter Zodiaci situm, partim propter sui latitudinem, nunc rectiùs, nunc obliquiùs occasura post Solem est; aliquando citiùs, aliquando tardius à crepusculi claritate sic eximitur, vt conspicua effici ante sui occasum possit.

Postremum, illam Luculam, quæ in Luna noua, veterèque, præter argentea cornua est, reliquumque discum exhibet conspicuum, ac Secundaria dicitur, Lunæque natiua vulgò reputatur, referendam esse ipsi Terræ acceptam: quatenus Terra reflectente in Solem, regionemque ipsi circumpositam quos ab ipso recipit radios, reperitur Luna intra eam regionem, sitque illius particeps. Argumento enim inter cætera est, quod à quadratura ea lux euanescat; vt Luna



nimis procùl abeunte, aut nimis procùl adhùc absente extra reflexionis illius regionem.

Dicendum quidpiam videretur de Phasibus Veneris; sed sequente libro de ipsis commodiùs.

## CAPVT XVII.

### De Eclipsi Luna.

**Q**UAE Græcè *ελλειψις*, Latinè *Defectus*, seu *Deliquium* dicitur; & in Luna potissimùm vocatur præterea Labor, aut Labores.

Est autem Eclipsis Lunæ nihil aliud, quàm priuatio lucis Solaris in Luna, propter interpositam Terram. Scilicet, cùm Terra sit opacum corpus, non potest Luna ipsam habere sibi, Solique interceptam, quin Solis luce, ob quam fulget, spoliatur, & obtenebrescat.

Suppono verò rem familiarem; corpus opacum, sphaericumque projicere vmbra in partem à lucido auersam; & æqualem quidem, seu cylindricam, si ipsum opacum fuerit æquale lucido; decrefcentem, seu conoidalem, si minùs: increfcentem, seu Calathoidem, si majus (ne interim memorem opaci dimidium in primo casu illustrari: in secundo non nihil ampliùs; in tertio aliquantò minùs) vt vel ipsa inspectio schematis sequentis manifestum facit.





Nimirum exinde intelligitur, cum Terra minor Sole sit, & conoidalem, seu turbinatam umbram in partem à Sole auersam continuò projiciat; esse quidem Lunam immunem defectus, si dum est Soli opposita, extra hunc conum umbrosus sit; sed necessario deficere, si intra ipsum immergatur.

Constat verò debere Lunam esse Soli oppositam, siue per ipsum Plenilunium; quoniam alias Terra non potest ipsi, Solique interijci.

Constat & ipsam non idè in omni Plenilunio deficere, quòd projiciente semper umbram Terra in Eclipticam, Luna plerumque ob deflexionem orbitæ suæ ab Ecliptica, latitudinè eiusmodi sit, ut talem umbram nunc versus Boream, nunc versus Austrum præterfugiat.

Præterfugere autem vix potest senis quibusque proximè mensibus; quòd Sol percurrrens Eclipticam  
bis in



bis in anno transeat per Nodos, seu semel per Caput, & semel per Caudam Draconis; ac tum Sole versante prope vnum Nodum, vix fieri possit, quin Luna ipsi opponatur nunc amplius nunc minus prope alterum; sicque in vmbra plus, aut minus, vel ad Boream, vel ad Austrum Eclipticæ, incurrat.

Vix autem, dico; quia rarò quidem, sed interdum tamen contingit, vt Luna vmbra præterlabatur intemerata penitus, etiam per annum integrum: quemadmodum speciatim anno ab heinc quinto eueniet.

Dico præterea; nunc plus, nunc minus; quoniam, si exstiterint quidem Luminaria in ipsis Nodis, aut proximè illos; tunc & tota Luna immergitur in vmbra, creaturque proinde Eclipsis Totalis, totiusve disci; & Mora intra tenebras maior, aut minor est, prout centrum Lunæ per centrum, siue axem vmbrae, aut propius, aut remotius transit: vt taceam hûc quoque quidpiam facere velocitatem, aut tarditatem motus.


Scilicet, cùm diameter vmbrae sit, habeaturve propemodùm triplò maior diametro Lunæ, occupetque adeò vnum propè gradum cum semisse, quâ Luna transit (idque aliquando altiùs, aliquando humiliùs, prout Apogæa, aut Perigæa est) ipsa aliunde Luna non peruadit, nisi vnum gradus dimidium intra vnâ circiter horam.

T



Potest porrò Eclipsis Totalis, & centralis quidem ex proxima, Figura intelligi; vt in qua sit A B quidem Ecliptica; C D orbita Lunæ; E Luna primum ingrediens in vmbra; F Luna vltimùm egrediens; G Luna in ipso vmbrae centro.

Non centralis autem ex consequente, vt in qua Nodus non sit in centro vmbrae, sed extra; vt putà in H, ac idcirco Luna per centrum non transeat.





Nota verò, Eclipses Totales, quæ maximæ sunt durationis (tales autem sunt præsertim centrales) vix paucis minutis quatuor horas excedere, ac sæpe consistere infra, quod motus Lunæ per id tempus non sit semper tardissimus. Nota & dimidium penè huius temporis consumi in mora intra totales tenebras; scilicet tempus Incidentiæ (hoc est ab initio Eclipses, ad vsque Immerfionis, obscurationisve totalis momentum) non-nisi vnius plus minùs est horæ; ac tempus Regressus (hoc est à momento primæ Emerfionis, recuperationisve lucis ad ipsum vsque Eclipses finem) consimiliter.

Sin fuerint autem Luminaria remotiora à Nodis, tunc potest pars dumtaxat Lunæ per ipsam vmbra transcurrere, sicque fieri solum Eclipses Partialis; ipsaque seu maior, seu minor, prout distantia ab ipsis Nodis minor, maiorve fuerit; ac propius adeò, remotiusve ab vmbra centro Luna transferit.



Et cum Lunæ diameter intelligatur diuidua in duodecim vncias, seu parteis æqualeis, quas appellant Digitos; solet defectus Quantitas per digitos (ac digitorum etiam minuta) repræsentari; & maior, minorque haberi, quatenus plurium, pauciorumve digitorum fit obscurationis.

Potest verò etiam Eclipses Partialis exsequente vno, alterove schemate intelligi. Repræsentatur autem in vtróque duplex Lunæ orbita, vt intelligatur quamobrem Eclipses nunc in Austrum, nunc in Boream fiat; cum prior aliunde insinuet deficere interdum Lunam, priusquam ad Nodum peruenerit; posterior,

T ij



postquàm iam superârît. Quæ eadem proportione  
sunt circa posteriorem Figuram Totalium Eclipseon  
supplenda.





Prætereo heic Luculam illam, quæ in deficiente Luna obseruatur (quæque per totalem præsertim Eclipsin tantò rubicundior, obscuriorque euadit, quantò magis Luna versus vmbrae axem, centrumve accedit) esse videri ex refractione radiorum Solarium, qui prætergredientes atmosphæram terrenam, versus vmbrae axem ita deflectuntur, vt ipsam vmbra veluti dilutiorem efficiant, ac tantò magis, quantò minùs à margine receditur; tantò minùs, quantò magis ad axem acceditur, quò radij iam pauci, nullive perueniunt, quibus Luna vix, ac ne vix quidem interdum visibilis fiat.

Prætereo & Penumbram illam, seu obscurationem, quæ initio penè inconspicua, addensatur sensim ad marginem Lunæ (& porrò priusquàm disci temeratio quasi falcata appareat) ex eo creari, quòd Terra sensim subeunte Solem, lux in Luna sensim minuitur; & is eius margo euadat sensim, seu magis, magisque obscurus, cui plures, pluresque Solis partes præripiuntur. Quod idem proportionè dicendum de Penumbra illa, quæ sub finem Eclipsios, restituto iam limbo, superstes, idcirco sensim euanescit, quòd plures, pluresque Solis partes, subductâ paullatim Terrâ, reuelentur.



## CAPVT XVIII.


*De Eclipsi Solis.*

**Q**UÆ Eclipsis dicitur Solis, appositè magis diceretur Terræ; quippe Terra est, quæ tunc luce Solis, Lunæ interjectu, priuatur, vt Luna deficiens priuatur interjectu Terræ; cùm aliòquin Sol lucem illibatam retineat. Sed dicatur tamen Sol Eclipsin pati, quatenus respectu nostri deficit.

Deficere porrò nobis Solem ob Lunam interpositam, vel ex eo manifestum est, quòd non-nisi per Nouilunia, seu cùm Luna ipsi est conjuncta, deficiat.

Quòd autem non in omni Nouilunio deficiat, causa est latitudo Lunæ; quippe ob quam Luna aut suprà ad Boream, aut infrà ad Austrum prætereat, neque directè inter nos, ipsumque Solem transeat; transeat autem solùm, cùm est in eodem (proximè) Nodo, in quo Sol; sicque Eclipsis Solis tum solùm creetur, cùm ambo luminaria sunt aut simùl in Capite, aut simùl in Cauda Draconis (vel certè quamproximè) vt ex hac figura intelligi potest.





Illud fortassis mirum videatur, quam obrem longè plures Lunæ, quàm Solis Eclipses appareant: Sed causa est, quia globus Lunæ, quo nobis Sol eripitur, est longè minor globo Terræ, quo Sol præripitur ipsi Lunæ; ut proinde longè facilius Luna incurrat in umbram Terræ, quàm visus noster in umbram Lunæ.

Quanquam id accipiendum est de loco Terræ determinato, ut hoc, in quo nos degimus: Nam spectato alioquin toto Terræ disco, (dimidiove superficiei, quasi plano habito) nihilo sunt Solis Eclipses Lunaribus infrequentiores; siquidem per senos ut plurimum menses, aliquæ aut heic, aut illeic terrarum contingunt.

Id autem idè euenit, quòd Luna, cùm sit, ut mox dictum est, longè minor, quàm Terra, non possit toti Terræ disco ad Solem conuerso eripere Solem; sed umbram solùm in aliquam ipsius partem transmittere, nunc quidem in hanc, nunc verò in illam; vnde




& solet fieri, vt alicubi terrarum Eclipsis totalis tum sit, cùm alibi partialis solum, alibi etiam nulla est.

Res intellectu facilis erit ex vulgari hoc schemate; in quo vbi Sol fuerit A, Luna B, Terra C; constat Solem eripi totum à Luna interposita habitanti in puncto Terræ D; dimidium habitanti in E; nihil habitanti in F; veluti etiam plus, aut minùs habitantibus in cæteris locis.

Obiter verò adnotare licet ex hoc schemate, eam diuersitatem adspectuum ob Lunæ viciniam creari, vt meritò Astronomi de eius Parallaxi solliciti sint; ac non ea solùm quæ Altitudinis, verùm etiam ea, quæ tam Longitudinis, quàm Latitudinis dicitur; vt vbi, & quantam-nam sit Solis Eclipsin factura, definiant.

Cùm Partialis Eclipsis est, representari solet hac forma, & designari etiam per duodenas diametri parteis, siue Digitos, eorumque minuta.



Nilil



Nihil interitū mirum est, posse totum Solem propter Lunam deficere; quoniam tametsi Luna sit minor, est tamen etiam nobis propior; ut propterea possit apparens eius discus apparenti Solis disco exæquari, sicque eum totum obtegere.

Id tamen discriminis est inter Eclipsin Solis Totalem, & Totalem Lunæ, quod ista plerumque cum insigni sit mora, tanquam non valente se Luna ab umbra terrena breui expedire; illa verò nequeat esse cum mora, saltem valde sensibili (neque adeò possint esse valde diuturnæ, quæ interdum densissimæ, etiam sub meridiem, creantur tenebræ; adeò ut stellæ conspiciantur, aues condantur, aut procidant, &c.) quod Luna motu suo in ortum Soli subtercurrentes, statim ac limbo suo orientali orientalem limbum Solis attingit, Solemque adeò totum operuit, incipiat ipso occidentali occidentalem deferere, Solemque adeò reuelare.

Quin-etiam contingit interdum, ut quia apparens discus Lunæ Apogeiæ minor est, quàm Perigeiæ, atque ideò minor, quàm ipse discus Solis; contingit, inquam, ut dum Apogeiæ subtercurrit Soli, & centrum centro conjunctum habet, supersit ex Sole totus circum limbus, quasi armilla aurea, aureusve quidam circulus; totum scilicet non tegente Luna.

Quod si requiras, quæ maxima Eclipses Solis duratio sit; perspicuum esse videtur illam duarum plus minùs esse horarum. Quippe cum Luna singulis horis conficiat plus minùs vnius gradus dimidium, quanta transcurrentia Solis diameter est; ideò necesse est,



ex quo Luna limbo suo orientali occidentalem Solis attigit, Eclipsique principium fecit, horam infumat, quovsque idem limbus ad orientalem Solis perueniat, mediumque Eclipseos efficiat. Et quia tunc solum limbus Lunæ occiduus ad occiduum Solis peruenit, quem & mox relinquit, adeo vt cessante Incidentia, incipiat Emerfio; necesse est horam iterum infumat, quoad vsque idem limbus ad orientalem Solis perueniat, & ab eo excedens Eclipsi finem faciat.







INSTITVTIONIS  
ASTRONOMICÆ  
LIBER TERTIVS.

SIVE  
SPECIALIA COPERNICI,  
ET TYCHONIS SYSTEMATA.

CAPVT I.

*Quos imitatus Copernicus in Systemate  
confingendo fuerit.*

**C**UM sit iam dicendum, appendicis  
loco, de mundano Systemate, iuxta  
mentem Copernici; & subinde quid-  
piam de eo, quod non multum absi-  
mile, Braheus ipsi substituit; præfan-  
dum est, quicquid à nobis de priore præsertim dice-  
tur, eò spectare solummodò, vt quoniam celebre  
enasisit, cuiusmodi sit, explicetur, & quemadmodum  
propugnetur à suis assertoribus: Neque enim nos  
alioquin sponsores, vadesque ipsius præstamus.

Principio verò, cum Systema, Hypothesive Co-

V ij



pernici moueri Tellurem supponat; ideò sciendum est opinionem, quæ Terræ motum tribuit, esse antiquam admodum; nempe cum etiam Pythagoræ, Pythagoræorumque fuisse ostendatur; tamen non omnes ipsam vno modo exposuerint, defenderintque.

Aliqui enim voluere Terram in centro mundi existentem reuolui in ortum, circa proprium axem, spatio horarum 24. & exinde fieri, vt Sol, cæteraque Sidera videantur eodem spatio temporis reuolui in occasum.

Ita Ecphantus Pythagoreus, & Heraclides Ponticus, ac Plato, iuuenis dum esset; & nonnulli præterea alij.

Notandum est autem istos non idcirco ademisse omnem Sideribus motum; sed ademisse solum diurnum, tanquam affictum ex motu Terræ; & reliquisse quibusque proprios, veluti Lunæ menstruum, Soli annum, Marti biennem, &c. Videlicet alia ratione explicare non poterant Coniunctiones, Oppositiones, Adspectus alios planetarum.

Ex quo fit, vt mirari liceat censuisse Nicetam, apud Ciceronem, Cælum, Solem, Lunam, Stellæ, superaddemque omnia stare, neque præter Terram aliquid moueri.

Alij voluerunt imprimis duo quædam constare immota: nimirum heinc Sphæram Fixarum, quam veteres mœnia mundi habuerunt; heinc Solem, quem in centro degentem appellauerunt Iouis custodiam, & vniuersi Lareis, seu Focum. Deinde inter Fixas, & So-



lem, fecere mobileis Planetas, ac inter ipsos Terram, quam & defenderunt moueri, non modò diurno motu circa proprium axem, verùm etiam annuo circa ipsum Solem.

Ita Philolaus, Aristarchus Samius, Plato iam maior, itemque Seleucus Mathematicus, & Hicetas, siue Oicetas (utròque enim nomine videtur idem intelligi, imò etiam fortè nomine Nicetæ, vt proinde eius opinio potuerit fuisse non vndique ipsi Ciceroni perspecta) insuperque alij nonnulli.

Iam Nicolaus Copernicus, qui fuit Canonicus Torunensis, & ante annos paullò plus centum floruit, imitatus est hosce posteriores; sed ita nihilominus, vt suppleuerit aliqua, quæ fuisse à veteribus animaduersa Authores non tradunt.

Ex quo autem opinio instaurata ab illo fuit (neque enim perinde restitui à Cardinali Cusano, motus Terræ propugnatore, sæculo antè vno, potuerat) amplexi eam sunt Rheticus, Rothmannus, Mæstlinus, Laudtbergius, Schickardus, Keplerus, Galileus, alijque penè innumeri.

Atque id quidem ne Origanum, Longomontanum, & aliquos alios ex recentioribus memorem, qui adherentes prioribus, detinentesque Terram in centro, tribuere ipsi motum diurnum; & tum reliquæ Planetarum motus proprios explicatiùs, quam veteres, concessere Firmamento, seu sphaeræ Fixarum motum illum lentum, hoc est reuolutionem vnam, intra annorum viginti quinque millia, de qua superiore libro dictum est.



Heic adnotandum, nomine Terræ, Telluris-ve intelligi globum hunc compactum ex terra speciatim vocata, & aqua ipsi interfusa, & corporibus exinde prognatis. Huiusmodi autem corpora habenda sunt, Animalia, Plantæ, Lapides, Mineralia, Meteora, Ignis ipse (provt ex pingui, quæ terrena est, materia creatur) Aër etiam, seu Atmosphæra (quatenus aliud nihil est, quàm textura quædam vaporum, corpusculorumve ex terra, & aqua, mistisque rebus exhalatorum) ipsaque non altum admodum euecta, ac solidiorem interim terræ, & aquæ orbem, eo pene modo, quo lanugo malum cotoneum, circumvestiens.


## CAPVT II.

*Quo proinde situ, atque ordine Terram, Sideraque habuerit.*

**I**NTELLIGENDVM porrò est ex subiectò heic schemate, quenam sit Terræ, ac Siderum, partim iuxta antiquos illos, partim iuxta Copernicum, recentioraque dispositio.

Videlicet Regio Fixarum habetur pro mundi extremo, ipsòque penitus immoto, & quantum quidem ad sensum patet, orbiculari, seu sphærico; tametsi illius figura designari certò à nobis non potest, qui neque superficiem illius extimam videmus, deprehendimusve in quid, vbi, quomodo desinat: neque intimam etiam vlla ratione discernimus, qui quicquid est sursum, à regione vsque superioris aëris,





quasi in eadem distantia, superficie-ve constitutum habemus; cum & possint Fixæ propius remotiusque dispositæ esse; & quæ inter ipsas apparet inæqualitas tam esse valeat propter minorem, maioremque distantiam, quàm propter maiorem, minoremque corporum molem.

Sol verò habetur pro centro adspectabilis huius



concamerationis, seu potius illius centrum occupat; ipse pariter existens immotus. Quanquam licet immotus sit, quatenus è loco suo non excedit; arguitur tamen in ipso loco, seu circa suum axem reuolui intra dies viginti septem, ex ipso motu Macularum, quæ in illo sunt obseruata, postquam Telescopium adinuentum est.

Hisce autem duobus quasi terminis immobilibus constitutis, disponuntur in interstitio ipsi Planetae mobiles; ut pote, qui varios motus circa Solem, & sub regione Fixarum, obeant.

Ac primò quidem proxime Solem collocatur Mercurius, ut qui circuitum circa ipsum omnium breuissimum describat, eundemque citissimè absoluat; nempe intra menseis quam-proximè treis.

Secundo loco statuitur Venus, quæ ut ambitu superat Mercurium, sic velocitate superat sequentes; videlicet circuitum intra menseis septem cum semisse absoluens.

Tertio ipsa Tellus, quæ ut suo circuitu complectitur Venerem, ita ipsum tardiùs absoluit; ut putà solum intra menseis duodecim, siue annum vnum.

Quarto Mars, qui & telluri circumducitur, & non absoluit circuitum, nisi annis proximè duobus.

Quinto Iupiter, qui & Martem pari ratione circummit, & circuitum, nisi annis proximè duodecim non absoluit.

Sexto Saturnus, cuius circuitus ceteros omnes complectitur, & absoluitur solummodò intra annos proximè triginta.

Adjicit



Adjicit Copernicus terram inter Venerem, Martemque locatam tantâ intermeare ab utrôque distantia, vt in ipso eorum interstitio circumductam sibi habeat tanquam affecclam Lunam, quæ vnâ cum ipsa ita transvehatur circa Solem motu annuo, vt interim tamen motu menstruo ipsi Terræ circumferatur.

Adjicere deinceps licuit incedentem pari modo Iouem inter Martem, ac Saturnum, eâ ab illis ferri distantia, vt in ipforum interstitio circumductas sibi habeat tanquam affecclas quatuor quasi Lunas, siue mavis stellulas solo telescopio conspicuas, & Medicea Sidera à Galileo indigitatas; quæ vnâ cum ipso Ioue ita circa Solem vehantur motu duodecenni, vt interim tamen motus peculiareis circa ipsum obeant, intima die vno, cum dodrante; succedens diebus tribus cum semisse; tertia diebus septem cum sextante; extrema diebus sexdecim cum besse.

Adjiceremus Saturno quoque circumferri duos affecclas, si qui duo orbiculi ad latera eius interdum apparent, eadem formâ constanter forent, & non interdum acuminarentur, exporrectisque quasi brachiis, relictôque medio interuallo, quasi ansulæ Saturno haberent; interdum quasi vnum, idemque cum ipso corpus euaderent, prouectis contractisque heinc inde versus extremas cuspidis interuallulis; ac tanta insuper varietate Saturni corpus transformerent, vt expectandum omninô sit, quovisque tota & facierum, & periodorum diuersitas obseruata sedulô fuerit, priusquàm aliquid pronuntietur.

X



Adjiciendum quin-etiam erit, circumferri duos Veneri, si verum sit, quod scribitur, observatos duos ante paucos menses à Fontana Neapolitano; qui eximio illo suo telescopio perhibetur etiam in Marte detexisse quasi globulum ad centrum, & proximè oram circulum quasi nigricantem; vti & in Ioue duas, treisve transversas nigricanteis fasciolas, cuiusmodi nihil nos adhuc potuimus telescopio nostro, Galileano licet, ipsoque præclaro deprehendere.

Vt cumque sit, constare potest, esse Planetas quosdam primarios, ac veluti principes, vt putà Mercurium, Venerem, Tellurem, Martem, Iouem, & Saturnum; quosdam secundarios, ac veluti pedissequos, Lunas nimirum, tam terrenam, quàm Iouiales, quàm cæteras, quæ reliquis globis possunt circumduci.

Postremò, censuit Copernicus spatium à Saturno ad vsque Fixas interceptum, esse ingens, ac penè immensum. Quippe & distantiam Fixarum à Terra tantam fecit, vt non modò ipse Terræ globus ad regionem Fixarum collatus puncti instar sit, quod à nemine non admittitur; sed puncti etiam instar sit, quem ipse alioquin Magnum orbem dicit: ipsum scilicet quasi cælum Terræ, siue in quo Terra circuitum circa Solem peragit, cuiusque adeò semidiameter est ipsa inter Terram, Solemque distantia.



## CAPVT III.

*Cuiusmodi triplicem motum Telluri attribuerit.*

**S**V P P O S I T O Telluris loco, triplex motus est, quem illi Copernicus tribuit; Diurnus, Annuus, Inclinationis.

Diurnus est ipsa Telluris reuolutio circa proprium axem; idque tendendo versus ortum, & peragendo circuitum intra horas 24. Adeo vt eadem Terræ pars (v. c. hæc, in qua nos versamur) nunc in Solem conuersa die fruatur, nunc auersa patiatur noctem: ac ipsæ interim cæli partes, quæ ex ordine quasi occurrunt, retegunturque, oriri appareant; quæ ex opposito, retrò abeunt, occultanturque, occidere.

Annuus est ipsa eiusdem Telluris progressio per Zodiacum, hoc est sub Signis Zodiaci; dum inter Venerem, Martemque incedens, & in orientem etiam contendens, circumducitur ipsi Soli, ac circuitum peragit, vt iam dictum est, intra annum. Nempe, dum eius superficies diurno motu circa centrum, axemve proprium conuoluitur, ipsum interim eius centrum prouehitur sensim iuxta successionem Signorum; eo modo, quo, voluto supra planum globo, ipsius centrum secundum longitudinem plani promouetur; donec interim superficies circa centrum, axemve globi reuoluitur.

Fieri autem vult ex hoc motu, vt, quia Terra existente inter Solem, & vnum Signum, Sol tum tegit oppositum, ac dicitur in illo esse; idcirco Terræ

X ij



constitutâ, v. c. in Libra, Sol esse appareat in Ariete; & transeunte Sole ex Libra in Scorpionem, appareat Sol transire ex Ariete in Taurum, ac ita deinceps. Adeò proinde, vt Terra sit, quæ Zodiacum reipsâ percurrat, describatque Eclipticam; Sol verò ipse sit, qui percurrat, describatque apparenter.

Motus demùm Inclinationis, Declinationisve est ipsa deflexio axis Telluris à parallelismo cum axe Eclipticæ, & continentia in perpetuo sui secum, in quo-vis situ, parallelismo; ob quem aliunde & semper maneat axi Mundano parallelus, & æquatorem Terræ contineat ipsi æquatori Mundi parallelum: sicque dici hic valeat non tam reuerâ nouus motus, quàm quædam quasi motuum superiorum modificatio. Potest autem eodem proportionem modo intelligi fieri, quo, dum puerorum turbo supra planum conuoluitur, circellosque varios cuspide describit, ipse illius axis, tum continet se sibi parallelum, seu in situ semper perpendiculari; tum continet quoque basin turbinis ipsi horizonti semper parallelam.

Nimirum, si in magno orbe, de quo est paullo antè dictum, concipias tum Eclipticam, tum intersecantem ipsam Æquatorem, cuius planum intelligatur esse in Fixas vsque productum; ac simul Axis per Solem transiens intelligatur in eandem regionem, quovsque in polos desinat, traductus: finge deinceps terram esse in principio Arietis, & ipsius æquatorem cum mundi æquatore, illiusve plano coincidere; erit tunc sanè axis Terræ axi mundano parallelus. Concipiendum autem præterea solum est,




dum Terra exinde versus Taurum, porróque progreditur, illius axem non diuaticari, sed contineri semper sibi ipsi, & axi mundano parallelum; ex eóque fieri, vt eius æquator mundi æquatori parallelus maneat.

Rem non malè capies, si acceptâ præ manibus vulgari Sphærâ, ipsam habeas pro magno orbe, globulumque adeò intimum pro Sole; axem pro portione axis mundi, & Æquatorem, pro circulo in plano Æquatoris mundi consistente: Ac tum ad manum quoque assumes globulum quempiam suo axe tractum, quem pro Terra ducas, & ipsum ita applices Sphæræ ad initium Arietis, vt in ipso plano æquatoris sit, & axiculum suum ipsi axi Sphæræ parallelum habeat: Deinceps autem globulum sic sensim, & ex ordine traducas per Eclipticam, vt & axis axi, & æquator æquatori parallelus indefessè teneatur.

Quin-etiam, quantum licet in plano rem vtrumque repræsentare, esto in schemate sequente A B C D sphæra fixarum; A C axis mundi; E F G H magnus orbis; ac in ipsius superficie F H Æquator, cuiusque axis transiens per Solem (in cetro subesse intellectum) E G. Esto Ecliptica I K, & terra per ipsam incedens multiplex ille orbiculus suo vbique axe, suoque Æquatore notatus. Cernere licet, si Terra quidem in Æquatore magni orbis fuerit, habere ipsam suum Æquatorem cum Æquatore mundi coincidentem; & suum axem non coincidentem quidem cum axe mundi, sed parallelum tamen ipsi (nimirum concipiendum est axem A C, vel eius portionem E G, per





centrum magni orbis transire, axiculum verò LM  
esse in eiusdem orbis superficie. ) Sin Terra extra  
Æquatorem magni orbis fuerit, tueri ipsam semper  
suum Æquatorem ipsi Æquatori mundi parallelum,  
& axem axi similiter; neque pati vnquam, vt diuer-  
tatur, versus axem Eclipticæ, qui heic esse intelli-  
gitur NO.

Notandum verò obiter, cùm dici heic audis Æ-  
quatorem mundi, Axem mundi, polos mundi: id fieri,  
retenta denominatione ex vulgari Hypothesi; quate-



nus Terrâ reuolutâ in ortum, totus mundus apparet reuolui in occasum secundum hunc Æquatorem, circa hunc Axem, super his Polis; qui reipsâ nihil aliud sint, quàm Æquator, Axis & Poli ipsiusmet Terræ diurno motu circumuolutæ.

Quam ob rem porrò tertius hic motus excogitatus, inuectusque à Copernico fuerit, aliquantò post commodiùs dicetur.

## CAPVT IV.

*Quam ob rem de motu, quieteue Telluris, aut Siderum, fidendum sensui non duxerit.*

QVONIAM verò isti-ne motus Telluri competant, an-non, in controuersiam vertitur, & res videtur debere sensui, aut ratione dijudicari; ideò statuit Copernicus dirimi hanc litem ex eo, quod sensui apparet, non posse.

Siquidem, ipso etiam Aristotele attestante, ad hoc, ut res visa moueri appareat, nihil prorsus refert, ipsa-ne, an oculus videns moueatur; utrovis enim modo, motus imputatur rei visæ, ab oculo; ac ipsæ quoque Philosophus, ad rem monstrandam, utitur exemplo nauigantium, quibus à portu soluentibus apparet terra recedere;

*Prouehimur portu; terræque, vrbesque recedunt.*

Quocirca, ait Copernicus; ad hoc, ut Astra tendere in occasum appareant, nihil interest, ipsa-ne eò reipsâ tendant, an spectatoris oculus, vnà cum Terra tendat in ortum: cum utrovis modo ea sint appari-



tura tendere in occasum. Et, vt Sol appareat ex Cancro in Leonem discedere, nihil refert, an reuerâ discedat, an spectator sit, qui vnâ cum Terra discedat ex Capricorno in Aquarium; cùm Sol vtrovis modo appariturus sit ex Cancro in Leonem transire.

Videtur proinde res sic concipienda, vt si quis Mediterraneus, marisque inexpertus transferatur dormiens, nesciensque in nauim. Nam, vt iste expergefactus iuraturus sit accedere littus, aut recedere, nauim verò stare immotam; quatenus omneis nauis parteis eodem semper situ inter se manere conspiciet, & nautas per ipsam, vt per domum terræ hærentem, quiescere, discurrere, scandere malum, &c. ac ipsum littus interim euadere aut accedenti propius, aut recedenti distantius; Sic nos in ipsa Terra nati, educati, assuefacti (quod est adhuc amplius, quàm esse translatos) facile iuraturi sumus Sidera esse, quæ nobis oriantur, aut occidant, Terram verò immotam esse; quòd omneis ipsius circumpositas nobis parteis eodem semper situ inter se obseruemus, & in ipsa, vt in domicilio fixo quiescamus, varièque moueamur; ac aliunde Sidera extra ipsam posita in situm interim altiore, depressoque nobis euadant.

Discrimen solummodo est, quòd ille exire è nauis, & in portu se sistere, vnde hallucinationem deprehendere, colligereque liceat, possit; nobis verò exire è Terra in fixum locum non liceat, vnde moueri Terram experiamur, fallaciamque nostri visus emendemus.

Heinc, quia donec in Terra sumus, oculus est semper



per eodem modo affectus, atque idcirco incapax, quo dijudicari controuersia possit, Terrane moueatur, an-non; ideò sola superest Ratio, quæ facem quasi præferat, & vtra pars problematis sit potissimum probabilis, doceat.

Opinantur porrò & Copernicus, & qui ab eius partibus stant, suffragio rationis se esse potiores. Id autem cognoscendum est, tum ex iis rationibus, quibus sententiam suam propugnant; tum ex iis exceptionibus, quas rationibus impugnantium opponunt.

## CAPVT V.

*Quæ visa magis congruæ rationes ad adstruendum motum  
Telluris Diurnum.*

**N**AM quod ad Diurnum quidem motum spectat; Tollitur PRIMÒ, inquiunt, vastissima illa Primi mobilis sphaera Firmamento super-exstructa, & ad hoc solùm excogitata, vt inferiora omnia abripi ab ipsâ diurno motu intelligantur. Nimirum Terra simplici corpusculi sui versus ortum reuolutione, Primi mobilis vice fungitur, ac tantum præstans, quantum ea Sphaera, cælos interim, sideraque omnia eo labore subleuat, vt incessantem illam abreptionem haud-quaquam patiantur.

Atque id quidem pro genio Naturæ, quæ nunquam præstat per ambages, quod potest per compendium; neque per plura, quoties quid potest æquè commodè per pauciora.

Y



SECUNDO, tollitur proinde infana illa rapiditas, qua necesse est, Sphæram illam ferri. Quod enim etiam rapiditas in motu Terræ objicitur, quatenus assumptum in eius æquatore punctum celeritatem bombardici globi, dum è fistula exit, æmulatur; quàm immaniore quæso pernicitate necesse est ferri acceptum punctum in ipso æquatore Primi mobilis; cum etiam acceptum in æquatore Firmamenti, iuxta communem sententiam, abripiatur necesse sit quinquagies millies rapidius, quàm eiusmodi punctum Terræ?

Vt prætereatur interim, Naturam harmonicè omnia præstantem, non pusillas res ad quietem, ingentis ad motum; verùm illas potius ad motum, has ad quietem comparare. Atque heic quidem id tantò magis, quantò aliunde Terra ex natura figuræ suæ volubilis est, extremum verò Mundi corpus, cuius figuræ exterius sit, vt paullò antè dictum, nescitur; cum & eius esse probabile sit, quæ sit ad quiescendum, consistendumve maximè idonea. Nam &, quòd alioquin tanta Machina, quantus est totus Mundus, incessanter circumrotetur, & pernicitate quidem inexcogitabili; sola hæc Terræ pillula, habitata pro puncto, immota consistat, inuariatæque maneat; quæ haberi congruum, aut concinnum possit?

TERTIO, tollitur perpetua violentia inferioribus cælis facta; dum præter propriam inclinationem, qua in ortum tendunt, principium extrinsecum est, quod vim in regionem oppositam imprimens, ipsos in occasum abducit. Ac si foret quidem violentia



naturæ inclinatione minor, res videri posset tolerabilis; at illam ita excedere, ut sit in Saturno plusquam decies millies ac septingenties maior; & tātus hic excessus multiplicetur in Firmamento plusquam octingenties nonagies: quā videatur res posse tolerari?

Ex quo fit proinde, ut mirari liceat, Authores communis sententiæ alienum esse existimare à natura, perfectioneque diuinorum corporum, ferri inæqualiter; & reputare tamen dignum, ut ipsa eadem corpora distraherentur tantoperè: & cum reuereri Naturam videantur; non vereri eos tamen in ipsam, inferre infandam violentiam; ac profectos præsertim nihil, quod violentum sit, diuturnæ esse durationis.

QVARTO, tollitur ea absurditas, nisi impossibilitas potius, quam non satis cauent, qui volunt sphaeram inferiorem intra superiorem reuolui, & simul ab ea abripi. Nempe, cum oporteat ambas superficies, conuexam scilicet illius, & concauam huius, esse ut contiguas, ita æquabilissimas; constat profectò impressionem fieri hoc casu nullam posse, propter inuariatum vtriusque in suo loco situm; atque adeò propter defectum pressionis, quæ sine excessu è loco, aut commissura partium, intelligi fieri aliqua non potest.

Ne addatur cælestia spatia conuinci esse fluida, non verò sphaeris solidis, quæ abripiantur, occupata; tum ex Phasibus Veneris, de quibus aliquantò post; tum ex Cometarum per ea traiectione; tum ex defectu refractionum; tum argumentis id genus aliis.

QVINTO, tollitur contrarietas, seu distractio

Y ij



motus eiusdem Planetæ in parteis contrarias; ac vnus dumtaxat, inque vnam partem, & ipse quidem admodum moderatus, relinquitur motus. Nam Saturnus, exempli gratiâ, non singulis diebus circumibit Terram; sed Terra hoc motu ipsum subleuante, totis solùm triginta annis perlustrabit Zodiacum semel: & Luna non tricies circumibit Terram in mense; sed Terra hunc motum recipiente in se, circumibit semel dumtaxat; & sic de cæteris Planetis.

Pari autem ratione Cometæ, si qui fursùm appareant, non ferentur simul & suis trajectionibus, & abreptu Mobilis primi; sed suis trajectionibus solùm agentur per æthera, ac motus interim diurnus ipsis affingetur ex ipsa Terræ reuolutione. Ac pari rursus modo, si Nouæ quæpiam Stellæ in cælo nascantur, quæ specialibus careant motibus, vt celebris illa anni 1572. in constellatione Cassiopeiæ visa; & alia rursus anni 1604. in pede Serpentarij, tum, cùm ibidem Magna conjunctio trium superiorum Planetarum fuit; pari, inquam, modo hæ stellæ perinde constabunt, ac perpetuæ Fixæ; Terra verò perinde illis motum diurnum, sui reuolutione, ac Fixis perpetuis, affinget.

POSTREMÒ, aiunt; vt congruum est magis circumlustrari à naui maritimam oram, quàm ab ora ipsam nauim: conuerti ex ordine oratoris faciem ad varias auditorij parteis, quam totum circum auditorium ad faciem oratoris immotam; & alia id genus similia; ita videtur magis congruum, conuertere Terram seipsam ad parteis cæli varias, quàm to-



tam regionem caelestem ipsi immotæ circumferri; ac potissimum, cum, ut dictum est, idem utrovis modo appareat.

Tantò autem est, addunt, magis consentaneum conuertere Terram parteis sui varias in Solem, quàm Solem ipsum varias Terræ parteis circumlustrare, quantò ipsa est Terra, quæ Sole, non Sol, qui Terra indiget; cum sit magis secundum naturam, ut quod alio eget, versus illud tendat, quàm ipsum nihil egens versus id, quod eget.

CAPVT VI.

*Quæ visa magis congruæ ad asserendum Annum.*

**Q**UOD attinet verò ad Annum; PRIMÒ quidem, inquit, cum Sol sit veluti cor, & lucis, caloris, vigorisque fons, quo tota regio Planetaria perfunditur, ac animatur; locus ipsi maximè congruus in omnium medio tribuitur; nempe, ut opportunè confideat is Moderator, & quasi Princeps,

*Ad cuius numeros & Dij moueantur, & orbis*

*Accipiat leges, præscriptaque fœdera seruet.*

Certè illa Solis circumvolutio propemodùm menstrua circa proprium axem, de qua paullo antè, occasione est, ut concipiant Solem emissis à se radiis compellere omneis Planetas ad imitandum eundem motum; ac fieri exinde, ut quò vnusquisque Planeta Soli propior est, eò citiùs circuitum absoluat, tanquam potentiùs, propter radios confertiores, circum-



abductus. Neque verò ad hoc ob stare aut debilem radiorum vim, aut Planetarum corpoream molem. Nam Planetas quidem ex se neque graueis, neque leueis esse; ac ideò posse minimo impulsu, momentove mutare locum; Radios verò, quos experimur impingi, reflecti, subingredi, discutere, exurere, ac dissoluere corpora, posse ea vi pellendi esse præditos, qua Planetas nullatenus resistentis moueant, atque circumducant.

SECVNDÒ, si dispositionem tam quoad Magnitudinem, quàm quoad Motum planetarum spectes; erit Mercurius minor simul, & celerior Venere, hæc Terrâ, hæc Marte, hic Ioue, hic Saturno; quæ series & concinna est, & instituto naturæ digna. Ac series quidem motuum citra omnem controuersiam est; quod ad magnitudinum verò seriem spectat, non desunt quidem, qui existiment Terram esse non modò Marte, verùm etiam Ioue maiorem: sed nempe cùm res pendeat ex limitatione parallaxeos, & apparentis diametri, quod negotium esse aleæ plenum superius insinuatum est: mirum nihil est aliquibus, secus quàm cæteris videri.

Vt cùmque autem sit; saltem constat in vulgari Systemate nihil esse posse perturbatius, tam quod ad magnitudinum, quàm quod ad motuum seriem spectat. Nam in eo Luna est Mercurio maior, hic minor Venere, hæc minor Sole, hic maior Marte, hic minor Ioue, hic maior Saturno. Et rursus; mouetur Luna motu menstruo, Mercurius annuo, Venus etiam, Sol pariter, Mars annis 2. Iupiter 12. Satur-



nus 30. Firmamentum 25000. Nona sphaera 1700.  
Decima 3400. Primum mobile horis 24.

TERTIO, præclare exinde explicatur, quam ob rem Mercurius, & Venus non multum digrediantur à Sole, neque vnquam Terram se inter, ac Solem constitutam habeant; Mars verò, Iupiter, ac Saturnus digrediantur summoperè, ac Terram interdum se inter, ac Solem intercipient. Nempe vel sola Systematis inspectio rem clarè demonstrat: cum iuxta communem sententiam fingere lineam inter Terram, Solemque tensam oporteat, in qua centra Epicyclorum, tam Mercurij, quàm Veneris, quasi illigata cohæreant; & ab hac tamen illigatione centra Epicyclorum Martis, Iouis, ac Saturni libera sint; neque afferri alia disparitatis ratio, quàm Systematis inconcinnitas possit.

Ne memoretur interim, quàm immanem fieri oportuerit cæli Veneris crassitudinem, vt intra ipsam tantæ capacitatis excauaretur Epicyclus, qui digressiones maximas heinc inde à Sole complexurus, ostentaret diametrum quartæ, & ampliùs parti ambitus cælestis subtenfam.

QUARTO, præclarius adhuc est, quod ex hoc Systemate, & motu Telluris per Zodiacum supposito, tum farrago illa Epicyclorum aboletur; tum omnes Planetarum Stationes, Repedationesque tolluntur; tum vnusquisque Planeta suo vno motu, vnoque tenore, ac in eandem partem constantissimè agitur; vt sanè decet corpora tanta; ac interim quicquid Stationis, Retrogradationisque, & in ipsa quoque



Directione alterationis motus, est, affingitur ipsis Planetis à visu, ob Terram inter eos translata.

Quippe, quod ad Mercurium quidem, Veneremque attinet; non ij alternis in consequentia tendunt, in antecedentia regrediuntur; sed qui spectarentur ex Sole, vt centro suorum motuum, ire semper in consequentia, ac vno tenore Zodiacum percurrere; necesse est nobis, qui extra hoc centrum, extrâque ipsorum circumductus versamur, appareant ire, redireque; & dum nos interim circa idem centrum, sed lentius circumducimur, appareant itus, reditusque nunc in his, nunc in illis locis Zodiaci perficere.


Cùm Stationes verò perinde in hac, atque in comuni Hypothesi intelligantur; non apparere ipsas tamen in excensu, aut ascensu per Epicyclum inter Solem, Terramque contentum; sed potius per circulum, cuius centrum sit ipse Sol (adeò vt hi duo Planetæ nunc infra, seu citra Solem veniant, nunc tantumdem supra, vltrove eum abeant; quod & Ægyptij veteres, & postea Martianus Capella, alique nonnulli opinati sunt) tum alia quædam arguunt; tum ipsæ Phases Veneris telescopia observatæ conuincunt.

Venus scilicet apparere plena (proximè) non potest, cùm vespri à Sole emergit, & ad Stationem primam tendit; nisi quia vltra Solem facta, hemisphærium sui (aut quam-proximè) illustratum nobis obuertit. Neque dimidiata, cum circiter medias versatur longitudoines; nisi quia obuertit dimidium dumtaxat eiusdem. Neque corniculata, cùm infra descen-

dens



dens, redit ad Solem vesperi; nisi quia dimidio minus. Neque rursus corniculata, cum manè à Sole emergens, properat ad Stationem secundam; nisi quia tunc quoque obuertit minus dimidio. Neque rursus bisecta sub medias longitudes; nisi quia iterum dimidium. Neque demum iterum plena, cum manè Solem repetit; nisi quia rursus hemisphærium totum (proximève) illustratum obuertit.



N



Quæ omnia quidem intelligi vel ex sola schematis apppositi inspectione possunt, quatenus Phases, quæ ad læuam, Veneris discum referunt, qualis oculo exhibetur; & quæ ad dextram sunt, insinuant exhiberi alium non posse, ob dimidium globi illustratum, quod semper quidem Solem respectat, sed nunc plus, nunc minus conuertitur ad oculum, auertiturve ab oculo. Prætereo autem notum esse, si Venus ferretur in Epicyclo, qui esset infra Solem totus, ipsam nunquam non modo plenam, sed ne exquisitè quidem dimidiatam apparituram.

Quin-etiam nunquam appareret telescopio exilissima, dum euadit plena; neque amplissima, dum corniculata; nisi plena foret in celsissimo, & corniculata in humillimo situ. Dico autem telescopio; quoniam alioquin nudo visu, tanta penè apparet, dum non longè est à conjunctione vltra, quàm dum non longè est à conjunctione citra Solem; quod spuria luce circumradians (vti & luminosa omnia procùl, ac è tenebris visa) tametsi illeic sit orbe exilis, circum tamen tota refulgeat; heic non-nisi falce sit tenui, quæ tamen, quòd aliunde sit maioris orbis portio, præstet, vt tunc Venus interdiù videatur, quæ perinde interdiù, donec plena est, videri non potest.

Quod ad Martem vero, ac Iouem, Saturnumque attinet; non ij alternis directè eunt, cursumque reuerà reflectunt, sed qui spectarentur ex Sole (& ex Terra quoque, si quiesceret) tendere semper in consequentia; necesse est nobis, qui intra ipsorum circuitus, & celerius quidem, quàm ipsi, in orbem mo-



uemur; necesse est, inquam Regredi appareant, quoties versus eandem regionem, ac propè ipsos facti præteruadimus, Solemque ex parte altera habemus; quasi eos nempe sic assequendo, & mox à tergo sic relinquendo, ut visus noster ad stellas Fixas, non iam consequenteis, sed antecedenteis, illos referat.

Ex opposito verò necesse est Dirigi, seu in consequentia moueri appareant, quoties in oppositas partes imus, ac Terra sic progreditur, ut Solem, ipsosque ad eandem partem habeat, & visus illos referat ad stellas Fixas consequenteis.

Necesse est demum, ut Stare appareant, quoties à regione opposita in eandem, aut ab eadem in diuersam transimus; quòd Terra tunc ita moueatur, ut visus per aliquod tempus referat ipsos ad easdem stellas. Quæ omnia vel ex ipsa inspectione depicti antè Systematis, & fictione motuum per circulos proprios, intelligi possunt.

QVINTÒ, cum proinde mirabile sit, fieri semper hosce Planetas in oppositione cum Sole Retrogrados; in conjunctione Directos; nunquam aliis locis, aut temporibus; nec possit communis opinio causam dicere, cur id fiat; dicit tamen ista præclare, ex dispositione Systematis, iuxta quam prorsus necesse est, ut res fieri hoc modo, non alio appareat.

Quin-etiam præclare simul causam dicit, cur hi tres Planetæ adeò magni sint in oppositione, seu quo tempore Acronychi sunt, præ reliquis temporibus: Nempe, quia tunc Terra proximè eos transit.

Cur item Retrogradationes sint in Saturno fre-

Z ij



quentiores, quàm in Ioue; in hoc, quàm in Marte: Nempe, quia Terra sæpiùs Saturnum lentissimum, quam Iouem paullo velociorem assequitur; ac Martem citissimum omnium, vt tardiùs, ita infrequentiùs.

Cur ex opposito Retrogradationis arcus in Marte maior, quàm in Ioue; in hoc, quam in Saturno sit: Nempe, quia Martis Retrogradatio ob propinquitatem propiùs incipit, & desinit longiùs, quàm in Ioue; & ob eandem rationem in hoc, quàm in Saturno; atque ita de cæteris.

DE NIQVE, cùm cæteri Planetæ Retrogradi, & Stationarij appareant; quorsùm id non competere Lunæ, ac Soli existimemus: Nisi quia Luna quidem nobis, vbicumque simus, tanquam circa centrum circumducitur; Sol verò ipse est, circa quem ipsi semper circumducimur; neque ille potest non videri semper procedere in consequentia, ad oppositam nobis partem?

## CAPVT VII.

*Quæ visa demùm magis congruæ ad motum Tertium inducendum.*

**Q**UOD tandem spectat ad Tertium motum, seu, mavis, expositam illam in parallelismo axis continentiam; Fuit IMPRIMIS excogitatio illius necessaria, vt dierum, & noctium; æstatilque, & hyemis vicissitudo obseruetur.

Nimirum, si Terra translata per Zodiacum, conceptus in ipsa Æquator in idem cum Ecliptica pla-



num coincideret, eiusque axis fieret axi Eclipticæ parallelus; quælibet pars Terræ haberet perpetuò suum horizontem in eodem situ ad ipsum Solem; neque Sol proinde oriretur vnquam, aut occideret; sed vel perpetuò appareret, vel perpetuò occultaretur; ac aliunde neque attolli, neque deprimi vnquam appareret; sicque nec dierum, nec tempestatum efficere-  
tur vlla variatio.

At Aequatore Terræ secante Eclipticæ planum, & axe illius constante in sui secum parallelismo; fit, vt horizon cuiusque loci situm cum ipso Sole commutet; & non modò interdum diem, interdum noctem, propter Solem nunc exhibitum, nunc subductum faciat; sed etiam nobis, v. c. ad Boream exsistentibus, tumor Terræ obsit, ne Terra versante in signis Borealibus, Solem habeamus adeò altum, apertumque, ac donec versatur in Australibus; atque adeò ne dies habeamus tam longos, nec calorem adeò vehementem sentiamus. Quod vel ex sola applicatione circumductioneque memorati globuli supra vulgaris sphaeræ Zodiacum (seruato semper parallelismo, ac designato in globulo puncto Lutetiæ situm repræsentantè) intelligi facillimè potest.

SECVNDÒ, vt declaretur, quomodo Poli altitudo in vnoquoque Terræ loco eadem, seu inuariata maneat.


Videlicet Terra versante in Cancro, pronum videtur existimare, debere nobis Polum Boreum apparere longè altiore, quàm versante in Capricorno. Enimverò ex hoc parallelismo, efficitur, vt æquè al-

Z iij



tus, vbi cumque Terra versetur, appareat. Res autem hoc modo concipienda est.

Repetatur hoc loco schema capite tertio propositum; ac intelligatur E G axis per Solem transiens,



produci heinc inde in regionem vsque Fixarum, definiréque in puncta A C; quæ appellentur Poli mundi.

Intelligamus & axem Terræ continuatum heinc inde ad Fixas, esse successiuè P Q, R S, &c. ac describere annuo circumductu circa axem Mundi, superfici-



ciem cylindricam, siue columnarem, cuius bases sint duo circuli circa Polos descripti, habentesque pro diametris lineas  $PT$ ,  $QV$ , æqualeis diametro Magni orbis  $FH$ .

Intelligamus rursus tantam esse distantiam ex orbe Magno usque ad Fixas, ut spectata heince columna, & decrescere continenter visa (eo modo quo solent parallela omnia in longum producta) desinere tandem ad utramque partem in acumen appareat, & duæ illæ bases, geminive circuli circa polos descripti, habeantur ut puncta.

Ex his simul intelligemus, ubicumque Terra in Zodiaco, Magnove orbe exstiterit, exstantem supra horizontem Polum constare eundem, seu apparere altitudinis inuariatæ. Quoniam tametsi axis Terræ alias, aliasque cæli parteis circa Polum Mundi respiciat; intercapedo tamen harum omnium partium, quasi punctum ad visum sit, & totus complexus circuli circa Polum descripti pro eodem Polo reputetur.

TERTIO, ut explicetur, quæ fiat, ut eadem Stellæ verticales semper sint, magnitudinisque eiusdem appareant.

Quippe cum, si Terra existente in Cancro, Stellæ aliquæ nobis transeunt ad verticem, ex transituræ non videantur pari modo ad verticem, neque apparituræ tantæ, ubi fuerit in Capricorno.

Enimverò, quemadmodum altitudo Poli, ut dictum mox est, perseverat eadem, ob memoratum parallelismum; sic necesse est, ut, ob ipsummet, stel-



lae verticales eadem perseuerent; ut pote retinentes semper eandem ab ipso polo distantiam.

Ac verum est quidem, Terra existente in Capricorno, verticem nostrum tendere ad punctum regionis Fixarum, tandumdem distans ab eo, in quod tendit, dum Terra in Cancro versatur, quanta distantia inter ipsos Magni orbis Tropicos est; At, si hic totus orbis instar puncti est, ad totam Fixarum regionem collatus, a fortiore erit parua eius portio, distantia nimirum inter tropicos.

Quam ob rem heinc fit, ut non eadem quidem partes regionis Fixarum vertici heic illeic reuera respondeant; sed respondeant tamen eadem ad sensum: neque mirum sit, si eadem stellae, quae sensibiles caeli partes sunt, verticales constanter maneant.

Fit verò quoque, ut ipsa stellarum Magnitudo inuariata appareat, quod ubicumque Terra sit, ex eodem quasi puncto respiciatur.

QVARTO, ut ostendatur, quae descripta superius est Aequinoctiorum Praecessio, seu motus ille lentus in ortum, qui Octavae Sphaerae, seu Firmamento tribuitur.

Siquidem stellae Arietis non videntur alia ratione recessisse iam ab Aequinoctiali puncto, intra duo annorum millia, triginta penè gradibus; quam quia sunt reipsa progressae versus consequentia.

Attamen, quia idem est appariturum, seu stellae reipsa ab Aequinoctiali puncto versus consequentia recedant, seu ipsum Aequinoctiale punctum recedat à stellis versus praecedentia: ideo assumpsit Copernicus,



cus, istum motum Inclinationis, axis-ve continen-  
tiam sic fieri, vt non assequatur præcise motum cen-  
tri; ac faciat proinde, vt Æquator secet quotannis  
Eclipticam aliquantò citerius, efficiatque adeò æqui-  
noctiale punctum in parte Eclipticæ aliquantò an-  
tecedente.

Vnde & eueniat, vt, dum Æquinoctiale punctum  
transit in præcedentiâ (ex quo fuit hic motus ab eo  
Præcessio, seu Anticipatio æquinoctiorum appellatus)  
relictæ partes Eclipticæ, atque adeò stellæ Arietis, &  
aliæ, tantumdem transire, siue progredi in conse-  
quentia appareant.

Quæ ille subinde adjecit, ad saluandum partim  
Inæqualitatem huiusmodi motus Præcessionis æqui-  
noctiorum; partim Variationem obliquitatis, maxi-  
mæve declinationis Eclipticæ (dum ideò sufficere vo-  
luit, vt axis terrenus describeret speciem intortæ co-  
rollæ, hæc forma, 8, quòd eundo in ortum, & re-  
deundo in occasum, acceleratio, retardatioque illius  
Motus fieret; & eundo in boream, ac redeundo in  
austrum, incrementum, decrementumque Declina-  
tionis illius crearetur) Quæ, inquam, hac de re ad-  
jecit, ideò memoratu necessaria non sunt, quòd  
vtriusque Phænomeni obseruationes sint incertiores,  
quàm vt de iis debitè constet, aut immorandum in  
iis videatur.

Satis esto; visum fuisse magis congruum, hæc, quæ  
sunt huc-vsque relata, in ipsum Terræ globulum,  
quàm aut in Solem, aut in sphæram Fixarum immen-  
sam referre.



Addam-ne autem QVINTÒ, partim ex hoc motu, partim ex superioribus, visum Galileo fuisse magis congruum, explicare Æstum, seu Fluxum, & Reflexum Maris; quàm illum referre ad influxum Lunæ, aut ad aliam quamlibet excogitatam hactenus causam?

Nam, vt aqua vase contenta, ipsòque translato refugiens, non hæret quasi accumulata, sed refluit prorsum, si translatio fiat inæquabiliter; ita voluit Mare contentum in Terræ cavitatibus, & versus occasum refugiens, dum ipsa versus ortum transfertur; non hære, verùm refluere, ac iterum reciprocari, si contingat ipsum eius quasi vas inæquabiliter transferri.

Transferri porrò inæquabiliter, ex eo probauit, quòd, licet quilibet trium motuum æquabilis secundum se sit; facit tamen eorum commistio, vt assumpta certa superficiei Terræ pars inæquabiliter moueatur.

Nam ea, v. g. in qua est mare Mediterraneum, ita constanter versus ortum motu annuo abripitur, vt interim motu diurno reuoluta, habeat dimidium reuolutionis huiusce, consentiens cum annuo, & dimidium dissentiens; sicque, dum ambo motus conspiciant, feratur velocius in ortum; dum alter dumtaxat eò tendit, feratur tardiùs: ac bis quouis die feratur æquabiliter; semel scilicet, dum à velocitate in tarditatem; semel, dum à tarditate in velocitatem transit.

Itaque ex hac inæquabilitate oriri ille voluit reci-



procationem *Æstus* geminam singulis diebus contingentem.

Sic verò, quia diurnus motus nunquam obliquè, sed semper directè versus ortum fit, ob memoratum parallelismum; & interim ab annuo obliquè facto adjuuatur, seu promouetur minùs circa *Æquinoctia*, ob obliquitatem, quam circa *Solstitia*; ideo propter superuenientem huiuscemodi inæquabilitatem, intendi *Æstum* censuit per utrâque ea tempora; & per *Æquinoctia* quidem maxime, quòd tum motus annuus diurno magis aduersetur.

Sic etiam; quia, si verum sit transferri Terram per *Zodiacum* Solaribus radiis, & ipsam aliunde transferre secum Lunam, vt sui appendicem, necesse est translationem Terræ intendi, ac remitti, prout Luna noua, aut plena exstiterit; illeic nempe citra, hęc ultra ipsam Terram exsistens; eo modo, quo vibrationes globi penduli, chordæve appensi, & hęc illuc reciprocantis, intenduntur, aut remittuntur, prout globulus aut suprà, aut infrà coappenditur; ideo ex hac noua inæqualitate putauit ille fieri, vt *Æstus* euadant per *Novilunia*, ac *Plenilunia*, quàm temporibus aliis intensiores.

Sic rursùs, quia ex Luna, Terræque vnà translatis vnum quasi mobile fit; & ob motum specialem Lunæ, totale hoc mobile non assequitur meridianum diebus singulis, nisi vnâ propè horâ, seu quatuor horæ quintis tardiùs; ideo fieri potest, vt *Æstus* diebus singulis vnâ propè horâ, siue quatuor quintis, fiat retardatio.

A a ij.



Prætereundum autem, varietates alias, quæ in Maris æstu contingunt, posse non incommode ad littorum situs, conditionesque reuocari.

## CAPVT VIII.

*Quid Copernicani ad ea, quæ obijci solent ex Astronomia respondeant.*

**N**VNC, cùm triplex sit Argumentorum genus, quæ solent aduersus Telluris motum obijci; aliqua enim ex Astronomia, aliqua ex Physica, aliqua ex Sacra Scriptura petuntur; non est quare multum in iis immoremur, quæ Astronomica potissimum sunt; quòd qua ratione Copernicani ad illa respondeant, maxima ex parte constet ex iam dictis.

Nam quod, v. c. solet obijci, fore, vt neq; eodem in loco altitudo Poli sit constans; neque eadem stellæ verticales sint, magnitudinisque eiusdem habeantur; neque, si motus secundum Eclipticam fiat, variatio vlla dierum, noctiumque, & tempestatum eueniat; neque vllus motus Fixarum in consequentia obseruetur, & si qua sunt huiusmodi; id fuit mox antè declaratum.

Quod prætereà verò IMPRIMIS vrgetur; fore, vt integrum hemisphærium, dimidiumve cæli apparituum non sit, neque adeò sex Zodiaci Signa possint perpetuò conspici, nisi Terra in centro degat:

Respondent, vbiq; Terra intra ambitum cæli fuerit, id, quod ex cælo supra horizontem, ipsiusve planum exstabit, apparituum oculo, quasi inte-



grum hemisphærium; nisi à cæli fornice tam paucis  
orgyijs absumus, vt verticale, & circumstantia pun-  
cta internoscantur distare à nobis minùs, quàm ipse  
horizon, extremumve illud, quod erit ex terra  
conspicuum. Nempe oculus habens cælum tan-  
quam ipsi Terræ extremo circumquaque contiguum,  
non alia semidiametro altitudinem fornicis; quam  
ipsam latitudinem, distantiamve horizontis meti-  
tur.

Terram porrò, siue concipiatur euēcta ex centro,  
in Magni orbis superficiem; siue ex Tropico Capri-  
corni eiusdem orbis, translata in Tropicum Cancris;  
non ideò ita accedere ad ipsum cæli fornitem, vt mi-  
nùs ab eo, quàm ab ipso Terræ horizonte distemus;  
Quin-imò, iuxta antedicta, ne euadere quidem pro-  
motiorem versus ipsum, vllò puncto sensibili; vt pro-  
pterea aliquid minus hemisphærio ex eo cernamus;  
aut ex ipsius Zodiaco minùs, quàm sex Signa, hoc est,  
quàm centrum octoginta gradus, supra horizontem  
appareant.

Quod SECUNDò instatur; fore, vt non possit  
Sol Apogeius, Perigeius, & alià dici:

Respondent, posse semper dici; quòd hæc Astro-  
nomia receptas voces non expungat, modò iuxta ea,  
quæ apparent, vsurpari intelligantur; ac nullum  
propterea existentia rei, quæ reuerâ sit, præiudicium  
fiat. Nam ipsos quoque Copernicanos passim dice-  
re, Solem oriri, occidere, esse in Signo aliquo, cæte-  
râque similia; loquutos nimirum prout res apparent.

Dicere itaque licebit Solem esse Apogeium, quan-

Aa iij



do Terra erit Aphelia, maximève distans à Sole; Perigeium, cùm Perihelia, proximève circumstans Solem: Nam illud apparenter Soli, hoc reipsâ Terræ conueniet, quatenus eius orbita Eccentrica erit, seu non tam circulus perfectus, quam Ellipsis quædam, in cuius focorum, seu centrorum altero sit Sol, ac Terra proinde ad ipsum nunc magis, nunc minùs accedat.

Scilicet viæ Planetarum (quas nempe corporibus suis per ætherea spatia describunt, etiam dum vehi, reuehique per Eccentricos, & Epicyclos supponuntur) obseruatæ Ellipticæ sunt, eo ferè modo, quo circa Lunam superiore libro insinuatum fuit: tametsi ita exigente facilitate calculi, intelligantur etiam Ellipses in Eccentricos, Epicyclosque reduci.

Quod additur TERTIÒ, futurum, vt neque iisdem Planetarum Adspectus sint; neque eorundem Latitudines; neque speciatim Lunæ Phases, ipsiusque, ac Solis Eclipses perinde appareant, &c.

Respondent, ista, & cætera perinde prorsùs apparitura; quandò, licet ipsa sit Terra, quæ reuerà describat Eclipticam; & Sol tamen est appariturus eam describere; & planetæ cæteri, dum percurrent Zodiacum, videndi sunt variè cum ipso, ac inter se configurari, discederèque ab Ecliptica, seu latitudinem sortiri.

Et quia Luna semper circa Terram feretur in orbita propria, quæ perinde Eclipticam in oppositis Nodis secet; perinde prorsùs Phaseis subibit; & Soli conjuncta, aut opposita perinde apparens, perinde



Eclipsin patietur, aut non patietur, opposita cū erit; ac perinde creabit, aut non creabit in Sole, cū erit conjuncta; absque vllo discrimine.

Quòd subjicitur QVARTO, deridiculum esse, Terram, Elementorum faciem, cæleste corpus existimari, ac planetarum vnum censer:

Respondent, Terram non esse magis reputandam Mundi faciem, quàm Martem, aut alium planetam: Nam & quamvis luce careat, carere tamen cæteros quoque; &, si cæteri luce Solis splendeant, eadem pariter & ipsam splendere.

Non esse eam minùs globosam, quàm illos; vt proinde per ætherea spatia circumduci perinde valeat. Non esse molis incongruæ: cū, vt minor aliquibus, ita maior cæteris sit.

Et quamvis superficiem inæquabilem, asperatamque habeat; habere tamen & ipsam Lunam, vt telescopio conuincitur: & habere cæteros quoque non esse improbabile, vel ex eo, quòd plusquàm ex vno sui puncto lucem Solis ad nos reflectant; ac aliunde obtusè luceant, neque Fixarum instar scintillent, tanquam maiore radiorum parte ob amfractus varios, aliò, quàm versum nos deflexa.

Imò & quamvis generationes, corruptionesque in Terra fiant: non posse probari, quin fiant similiter in cæteris; tametsi ipsas non magis videamus, quàm videri possent ex Luna, & cæteris eæ, quæ in Terra fiunt.

Si fiant, non posse proptereà ipsos reputari imperfectos: quoniam imperfectio est quidem posse



vnā rem quāpiam corrumpi, siue esse desinere, non autem manendo incolumem, posse ex corruptione quorundam, alia, aliāque prognerare. Esse sanē longē maiorem in ipsa Terra perfectionem parturire hanc tantam florum, aliarumque rerum elegantiam, cū id citra vllum molis suæ detrimentum faciat; quā si corruptione immunis, absque vlla prorsus suæ superficiei immutatione perseueraret.

Ad-hæc, non modò Terram, & Lunam commutare vices, dum sese vicissim obscurant, & illuminant; sed etiam quicquid Venus, aut Mercurius apparent Terræ, apparere Terram Marti, Ioui, & Saturno. Et quicquid Mars, Iupiter, aut Saturnus Terræ apparent, Veneri, & Mercurio Terram apparere; hoc est, quod attinet ad motum, formamque ipsius; quodd ad magnitudinis variationem, quod ad Pha-  
seis, & cætera.

Quod reputatur QVINTÒ inconcinnum, im-  
mensam adeò habere illam Fixarum à Terra distan-  
tiam, vt totus iste Magnus orbis puncti instar habendus sit:

Respondent; cū nulla sit ratio, nec sensu facta obseruatio, quæ eam minorem esse conuincat; & ex ipsa aliunde supposita, Phænomena omnia concin-  
niùs saluentur, quā dum minor, iuxta vulgarem opinionem, supponitur; ideò non videri eam iure inconcinnam existimari.

Nam quòd vastitas quidem tanta reputetur super-  
flua; videri illos, qui ita sentiunt, esse summi Opificis  
magnificentiae iniurios; dum non capientes, quor-  
sum



sum Deus tam amplum Mundum fecerit; eius potentiam, sapientiamque ad sui captus, &, ut sic dicam, ad suæ parsimonix angustias deducunt.

Quod DE MV M, fore ergo Solem quavis stella Fixa conspicua minorem; quando, si totus Magnus orbis conspici à Fixis, ob sui exilitatem non possit; longè fuerit minùs conspiciendus Sol, habitus dumtaxat quasi eius centrum:

Respondent, posse tamen Solem minorem non esse; & minorem licet, posse tamen adhuc ex ipsa Fixarum regione videri; quòd, ut lucernæ flammula procùt è tenebris conspecta in amplissimam speciem dilatatur; ita per tenebras nocturnas dilatentur disculi stellarum, qui absque tali dilatatione essent punctula merè inconspicua.

Quare & futurum, ut Sol perinde amplificaretur, spectatus è tenebris, efficereturque stellæ instar conspicuus; utcùmque absque amplificatione huiusmodi, euasurus esset punctulum planè incòspicuum.

## CAPVT IX.

*Quid ad ea, quæ ex Physica.*

**I**AM ex Physicis illud PRIMVM est, quòd infimus locus, quale Mundi centrum, siue medium est, corpori omnium grauissimo, qualis est globus Terræ, debeat.

Sed respondent; Primùm, ex mente Platonis, dari quidem in Mundo extremum, & medium; ve-

Bb



rūm non idcirco extremum Supremum; neque medium Infimum cenſeri. Quippe ſupremum, & infimum dici dumtaxat comparatè, ſiue reſpectu habito ad ſitum partium animalis, hominis verò maximè; cui, vbicumque in Mundo ſit, illud eſt ſuperius, ſuſumve, quod eſt ultra caput; & illud inferius, deorſumve, quod eſt ultra pedes.

Deinde, Terræ quidem parteis eſſe, dicive poſſe graueis, quatenus ad Terram, vt ad totum, cuius incolumitas ex vnione partium dependet, feruntur; at totam Terram ſecundum ſe neque grauem eſſe, neque leuem magis, quàm Lunam, Venerem, aut quemlibet alium cæleſtium globorum, quorum partes ſimiliter, ſi quapiam vi diſtractæ fuerint, ſuum quæque globum pari iure repetent, & poterunt graues perinde cenſeri.

Ad-hæc, dari quidem in Terra centrum, ſiue medium, verſus quod ex accidenti graua ferantur (ex accidenti, inquam; nam per ſe feruntur dumtaxat verſus Terræ corpus, cui vniri appetunt; faciuntque interim id per breuiſſimam lineam, quam ſimul contingit reſpectare centrum) at non idcirco Terræ centrum idem eſſe cum centro Mundi; poſſeque adeo graua, vbivis in Mundo Terra fuerit, tendere verſus eius centrum.

SECUNDO illud, quod ſimplici corpori, cuiusmodi eſt Terra, vnicus ſimplex motus conueniat: Quare cum Terræ competat rectus, ipſeque deorſum (vt motus partium indicat) non competere circulare.



Sed respondent; falsum imprimis id esse, vt Terra simplex corpus sit, quod experientia docet potius esse ex rebus adeò heterogeneis variè commistum.

Deinde, ne corpori quidem simplici repugnare varietatem motuum, modò ij non sint in parteis simul oppositas; verùm sint ex iis, qui in eandem partem, regionemve conspirent; quemadmodum dictum iam est de globo supra planum voluto.

Ad-hæc, non ideircò competere toti, quod eius parti competit, si vt pars est, competat ipsi; alioquin enim totus homo deberet esse orbicularis, quòd eius caput tale sit: quare &, non ex eo, quòd partes Terræ rectà feruntur, oportere rectà ferri totam Terram; quandò motus rectus partibus eius competit, vt cum ea vniantur; Terra autem tota vnionem cum alia re non appetit.

Postremò, tamen si partium Terræ motus rectus sit proprius; ipsis tamen simul competere motum totius, hoc est circularem, quatenus dum cadunt, vnà interim transferuntur; eo modo, quo manui, præter motus proprios, sursum, deorsum, prorsum, retrorsum, in gyrum, &c. competit simul motus corporis rotius, cum quo incedente interim transfertur.

TERTIÒ illud, quòd Terra motu adeò rapido dissiparetur; nosque ipsi adeò rapidè translati; aërem à nobis proscissum, effectumque quasi ventum intolerabilem, non ferremus.

Sed respondent; Primùm, pollere Terram magneticam vi, qua terrena omnia reuincta contineat (eo scilicet modo, quo Magnes magnetica omnia, vt

Bb ij



frusta magnetis, ac ferri) & terrena eò modo attrahenda dici grauiā, non tam insita qualitate, quā impressa à Terra virtute; leuia autem censerī ea, quā minū sunt grauiā, minūve trahuntur, ac cedunt locum grauioribus; non, vt omninō distrahantur, sed solum, vt sint remotiora, siue exteriora; & cum propinquioribus, interioribusve, per intermedia cohaereant.

Deinde, non ideò dissipari Terram, quòd quemadmodum parteis sui omneis ab intimis, ad extimas vsque magnetica vi continet; ita moueat sese, & conuehat ipsas, veloci quidem, sed vniformi tamen, & æquabili, placidòque motu; non autem ita, vt vel subsultet, vel impingatur in aliquid, à quo succussa parteis exturbet, pellat-ve à se, aliòque, & citiùs, quā quò ipsa tendit, præjiciat.

Ad-hæc, quòd Aër quoque sit, ex ante dictis, terrenæ materiæ, & solidiorem ipsum globum, lanuginis instar circumvestiat; ideò ipsum vnā cum Terra ita circumferri, vt nos intra ipsum degentes, vnāque translati, cum non proscindamus, neque quasi ventum factum per sentiamus.

Et denique tamen, quoniam Aër fluxibilioris est substantiæ, neque tam velociter abripitur, ac solidus interior globus; heinc esse videri, cur sub Æquatore, & circiter ipsum, quā motus Terræ in ortum velocissimus est, aër sic resistat, inque occasum veluti eat, vt Nautæ illum quasi ventum & indefinentem, & æquabilem experiantur.

Ne quidpiam dicatur de Mari, quod ob sui quoque



fluxibilitatem non-nihil retardatum fluat, & ex sui cumulatione, obiective littorum refluat, vt paullo antè attigimus.

QVARTÒ illud, quòd nullum corpus aut sursum emissum, aut supernè dimissum, ad perpendicularum caderet, si dum esset per aërem, locus Terræ, cui immineret, perinde subduceretur, ac emissæ sursum sagittæ, dum naui transfertur, subducitur puppis è qua emissæ fuerit.

Sed respondent, Primùm, falsum esse sagittam fursum directè è puppi emissam, in puppim non recidere; vtcumque id hætenus fuerit, sed ab inexper- tis scilicet, obiectum. Nempe causam esse, quòd naui motum suum imprimat rebus omnibus, quæ ipsâ vehuntur, ac ipsarum interuentu mobilibus omnibus, quæ mittunt, aut dimittunt ipsæ. Et ex hoc fieri, vt dum arcus motum sagittæ imprimit fursum, imprimat simul motum prorsum, quem ipse interim à naui, aut ab homine, ab eadem naui transvecto habet; sicque sagittæ, dum est per aërem, immineat semper puppi, & in eam tandem recidat, propter huiusmodi motum.

Simile porrò esse, non modò, dum quis è pterna, seu pede mali, lapidem projicit in carchesium; verùm etiam, dum lapidem è carchesio dimittit in pternam. Is enim lapis neque dimissus ex parte puppis à malo deferitur, neque dimissus ex parte proræ, à malo attingitur; sed perinde in pternam, ac si naui quiesceret, cadit. Nimirum, quia licet dimittens nullum motum sibi proprium adhibeat, imprimit tamen ge-

Bb iij



neralem, quem habet à naui, malo intercedente, impressum; ex eoque fit, vt dimittens ex parte puppis lapidem, tantumdem ipsum versus malum interim aufugientem retrahat, quantus est motus ipsius mali; & dimittens ex parte proræ, tantumdem ante malum interim prosequentem conjiciat, quantus est motus eiusdem mali.

Itaque exemplum objectum ita posse retorqueri, vt pari modo Terra motum suum imprimat rebus omnibus à se vectis: ac lapidem emissum sursùm, idcirco in eundem Terræ locum recidere, quod projiciens ipsi non tantum propriam imprimat vim, qua adigit sursùm; verùm etiam vim, quam habet à Terra, & propter quam lapis tantumdem, quantum ipsa Terra, transferatur prorsùm; sicque, dum est in aëre, eundem semper locum respectet, & in eundem cadat.

Quo eodem modo, è Turri dimissus, in locum, cui imminet, cadit; quod licet dimittens motum suum proprium non adhibeat; motum tamen imprimit, qui sibi sit à Terra, turri intercedente, impressus.

Deinde; vt motus sagittæ, lapidisve è naui emissi, aut dimissi, non est reipsâ rectus, sed inflexus, & secundum lineam, quam dicunt Parabolicam; ac apparet tamen iis omnibus, qui in naui sunt, rectus, seu perpendicularis; quoniam oculus non percipit motum, quo vehitur ipse, quique est communis sagittæ, ac lapidi; sed illum dumtaxat, qui præterea imprimitur: Sic motum lapidis è Terra sursùm missi, aut è turri dimissi, non esse quidem reuerâ rectum,



sed esse per spatia Mundana admodum inflexum, & Paraboles apertissimæ; ac apparere tamen rectum, siue perpendicularem omnibus à Terra conuectis: quoniam pari modo oculus non percipiat motum, quo ipse interim à Terra transfertur, quique communis lapidi etiam est; sed alium solùm, qui præterea lapidi, aut à projectore, aut à gravitate, attractione-ve fuerit impressus.

Id solùm discriminis esse, quòd aliqui possint extra navim consistere, qui motum nautis perpendicularem visum, obseruent inflexum; at nemo extra Terram figere pedem valeat, vt inflexum deprehendat illum, qui videtur ipsis Terricolis perpendicularis.

QVINTÒ illud, quod globus bombardicus in occasum explosus longiùs tenderet, tanquam machina in ortum simul consequente: ac rursus explosus in austrum, vel boream, tantumdem semper aberraret à scopo, quantum scopus, dum globus esset per aërem, ferretur in ortum.

Sed respondent primùm; vt duo pilæ colludentes supra navis transtra parem quidem vim, quantum est ex se, pilæ imprimunt; vnde & habito respectu partium navis, tantum spatij peragit pila versus proram, quantum versus puppim: verùm qui est ex parte puppis, adiicit proprio motum navis; & qui est ex parte proræ, subducit; ac fit exinde, vt missa pila in proram, tantum præterea spatij aërei conficiat, quantum collusor à prora interim abducitur, dum pila est per aërem; & missa in puppim tantò minùs conficiat, quantò, dum pila est per aërem, collusor à pup-



pi versus eam accedit: Pari prorsus modo, si sint duæ machinæ, altera ad ortum, altera ad occasum, ad se inuicem paribus viribus collineantes; tantumdem spatij ab exploso ex vtrâque globo supra superficiem Terræ confici: quoniam licet globus explosus in ortum, habeat superadditam à Terra vim, explosus in occasum, subductam; interim tamen, quæ machina explosit in ortum, tantumdem globum consequitur, quantum ipsi motus à Terra accepti impressit; & quæ explosit in occasum, tantumdem à globo abducitur, quantum ipsi motus à terra accepti subduxit: sicque compensatione additionis, & subductionis facta, globus perinde supra terram motam, ac supra quietam promouetur.

Deinde, globum siue in boream, siue in austrum directum, perinde attingere scopum, ac si Terra quiesceret; quod dum & machina, & scopus versus ortum feruntur, feratur simul & globus per aërem trajectory, ob superadditam à Terra vim; ex qua efficitur, vt hæc tria, machina, scopus, globus, intra eandem rectam semper contineantur.

POSTREMÒ illud, quod nubes, aues, aliæque in aëre suspensa, apparerent semper rapidissimè ferri in occasum.

Sed respondent, primùm; vt qui per transtra nauis salit, non modò motum sibi proprium, donec per aërem est, habet; verùm etiam motum impressum à naui, quo vnà cum naui transfertur, quamcumque in partem motu proprio saliat: Ita volucrum, v. c. dum supra Terra superficiem, ac per aërem volitat,



volitat, habere præter motum proprium, etiam generale à Terra impressum, quo vnà cum ipsa transfertur, quamcùmque in partem ipsa interim voliret, aut quomodocumque in aëre hæreat, suspensa, ve videatur. Quod idem proportionem de nube, cæterisque dicendum est.

Deinde, sicut salienti per transtra navis, tunc motus navis imprimitur, cùm eius pedes attolluntur; ita motus Terræ tunc imprimitur auibus, cùm primùm è Terra, arbore, aliave re Terræ hærente, simulque translata, assurgunt; repeti autem, ac velut inculcari, quoties volucres, ne ad perpendiculum, seu in locum Terræ, cui imminet, cadant, alis aërem verberant. Nempe aër etiam cum Terra translatus fulcimenti loco est, cui illæ innixæ motus suos instaurent, vt esse possunt scamna transtris imposita, per quæ ille dissulter.

Denique, vt res meliùs concipiatur, considerandos esse pisces intra aquam cuppâ contentam, quam transferat navis. Quippe, vt pisces vnà cum aqua motu generali navis transferuntur, & interim tamen perinde aut hærent, aut hûc illûc variè mouentur intra cuppam, ac si aqua quiesceret, neque cum naui transueheretur; sic aues, & quæcumque alia in aëre sunt, ita motu Terræ generali transferuntur, vt perinde aut hæreant, aut quolibet versum per aërem moueantur, ac si aër quiesceret, neque cum Terra transferretur.



## CAPVT X.

*Quid ad ea, quæ ex S. Scriptura.*

**Q**VÆ demùm loca Scripturæ Sacræ obijciuntur; cuiusmodi sunt, vt videantur quietem Terræ partim expressè asserere, vt illa, *Terra in æternum stat; &c.* vel tacitè, quatenus motus non Terræ, sed Soli tribuitur, vt illa, *Oritur Sol, & occidit; &c.* *Regressus est Sol decem li-  
neis; &c.* *Sol contra Gabaon ne mouearis, &c.*

Verùm respondent illi, imprimis; Scripturæ Sacræ scopum non esse, vt homines aut Physicos, aut Mathematicos efficiat; sed vt pios, & ad salutem, seu gratiam, gloriamque supernaturalem comparatos reddat. Quare & loqui eam de rebus, quatenus apparent omnibus vulgò hominibus; vt quoniam sua salus omnium interest, intelligi ab omnibus possit.

Parùm curare ipsam proinde, quales res in se, & reuerâ sint; cùm erudiendis alioquin ad salutem hominibus, vulgares de rebus notiones sufficiant. Nempe, nisi plerâque loca hoc modo exposuerimus; hoc est, dixerimus Scripturam ad vulgi captum se demisisse, Scriptores-ve Sacros sese temperasse, accommodasseque rudi populo; futuros nos procùl à germano sensu, quo Spiritus Sanctus intelligi voluit.

Ac ne longè ab argumento, quod sit præ manibus,



abeatur; Reputare Scripturam Sacram parùm inter-  
esse, Terra-ne cum Cælo collata punctum sit, an-non:  
Ac ideò de Cælo, Terræque, vt de duabus Mundi par-  
tibus insignibus loqui; quoniam tales esse videantur,  
dum Cælum, vt fornix, Terra, vt tabulatum Mun-  
dani ædificij apparet. Ac rursus, parùm interesse, Mi-  
nimæ-ne stellæ in Firmamento lucentes maiora sint  
luminaria, quàm Luna, an-non: atque idcirco loqui  
de Luna, vt de luminari secundum Solem magno;  
quoniam Luna, vtcumque minor, minúsque in se  
lucida, quàm stellæ; ob viciniam tamen & maior, &  
ampliore luce illustrans apparet.

Eodem ergo modo Scripturam reputare, parùm  
referre, Terra-ne moueatur, Sol verò quiescat, an-  
non; ac propterea loqui de Terra, vt quiescente, quo-  
niam quiescere; & de Sole, vt moto, quoniam mo-  
ueri nulli non apparet.

Quare & posteriora quidem illa loca paucis expe-  
diri; Sapientem scilicet, cum dixit, *oriri Solem, & oc-  
cidere*; contendisse solùm significare vicissitudinem  
in ortu, occasuque Solis apparentem; seu foret dein-  
de Terra, seu Sol, cuius motu contingeret. Et Pro-  
phetam, cum dixit, *Solem regressum decem lineis*; aliud  
nihil voluisse, quàm quod apparuisset intelligi; seu  
Solis, seu Terræ fecisset regressio. Et Patriarcham,  
*Solem non moueri* cum iussit; id solùm curasse, vt Sol  
appareret supra Terram consistere; seu Sol demùm  
exeret, seu Terra, cuius statu id præstaretur.

Posse addi circa priora, intelligenda illa videri;

Cc ij



non de eo statu, qui motui, sed de eo, qui exsolutioni, corruptioni-ve opponatur.

Et cum verba præsertim illa, *Terra in æternum stat*, in ore sint omnium, adnotandum esse locum integrum his exstare verbis, *Generatio præterit, & generatio aduenit; Terra autem in æternum stat.*

Nimirum, ut dum cereæ massæ figilla varia applicantur,figurationes variæ fiunt; & dum aliæ prætercunt, aliæ adueniunt, seu figurarum aliæ abolentur, aliæ in vicem earum succedunt, massa tamen cereæ non corrumpitur, seu nec minuitur, nec augetur, sed perseverat eadem: Ita videri intelligendum; licet ab usque Mundi initio factæ sint in Terra, ac etiamnum fiant, & faciendæ deinceps sint generationes variæ; non idcirco tamen, dum generationes prætereunt, & adueniunt; seu aliæ formæ terrenorum corporum dispereunt, aliæ in ipsarum locum inducuntur, ipsam Terræ massam corrumpi, augeri-ve, aut minui; sed eandem constanter perstare, ac tantam adhuc esse, futuramque in posterum, quanta ab usque initio fuit.

Itaque, cum ista videatur loci præsertim celebris interpretatio esse germana; videri ex ipso, Terræ asseri, non tam in loco consistentiam, quam in integritate constantiam.

Urgeri heic solet Sententia Congregationis Cardinalium Inquisitioni præfectorum, qui in Galileo opinionem hanc de motu Terræ damnauerint:

Respondent verò Orthodoxi (nam Heterodoxi



rem breuius conficiunt ) sententiam illam fuisse specialem, seu Galileum sic attinentem, vt habere aduersus ipsum speciales causas potuerit, aduersus alios non valituras. Addunt sententiam quidem illam permagni esse ponderis; sed non ideò tamen necessariò habendam, vt articulum fidei, cuiusmodi habentur, qui sunt à Conciliis generalibus constituti. Subijciunt, non videri eam saltem, quovsq; promulgata, hoc est, præscripta legitimè, vt dogma quoddam Fidei fuerit, Fideleis omneis obligare. Tandem profitentur, si semel præscripta legitimè fuerit, se ad recantandum esse comparatos.

Et sic illi quidem tueri se solent.

## CAPVT XI.

*Quid de Siderum à Terris distantia, & magnitudine definiant.*

**C**V M partim ex rationibus, partim ex exceptionibus, responsionibusve Copernicanorum, peruiderimus vt illi conentur omnia saluare Phænomena; vix quicquam aliud heic superest, quàm vt paucis commemoremus, quam Sideribus à Terra distantiam, quam magnitudinem singulis attribuant.

Et Copernicus quidem ipse dicere contentus Sphæram, regionemve Fixarum adeò à Terris esse distantem, vt comparatus ad ipsam Magnus orbis, tanquam punctum habendus sit; mensuram præterea non adhibuit, qua specialius quid de hac distantia pronun-

Cc iij



ciaret. Contentus etiam de Solis, ac Lunæ magnitudine dicere (Solem nempe esse maiorem Terrâ vicibus 162. ferè, & Lunam 43. proximè) nihil de Siderum aliorum, siue Errantium, siue Inerrantium magnitudine consimile dixit.

Verùm succurrit ante annos quindecim Philippus Lansbergius, qui, vt Planetarum distantiam, magnitudinemque comparatè ad Terram definiit; ita Fixarum tum distantiam, tum magnitudinem designauit comparatè ad Magnum orbem, quem & Sphæram terræ appellauit.

Quod itaque primùm ad Distantiam spectat; De Planetis quidem hunc in modum statuit.

|  |            |   |       |
|--|------------|---|-------|
| Distantia<br>mediocris,<br>qua absunt<br>à Terra | Luna,      | est terrena-<br>rum Semi-<br>diametro-<br>rum | 59    |
|  | Mercurius, |   | 1500  |
|  | Venus,     |   | 1500  |
|  | Sol,       |   | 1500  |
|  | Mars,      |   | 2275  |
|  | Iupiter,   |   | 8091  |
|  | Saturnus,  |   | 14880 |

De Fixis verò, supposita semidiametro Magni orbis terrenarum semidiametrorum 1500, supposuit quoque Fixarum stellarum ad Magnum orbem Parallaxin, vix vnam octauam, aut nonam minuti partem excedere; ac proinde edixit Fixas, Fixarumve Sphæram abesse à Terra semidiametris Magni orbis 28000; seu maius semidiametris terrenis 42000000.

Quod deinde ad ipsam Magnitudinem attinet; Supposuit primùm circa Planetas, esse apparenteis



diametros, Lunæ quidem, minorum ferè 33. Solis, ferè 35. cæterorum, non aliam, quàm quæ superius ex Albategnio, Alphraganóque recensita est.

Circa Fixas autem, propter telescopium, quo spuria ab ipsis rescinditur lux, minores earum diametros, quàm vulgò putarentur, habuit; Nimirum stellarum I. magnitudinis, minuti 1. II. secundorum 40; III. 30; IV. 20; V. 10; VI. 4.

Vnde & de magnitudine Planetarum sic censuit.

|      |           |           |   |                  |                              |
|------|-----------|-----------|---|------------------|------------------------------|
| Sunt | Luna      | } minores | { | 45 $\frac{1}{2}$ | } vicibus,<br>quàm<br>Terra. |
|      | Mercurius |           |   | 12               |                              |
|      | Venus     |           |   | 3 $\frac{1}{2}$  |                              |
|      | Sol       | } maior   | { | 434              |                              |
|      | Mars      |           |   | 8                |                              |
|      | Iupiter   | } maiores | { | 25 $\frac{1}{2}$ |                              |
|      | Saturnus  |           |   | 46 $\frac{1}{2}$ |                              |

De Fixarum verò magnitudine sic.

|                           |      |           |   |                 |  |
|---------------------------|------|-----------|---|-----------------|--|
| Sunt Fixæ<br>Magnitudinis | I.   | } maiores | { | 67              | } vicibus,<br>quàm<br>magnus<br>orbis. |
|                           | II.  |           |   | 20              |  |
|                           | III. |           |   | 8               |  |
|                           | IV.  |           |   | 2 $\frac{1}{2}$ |  |
|                           | V.   | } minores | { | 3               |  |
|                           | VI.  |           |   | 25              |  |

Ita scilicet correctione numeris eius adhibita: cum prius edidisset stellas Magnitudinis I. excedere orbem Magnum vicibus 20053; II. 5935; III. 2506; IV. 744; V. 92; VI. 11  $\frac{1}{2}$

Porrò, quia non modò stellæ Inerrantes, sed Errantes etiam, intercedente telescopio, deprehendun-



tur diametro minore, quàm vulgò habeantur; idcir-  
cò Martinus Hortensius discipulus, Adjutorque  
Lansbergij, admonitus facta à nobis obseruatione  
Mercurij commemorata superius, & quibusdam  
præterea alijs; supposuit imprimis stellarum Erran-  
tium apparenteis diametros esse, Mercurij quidem  
secundorum 19. Veneris 53. Martis 36. Iouis 50. Sa-  
turni 37; ac tum de illarum magnitudine ita pro-  
nunciauit.

|      |   |           |              |   |                |                |
|------|---|-----------|--------------|---|----------------|----------------|
| Sunt | { | Mercurius | mino-<br>res | { | 6510           | } vicibus,     |
|      |   | Venus     |              |   | 1109           |                |
|      |   | Mars      |              |   | 1534           |                |
|      |   | Iupiter   |              |   | $1\frac{1}{4}$ |                |
|      |   | Saturnus  |              |   | $2\frac{1}{5}$ |                |
|      |   |           | maior        |   |                | quàm<br>Terra. |

Supposuit verò diametros stellarum Inerrantium  
esse, Sirij quidem, seu Canis maioris, præter ordi-  
nem positi, secundorum 10. & cæterarum Magnitu-  
dinis I. secundorum 8; II. 6; III. 5; IV. 4; V. 3;  
VI. 2; ac tum Sirium habuit Magno orbe minorem  
vicibus  $3\frac{1}{5}$  & cæteras fixas itidem minores, vt con-  
sequitur.

|                                |   |      |                                       |   |                 |   |
|--------------------------------|---|------|---------------------------------------|---|-----------------|---|
| Sunt Fixæ<br>Magnitu-<br>dinis | { | I.   | minores<br>Magno<br>orbe vi-<br>cibus | { | $6\frac{1}{5}$  | } |
|                                |   | II.  |                                       |   | 15              |   |
|                                |   | III. |                                       |   | $25\frac{1}{5}$ |   |
|                                |   | IV.  |                                       |   | 50              |   |
|                                |   | V.   |                                       |   | 122             |   |
|                                |   | VI.  |                                       |   | $412$           |   |

Quin etiam, quia supposuit quoque, assumi posse  
(vti assumptum à Lansbergio iam fuerat) Fixarum  
paralla-



parallaxin ad Magnum orbem, secundorum 30. atque adeò assumi ipsarum distantiam semidiametrorum Magni orbis 6875. idcirco deduxit posse speciatim Sirium haberi Magno orbe minorem ducenties decies septies, & cæteras Fixas confimiliter, hac ratione.

|                           |      |  |        |
|---------------------------|------|--|--------|
| Sunt Fixæ<br>Magnitudinis | I.   | minores<br>Magno<br>orbe, vi-<br>cibus | 422.   |
|                           | II.  |  | 1012.  |
|                           | III. |  | 1725.  |
|                           | IV.  |  | 3385.  |
|                           | V.   |  | 8245.  |
|                           | VI.  |  | 27826. |

Verum hac de re nimis multa.


## CAPVT XII.

*Quale Mundi Systema sit, quod Tycho Braheus induxit.*

**E**X ijs, quæ de Copernici Systemate dicta iam sunt, in promptu est illud intelligere, quod Tycho Brahe, nobilis Danus, nouusque Hipparchus, inclinante iam sæculo superiore inuexit. Ea cuiusmodi ipsum proposuerit.

Dd





Cernere nimirum in eo primum licet, esse Firmamentum, seu Sphaeram Fixarum partem Mundi extimam; intimam verò, occupantemve ipsius centrum, esse Terram: ac in interstitio collocari Planetas, qui motus illeici suos obeant per liberrima, hoc est, fluidissima spatia.

Nimirum Tycho maximè fuit, qui solidas sphaeras confregit, deturbauitque ex aethere; postquam



Cometas traicere per ætherea spatia vt obseruauit, sic demonstrauit primus; ac Mercurium, & Venerem vltra, ac citra Solem ferri deprehendit; aliaque huiusmodi: interim autem censuit fusam esse per illa spatia tenuissimam quandam, & purissimam, fluxibilissimamque substantiam, quam & dixit Auram ætheriam.

Deinde, Tria quædam mobilia ferri circa Terram, tanquam circa centrum; Lunam quidem proximam, motu menstruo; Solem remotiorem, & quasi medium, motu annuo; Firmamentum, seu sphæram Fixarum remotissimam, motu illo lentissimo viginti quinque millium annorum.

Ad-hæc, Quinque Stellas Erranteis motus speciales circa Solem, tanquam circa centrum obire; Mercurium scilicet trimestrem, Venerem octimestrem, Martem biennem, &c. & ea quidem lege, vt Sol annuo motu Zodiacum percurrens, illos omnes circumuehat; ac ipsi interim Mercurius, & Venus, suis circa illum reuolutionibus, non complectantur Terram; complectantur autem suis, Mars, Iupiter, atque Saturnus; & Mars speciatim fiat interdum Terræ propior, quàm ipse Sol.

Postremo, cùm nullam heic fieri motus diurni mentionem videas; intelligendum esse videtur, tria illa eadem Mobilia, Lunam, Solem, Sphæram Fixarum, dum suis illis motibus secundum Zodiacum feruntur, volui interim dietim in occasum, veluti per se: Quinque autem stellas Erranteis, præter motus proprios circa Solem; & secundum Zodiacum,

Dd ij



ferri etiam dietim in occasum; non per se, sed traductas à Sole, qui sit ipsis vice primi Mobilis. Necessè est nempe, ut cum Sol eas omneis sibi quasi auriga reuinctas contineat, easdem dietim circa Terram, cui ipse circumducitur, circumgestet.

Dixi porrò Systema hoc posse ex deductis de Copernicano perfacile intelligi; quoniam, si loco circuli per Solem transeuntis, ducatur alius per Terram transiens (qualem punctatum adiecimus) eadem distantia inter Solem, & Terram pro semidiametro retentâ, & aut Planetaria cōpages, aut Fixarum sphaera tantisper emoueri sic intelligatur, ut Saturni circulus ex aequo à Fixis vndequaque distet; habebis omnino quale antè est ex Copernico Systema descriptum.

Quippe erit tum Sol in medio, siue centro Systematis: circumducentur ipsi proximè Mercurius, & Venus; remotius Mars, Iupiter, & Saturnus; in medio verò interuallo reperietur Terra cum circumducta sibi Luna. Adeò proinde, ut Copernicus censeret non iniuriâ præiuisse Tycho ni possit; & Tycho nihil aliud, quam Copernici inuertisse Systema videatur.

## CAPVT XIII.

*Quibus rationibus adductus illud excogitauerit.*

**A**C receperat quidem Tycho se pluribus Systema hoc declaraturum probaturumque, in Opere, quod destinârat de Instauratione Astrono-



miæ elucubrare: verumtamen morte præuentus rem præstare non potuit; ac scriptum duntaxat reliquit, se fuisse permotum, vt illud tale adinueniret, tum quòd tolerari neque Ptolemaicum, neque Copernicanum possent; tum quòd, iuxta ipsum, Phænomena omnia quàm aptissimè saluarentur.

Objecit autem Ptolemaïco, tum cælestium orbium distributionem inconcinnam; tum assumptionem superuacaneam tot, tantorùmque Epicyclorum, saluandis Retrogradationum, Stationumque Phænomenis; tum peccatum illud contra artis principia, quòd in ipso circularis motus æqualitas non circa proprium, sed circa alterius Eccentrici (Æquantis nimirum) centrum admittatur. Ne quidpiam de soliditate Sphærarum cælestium adjiciam, quam cum nuperis obseruatis stare non posse idem perdocuit.

Copernicano verò objecit potissimum tria; Vnum, quòd tamen in eo scitè admodum præcaueantur quæ superflua, dissentaneæque in Ptolemaïco habentur, ac nihil reipsâ aduersus principia Mathematica delinquatur; admittatur tamen absurditas illa contra principia Physices, quòd Terram, cum sit gròssum, inquit, pigrum, inhabiléque ad mouendum corpus, haud dissolutiore tenore motus (illiusque etiam triplicis) quàm ætherea illa Lumina agitari statuatur. Alterum, quòd proinde Sacris aduersetur Literis, aliquoties ipsius Terræ stabilitatem confirmantibus. Tertium, quòd illam capacitatem inter orbem Saturni, & octauam Sphæram, esse propemodum immensam, & Sideribus tamen prorsus vacuam, supponat.

Dd iij



Postremò autem in sui gratiam illud præsertim commemoravit, quòd, deuitatis omnibus huiusmodi incommodis, dum Sol annuo motu Zodiacum perlustrat, ac interim quinque Planetæ ipsum comitantes, suos circa illum motus peragunt; saluentur exinde, absque vllis Epicyclis, Phænomena illa Stationum, Retrogradationumque præcipua; ac declaretur, cur Mercurius, & Venus tam parùm à Sole digredi appareant; cur Mars, Iupiter, & Saturnus ipsi interdum opponantur (Terrâ scilicet interceptâ) cur tunc proximè Terram transeant, & specie maximè grandescant; cur in supputandis singulorum motibus, motus Solis simplex commistus semper reperiatur; & quæ sunt alia huiusmodi.

Quod spectat verò ad reliquas inæqualitatis apparentis differentias, quas veteres per Eccentricos, & Aequanteis, Copernicus per Epicyclum in circumferentia Eccentrici saluârunt; dixit eas quoque facile posse in sua saluari Hypothesi, siue per Circellum in orbe circa Solem Eccentrico; siue per duplicem Circellum in quopiam orbe Concentrico; vt se plenius explicaturum in affecto illo Opere promisit.

## CAPVT XIV.

*Qua ratione id à Tychonis Sectatoribus propugnetur.*

**C**V M porrò his iam temporibus eam esse Planetarum dispositionem constet, vt necesse, planè videatur aut Copernicanum, aut Tychonicum Systema esse verum; idcirco sunt plures (imò penè



omnes aliunde auersati Copernicum) qui, improba-  
ris Veterum Hypothesibus, Tychonem sequantur,  
partim inducti nominis, obseruationumque cæle-  
stium ab ipso peractarum famâ; partim persuasi con-  
stare semper, quicquid Copernicani respondeant, quæ  
objecta superius sunt tum ex Astronomia, tum ex  
Physica, tum potissimum ex Sacra Scriptura.

Et quia tamen illis quoque difficultates variæ op-  
ponuntur; idcirco ita illis occurrunt, ut vices eorum  
suppleant, quæ Tycho fortassis fuisset responsurus.

Nam PRIMVM quidem obijcitur; absurdum  
esse vni corpori duos per se motus tribuere; quales  
scilicet attribuuntur Lunæ, Soli, ac Firmamento,  
dum asseruntur specialeis circuitus secundum Zodia-  
cum, seu versus ortum peragere; & interim tamen  
diurna reuolutione ferri in occasum.

Verum Respondent aliqui, non ideo his tribus, cui-  
libetve ipsorum, competere duplicem motum; sed  
competere vnicum, ipsumque spiralem, ac versus oc-  
casum. Res intelligitur ex ijs, quæ dicta superiore li-  
bro circa Hypotheseon varietatem sunt. Adnotan-  
dum solum, debere proinde ferri ipsam fixarum Sphæ-  
ram velocissimè omnium in occasum; ac spiras descri-  
bere confertissimas, attiguaeque; Solem moueri se-  
gnius, & laxiores spiras describere: Lunam moueri  
segnissimè, & describere laxissimas spiras. Heinc au-  
tem fieri, tum ut Sol diebus singulis vno gradu, &  
Luna tredecim retardatior, quàm Fixæ, moueri in  
ortum videantur; tum ut Sol anno vno, & Luna  
vno mense excursus in boream, & in austrum sic per-



agant, vt sub ipsis fixis circuitiōnem complēant.

Cū dicere verò hi nequeant, cuius respectu ipsum Firmamentum censeatur pariter in boream, & in austrum excurrere; idè Respondent alij, admittendum esse supra Firmamentum primum Mobile, quod diētim reuoluat Firmamentum versus occasum; ac ipsum interim Firmamentum proprio sibi motu moueri in ortum, secundum Zodiacum; ac pro illius obliquitate tendere in boream, & austrum. Nempe necessariam aliunde supra Firmamentum esse aliam Sphæram, cui inesse intelligantur Dodecatemoria, immobiliave Zodiaci signa, donec mobilia, seu Asterismi, secundum illius ambitum discurrunt.

SECUNDÒ; per-quàm incongruum esse, Firmamento, aut etiam vltiori Primo mobili existenti tanto, tamque procū abducto, diurnum motum tribuere, qui & celeritatis incredibilis sit, & utilis esse non possit ad circumducendum Planetarum Sphæras, vt quæ solidæ nullæ sint, neque idè abripi possint.

Verū Respondent, neque Firmamentum, vltiusve etiam mobile, tantæ esse vastitatis, quantam fingit Copernicus; neque eius motum celerrimum licet, reputandum esse incongruum; quòd ipsi moli corporis congruat; ac, vt motus ille, quo Equus spatium conficit, non est habendus respectu ipsius incredibiliter celer, qui incredibiliter celer foret respectu Formicæ, aut Testudinis, si tempore eodem idem spatium perageret; ita reputari non debeat supra omnem fidem, celer motus in Firmamento, vltioreve Sphæra;



sphæra; qui posset tamen in paruo globo huiusce-  
modi reputari.

Quod subiicitur verò de impressione, quæ non  
possit mobilibus Firmamento inferioribus, ob inter-  
ceptorum spatiorum fluiditatem fieri; aut talem nul-  
lam impressionem esse omninò necessariam, si mo-  
tus quidem inferiorum mobilium secundum spiras  
fieri censeantur; aut etiam tam posse impressionem  
ipsis Planetarum globis fieri, etiam seclusis solidis  
sphæris, & per spatia liberrima; quàm fieri ab ipsis  
Copernicanis admittitur, dum radiis à Sole emissis  
circumagi posse Planetas, in liquidissimo æthere pa-  
riter versanteis, admittunt.

TERTIÒ; inconcinnum esse admodum, com-  
paginem illam Planetarum totam dietim veluti luxa-  
ri, tum circa ipsam Terram, tanquam circa centrum  
non suum; tum sub ipsa Fixarum sphæra, à qua inæ-  
qualiter absit, seu cui concentrica non sit.

Verùm Respondent, nihil esse posse in eo opere  
inconcinnum, quod sapientissimus Opifex dispo-  
suit. Quippe neque fieri ullam luxationem, cum  
Planetæ à Sole circumducuntur circa centrum non  
suum, vt reputari posset, si quapiam gravitate distra-  
herentur, & pars maior compaginis ex vna Terræ  
parte, ac pars minor ex alia non possent velut æqui-  
librari: Neque à nemine non admitti esse Planeta-  
rum circuitus respectu sphære Fixarum Eccentricos;  
cùm & aliunde ipsa Planetarum compages ita circa  
Terram dietim reuoluatur, vt quælibet ipsius pars  
concentricum illi circulum describat.

Ee



Non esse verò, quod præterea vrgeri potest, insolens, Planetas, donec circa Solem speciales motus obeunt, adeò interim detorqueri, vt abducti motu rapidissimo adigantur ad peragendum diurnas illas circuitiones; Quippe & secundum Ptolemaicos, Planetas proprios obeunteis motus, à mobili interim alio diuerti, atque abripi: & secundum Copernicanos, ipsam speciatim Terram, dum motu sibi proprio circumducitur, deduci, interim, abripique alio à Sole, per radios emissos impresso. Quo modo quoque & ipsam Lunam, dum Terræ circumducitur, simul cum ipsa interim per Zodiacum à Sole transferri; & Planetas etiam, Lunulasve Iouiales, dum ipsi Ioui circumferuntur.

POSTREMÒ, esse prorsus improbabile, inane esse illud tantum inter Venerem, Martemque interstitium; & spatio tanto habito, non posse adhuc Martem eatenus abduci, vt ipsius circuitus non interfecet circuitum Solis.

Verùm Respondent; vt Conditor Mundi fecit interstitia Fixarum adeò inter se inæqualia; sic fecisse illum vt spatia inter Planetas inæqualia forent. Nempe varietate res gaudent, & Mundi perfectio in ea sic consistit; vt deberet potius videri improbabile, nisi talis varietas in rebus naturæ obseruaretur.

Sectionem porrò illam circuitus Solis à circuitu Martis, nulli esse obstaculo; tum quia huiusmodi circuitus per liberrima spatia sunt, ac mente dumtaxat cernuntur; tum quia non possunt vnquam Sol, &



Mars sibi ad ea loca inuicem occurrere ; quoniam Mars in ipsis non est, nisi dum est Acronychus, seu circiter ipsam sui cum Sole oppositionem.

Et sic illi quidem sententiam defendunt.

CAPVT XV.

*Quæ sit iuxta ipsum Distantia, & Magnitudo Siderum?*

**S**VPEREST, coronidis vice; cum Tycho non modò improbârit vastitatem illam ingentem Copernicani Systematis, sed Systema quoque Ptolemaïco longè angustius inuexerit : superest, inquam, peruideamus, quid opinatus fuerit non modò de distantia, & magnitudine Planetarum, sed etiam de distantia, & magnitudine Siderum Affixorum.

Quod ad Planetas itaque spectat; postquàm ipso- rum parallaxeis, quantum licuit, venatus est, talem pronunciauit cuiusque (dum versantur circiter me- dias longitudes) à Terra distantiam.

|  |            |   |                                |
|--|------------|---|--------------------------------|
| Distantia<br>mediocris,<br>qua absunt<br>à Terra | Luna,      | est terrena-<br>rum Semi-<br>diametro-<br>rum | 56 <sup>1</sup> / <sub>2</sub> |
|  | Mercurius, |   | 1150.                          |
|  | Venus,     |   | 1150.                          |
|  | Sol,       |   | 1150.                          |
|  | Mars,      |   | 1745.                          |
|  | Iupiter,   |   | 3990.                          |
|  | Saturnus,  |   | 10550.                         |
|  |            |   | Ec ij                          |



Et postquam studiosè obseruauit, quantumque (telescopio nondum adiuuento) exquisitè potuit, apparen-  
teis singulorum diametros ita definiuit;

|  |          |                      |                 |
|--|----------|----------------------|-----------------|
| Diameter<br>apparens,<br>in distantia<br>mediocri, | Lunæ     | } est minu-<br>torum | 3 2             |
|  | Mercurij |                      | 2 $\frac{1}{2}$ |
|  | Veneris  |                      | 3 $\frac{1}{4}$ |
|  | Solis    |                      | 3 1             |
|  | Martis   |                      | 1 $\frac{3}{4}$ |
|  | Iouis    |                      | 2 $\frac{3}{4}$ |
|  | Saturni  |                      | 1 $\frac{1}{2}$ |

Tum Magnitudinem cuiusque, vt consequitur, pronunciauit,

|      |           |           |       |                              |
|------|-----------|-----------|-------|------------------------------|
| Sunt | Luna      | } minores | 4 2   | } vicibus,<br>quàm<br>Terra. |
|      | Mercurius |           | 1 9   |                              |
|      | Venus     |           | 6     |                              |
|      | Sol       | } maior   | 1 3 9 |                              |
|      | Mars      |           | 1 3   |                              |
|      | Iupiter   | } maiores | 1 4   |                              |
|      | Saturnus  |           | 2 2   |                              |

Ad Fixas verò quod attinet, postquam attendit debere eas esse euectiores Saturno, non modò cum est in distantia mediocri, qualis recitata iam est; sed etiam cum in maxima, quam statuit semidiametrorum terrenarum 12300. ac euectiores etiam secundi cuiusdam quasi Epicycli Apogæo, cui distantiam largitur semidiametrorum 12900. idcirco ait Fixarum Sphæram vix posse à Terra propius abesse, quàm semidiametris terrenis 13000.



Et cum sit incertum, vtrum omnes Stellæ æqualiter à Terris distent; ac verisimilius videatur earum quasdam altiùs, quasdam humiliùs intra eiusdem Octauæ sphaeræ capacitatem collocari; consultiùs fecerimus, inquit, si adhuc millenas semidiametros priori summæ aggregauerimus.

Quare & Distantiam Fixarum à Terra statuit præter-propter ( neque enim hæc, inquit, exacta, & subtili mensura sunt peruestigabilia ) esse Terrenarum semidiametrorum 14000.

Subinde autem ex hac distantia, & ex definitis, quantum licuit (citra telescopijs subsidium) diametris Fixarum apparentibus, in hunc modum;

|  |      |                      |                  |
|--|------|----------------------|------------------|
| Diameter appa-<br>rens Fixarum ma-<br>gnitudinis | I.   | } est minu-<br>torum | 2                |
|  | II.  |                      | $1 \frac{1}{2}$  |
|  | III. |                      | $1 \frac{1}{12}$ |
|  | IV.  |                      | $0 \frac{3}{4}$  |
|  | V.   |                      | $0 \frac{1}{2}$  |
|  | VI.  |                      | $0 \frac{1}{3}$  |

Deduxit cuiusque, pro suo ordine, magnitudinem, seu molem ita se habere;

|                                |      |           |                  |                              |
|--------------------------------|------|-----------|------------------|------------------------------|
| Sunt Fixæ<br>Magnitu-<br>dinis | I.   | } maiores | 68               | } vicibus;<br>quàm<br>Terra. |
|                                | II.  |           | $28 \frac{1}{2}$ |                              |
|                                | III. |           | 11               |                              |
|                                | IV.  |           | $3 \frac{1}{2}$  |                              |
|                                | V.   |           | $1 \frac{1}{28}$ |                              |
|                                | VI.  | } minores | 3                |                              |

Adjecit verò, cum non omnes primi ordinis, pri-

Ee iij



maue Magnitudinis stellæ, æquales inter se appareant,  
& proposita magnitudo conueniat propriè medio-  
cribus: adjecit, inquam, fieri posse, vt quæ in I. or-  
dine maximæ sunt, vti Canis maior, & Lyra, exce-  
dant Terram centies; quæ minimæ, quadragies quin-  
quies. Et sic quidem Tycho.

Verùm de hisce Systematis, deque tota Institutio-  
ne Astronomica hætenus.

*F I N I S.*







# ORATIO INAVGVRALIS.



EMIRABVNTVR, si qui me nōrunt, addictum diuinis muneribus virum ad humana digredi studia; & quasi propriæ functionis pigeat, suggestum Ecclesiasticum cum Academico commutare. Nimirum videri id potest, nomen dedisse militiæ sacre, & transfugere ad prophanam; manum misisse ad aratrum, & retrorsum aspicere; assertum esse in libertatem, & cogitare adhuc Ægyptum. Sanè verò, ad me quod spectat, non sine pudore rem aggrederer, si ipsam quidem ex spontaneo, proprioque delectu obirem; si non semel, ac iterum, tertiumque iussus obsequi, obtemperarem voci, quam licuit interpretari esse diuinam.

Ipsa porrò vox tua est, Eminentissime Cardinalis, qui Regi Christianissimo, à quo instituerer, oblaturus me, sic dignatus es me interpellare, vt

A ij

738

21-11



multum, diuque repugnantem tuam dicam patientiam, an bonitate fregeris; & qui poteras imperando, persuadendo malueris compellere tandem ad dendum manus. Nempe effecisti, ut intelligerem non vocari me ad prophanum munus, quod credentium Pater Abrahamus alienum a se non duxisset; cum, testantibus Hecataeo, Beroso, Nicolaoque Damasceno, docuerit Aegyptios numerorum, ac siderum scientiam. Et licet Aristoteles ipsos Sacerdotes Aegyptios Mathematicas inuenisse scribat, dum post exhibitum diis cultum, abunde esset temporis, quo feriari permitterentur; heinc saltem constare, eas creditas fuisse a viris diuinis originem ducere; neque ipsarum professionem fuisse habitam Sacerdotibus indecoram. Ac ne quis solos Ethnicos reputet hoc censu habendos; commendari ecce D. Basilium a B. Gregorio Nazianzeno, quod fuerit non mediocriter in Astrologia, Geometria, Arithmetica, aliisque versatus: & cum Patres ceteros, tum speciatim Beatos Hieronymum, & Augustinum passim declarare, quam hae disciplinae necessariae sint ad Scripturae Sacrae interpretationem.

Effecisti quin-etiam, ut intelligerem duplicem esse Codicem sacrum, quo Deus innotescere hominibus voluerit; alterum scriptum, & qui Sacrorum Bibliorum venit nomine; alterum apertam hanc faciem, siue maiestatem, ac Naturam rerum. Et cum priori interpretando destinati sint viri Theologi, supernaturali scientia eruditi; ad posteriorem interpretandum comparatos esse Mathematicos, qui



I N A V G V R A L I S.

5  
naturali scientia instructi haberi non immerito  
Theologi naturales valeant. Scilicet ipsam Veri-  
tatem, quæ non aliud à Deo est, manifestari dupli-  
ci luce, Reuelationis putâ, ac Demonstrationis; &  
prioris vti vocatam Theologiam, posteriore Ma-  
thésin solam; cum aliarum quidem, quæ dicuntur,  
scientiarum non demonstrationes, sed conjecturæ  
sint, nisi si qua luce Matheseos fruuntur.

Denique effecisti, vt intelligerem duplex esse  
Templum, in quo Deus Mystas, Sacerdotesve exi-  
gat; alterum nempe ipsam Ecclesiam, in qua iuxta  
Diuini verbi reuelationem adoretur, alterum Syste-  
ma hoc rerum, in quo agnitus iuxta characteres  
ineffabilis sapientiæ colatur. Quamobrem & me  
dumtaxat voluisti è Templo in Templum transfer-  
ri; quod cum gratiarum sint diuisiones, & in domo  
Dei mansiones sint multæ, credideris fore, vt mea  
qualiscumque industria posset in hac parte diuinæ  
familiæ non inutiliter collocari.

Itaque tua hæc est vox, qua, vt alter Samuel ( si  
dicere liceat) constanter vocatus mentē obediendo  
composui, ratus te locū in Ecclesia tenere adeò emi-  
nētem; te eā prouidentia dispensare munera, quibus,  
vt Maximus à sacris Regi Christianissimo, es præfe-  
ctus, vt resistere diutius puduerit; neque eam adire  
stationem, in qua me collocatum velles; ac pro vi-  
ribus eam Spartam, quam præscriberes, exornare.  
quin etiam probè memor cum fuerim heroicæ il-  
lius virtutis, consummataque pietatis, qua per-  
nosse te ab vsque Eremito, Infulisque primis præful-

A. iij.



gentem licuit, induxi facilè in mentem, quicquid consilij caperes, non posse à summa virtute, pietateque non proficisci.

Sisto proinde me iam Tibi, totique illustrissimo nobilissimoq; Confessui, ut opus aggrediar sub tantis auspiciis, quod iussisti me exsequi; & prælectiones habiturus Cosmographicas, seu de Mundo; ab hymno exordiar Conditoris Mundi. Siquidem, cum Plato, qui habitus est inter Philosophos diuinus, quærenti quid ageret Deus, celebre illud responderit, γεωμετρεῖν τὸν θεόν, *Exercere Geometriam Deum*; nihil videor facere posse, aut argumento accommodatius, aut generi vitæ meæ consonantius, aut Tua, totiusque Confessus celeberrimi attentione dignius; quàm si, cum ipse quoque personam Philosophi Christiani gerens, haud secus, quàm ille fuero responsurus, dicere adnitar, quî Deum exercere Geometriam putem.

Principio verò, cum Geometria, aut contemplando, aut agendo (ex quo distinguunt Theoremata, Problemataque) exerceatur: videri potest non incongruè intelligi Deum exercere Geometriam, tam dum contemplatur, ac potissimum sese ipsum considerat; quàm dum agit, maximè verò, Mundum creat, ac moderatur. Et de Contemplatione quidem ut primùm dicamus; supponendum profectò est, illud esse inter diuinam, humanamque discriminis, quòd humana ratiocinando, seu ex principiis ad conclusiones gradatim pergendo incedat; diuina, cui nuda, & aperta sunt omnia; cui



nullum consequens est minùs manifestum, quàm antecedens; cui omnis propositio, communis sententia, seu axioma est: diuina, inquam, simplici, & citra omnem successionem intelligētia perficiatur.

Donec porro Deus in seipsum attendit, ecquid inspicit, vt Geometricè contemplari quicquam censeatur? Scilicet primùm Naturam suam, ac deinde Triadem sacram Hypostaseon, seu Personarum. Nam imprimis quidem Naturam contuetur, habetque vt Sphæram, cuius (Ethnico etiam definiente) centrum sit vbique, circumferentia nusquam. Quo loco par est admonere; cùm Deum nemo viderit vnquam; cùm habitans Deus lucem inaccessam, & hominū, quasi noctuarum, oculos fulgore præstinguens, posuisse dicatur tenebras latibulum suum; eapropter non esse, cur nos miselli homunciones, & puluis, cinisque cūm simus, quidpiam de tanta Maiestate, quatenus in se est, non dico effari, sed ne hariolari quidem contendamus. Quocirca decere, vt nos sic habeamus; nosse Deum figmentum nostrum, & paternā quadam indulgentiā, ferre nos de se, non vt in se est, sed vt nostro captui congruum est, loquenteis; ac esse abundè, si ea balbutiamus, ex quibus ipse, quā bonus est, tanquam ex ore infantium, lactentiumque laudem perficiat.

Igitur concipimus Deum, dum suam speculatur naturam, habere ipsam, quasi Sphæram; quatenus à nobis nulla figurarum capacior, æquabilior, perfectior intelligitur: quatenus cūm sit summè indiuidua, est ipsamet veluti centrum, ex quo diuinæ



perfectiones, quas & proprietates, & attributa nominant, quasi radii quidam dimanent; quatenus istæ perfectiones sunt ipsi quasi circumferentia, quæ veluti circumscribatur, seu, quo potest modo definiri, discernatur ab omni re, quæ non est Deus. Quanquam, ne propterea veram aliquam limitationem imaginemur, nusquam exstare huiusmodi Circumferentiam dicimus, innuentes nullam perfectionum diuinarum esse extremam; nullam, in qua sit aliquid extremum. quo modo, ne vox quoque Cætri limitatum quid suggerat, id eò ipsum esse dicimus vbiq; innuentes naturam diuinam in omnibus, & cum omnibus perfectionibus idem esse; vt pote quæ fons simul inexhaustus, & Oceanus interminatus sit.

Ac mirari quidem par est Centrum tantæ fecunditatis, vt punctum cum sit, pro immenso tamen habeatur: sed illud nimirum idem est, quod Monas, siue vnitas; quo nomine Pythagoras iam olim designauit Deum. Dictum celebre Trismegisti est, Monas genuit Monadem, & suum in se reflexit ardorem; idque tum nonnulli de Sanctissimo Trinitatis mysterio accipiunt; tum D. Thomas censet potius ita esse interpretandum, vt intelligatur Deus, qui est vnus, mundum, qui etiam vnus est, ob sui amorem condidisse. Sed potest forsan res eò spectare, quod cum numeri in seipsos ducti, alios à seipsis gignant numeros: nam binarius bis quaternarium creat, ternarius ter nouenarium, quaternarius quater senarium denarium; Monas tamen, seu  
vnitas



### INAUGURALIS.

vnitas nihil aliud, quàm Monadem, seu vnitatem pariat; quoniam vnum semel, vnum tatum est. Et cum binarius, ternarius, cæterique numeri multiplici sui in seipsum ductu, reductuque, sese in quadratos, cubos, quadrato-quadratos, quadrato-cubos, cubo-cubos, aliosque maiores, maioresque numeros, vt in radios quosdam veluti diffundant: ipsa Monas, seu vnitas in seipsam perpetuò rediens, sibi-que & radix, & quadratum, & cubus, & alia existens, ipsos sui radios, seu ( nomine alio ) ipsum sui ardorem in seipsam reflectat.

Hac proinde ratione Deus verè Monas est, quatenus non potest enunciando duci in vllum sui attributum, quod Deus non sit, aut aliud de Deo, quàm Deum declaret. Quippe, dum quis dicit, Deus bonus est, nihil aliud, quàm dicit, Deus Deus est; quòd Deus sit bonitas sua, neque tam istud attributum, quàm Sapiencia, quàm cætera, aliud sint, quàm ipsemet Deus. Vnde & dici potest Monas enunciari de Monade, ac suum in se reflectere ardorem; quatenus diuina natura quodvis attributum enunciando refert ad se, suamque cum ipso communicat denominationem. Ac rursus esse idem cum Centro, quod vbique sit; quatenus nullum est attributum, in quo, & cum quo idem non sit, quòd-que in seipsam quasi non reflectat; instar lucidi in centro Sphæræ collocari, dum radij vt exeunt, sic redeunt in centrum.

Exinde verò intelligitur non modò Vnitas diuina; prout tam repugnat naturam Diuinam, quàm

B



aut Monadem, aut centrum sphaerae multiplicari; verum etiam Simplicitas, prout tam à Deo aliena est omnis compositio attributorum, quæ Deus non sint, quàm ab Vnitate omnis contextura quadratorum, & cuborum, qui vnitas non sint. Et cum aliunde Sphaera sit, cuius centrum vbique est, circumferentia sine extremo; intelligitur etiam, vt perfectione Infinitus, sic spatio Immensus, duratione Æternus. Imò & intelligitur, vt Immutabilis, prout nulla perfectio est, quam acquirere, nulla, quam amittere valeat; ita & Immobilis, prout non est locus, ad quem accedere, aut quo à recedere possit; & Ingenitus, atque Immortalis, prout inceptionis, defitionisque est incapax, vt putà τὸ ὄν, *idipsum, quod est.*

Prolixior æquo euaderem, si perconsere cetera vellem, aut in ijs etiam ostendere quas rationes Geometricas Deus contempletur. Nam circa Potentiam, vt exemplo dicam; relationem intelligens, quæ est inter vim motricem, & pondus, comparat creabilia omnia in nihilo sui quasi quiescentia, cum sua illa omnipotentia, quæ sola est par ipsis è nihilo dimouendis. Circa Iustitiam; tum similitudinis, tum æqualitatis rationes perspicuens, priorem agnoscit in specie illa iustitiæ, quam Distributiuam appellant, quatenus tribuit vnicuique secundum propria opera; posteriorem verò in illa, quam Commutatiuam; quatenus licet nemo prior dare, quod illi retribuatur, possit; ipse tamen est adeò bonus, vt ea, quæ largitur, munera coronet. Circa Boni-



tatem proinde, atque ad cò circa Clementiam, Misericordiamque: ad tam maioris, quàm minoris inæqualitatis rationes attendens, pervidet quò iuxta priorem remuneretur ultra condignum probos; quò iuxta posteriorem puniat citra condignum improbos. Circa Scientiam, atque id cò, circa Sapièntiam, Providentiamque; fortiter attingens à fine ad finem, sic, ut inter figuras congruas, incongruasque, intelligit quicquid est rebus omnibus vel consentaneum, vel dissentaneum, ut exinde sit ratio, qua omnia suaviter disponit. Circa denique Prædestinationem; altitudinem diuitiarum scientiæ, sapientiæque considerans; ac pernoscent quæ longitudo, quæ latitudo, quod profundum, seu quæ abyssus sit iudiciorum, decretorumque æternorum; commensurationem intuetur, quæ est inter hominum massam, operaque eorum vel bona, vel mala cum suo beneplacito; tametsi nobis fecerit iudicia incomprehensibilia, & non vestigabileis vias; ut sit quod miremur, potiusquàm scrutemur: quasi hæ sint nobis incommensurabiles, & veluti irrationales, seu surdæ, ac ineffabiles, ut vocant Geometræ, quantitates.

Iam, quod ad sacram Hypostaseon, Personarum-ve Triadem spectat; ipsa sanè esse videtur, ob quam dici potest Deus contemplando, *αὐτὸς θεὸς ὡς ἐστίν*, *eternam quandam*, ac ipsam quidem super-eminentem, super-excellentem, nulli comparandam, *exercere Geometriam*, iuxta illud, Pater meus usque modò operatur, & ego operor. Videlicet actu ipso contèplandi

B ij



duę Hypostasēs, seu Personę existunt; altera Intelligentis, seu Patris æterni; altera Verbi, seu æterni Filii. Et quasi Contēplatio hęc, qua Pater, & Filius cōstituti se mutuò spectant, sit eminentissima ratione, Propositio simul, & Assumptio incomparabilis Syllogismi; non potest non consequi ardor, seu potius non simul accendi, coexistere ve reciprocos Amor, tertia nimirum Hypostasis, Persona-ve Spiritus Sancti, quę Conclusionis cuiuspiam instar, numerum terminet productionum, Personarumque æternarum.

An ne proinde hoc adorandum Trinitatis mysterium habebimus rursus vt Sphæram, cuius quasi Centrum sit Pater æternus, qui totius Diuinitatis fons, origo, principium accommodatè dicitur; Circumferentia Filius, in quo legitur habitare plenitudo Diuinitatis: & Radij centro, circumferentięque intercedentes Spiritus Sanctus, qui est Patris, & Filij communis, & quasi intercedens ardor; ac veluti nexus, vinculum-ve mutuum? An ne potius dicendum est eminere in hoc Mysterio quicquid sublime, magnificumque humana Geometria etiamnum requirit? Percelebre est latere eam adhuc, quam Quadraturam circuli vocant: atque idcirco in eo esse, vt describat Triangulum, cuius si basin ostenderit circuli ambitui æqualem, tum demum esse Circulo Triangulum æquale demonstret. At in hoc Mysterio augustissimo gloriosissima Personarum Trias ita infinitę essentię, ipsiusque fecunditati, tanquam Circulo exęquatur, seu, vt sic loquar, & veriùs quidem, penitus identificatur, vt cum sit om-



nium, & cuiusque vna, atque eadem essentia; vna proinde, ac eadem sit immensitas, æternitas, & perfectionum plenitudo.

Sic, cum nondum nôrit humana Geometria trifecare angulum, diuidere-ve. &, citra accommodationem mechanicam, ostendere diuisum esse in tria æqualia: habemus in hocce Mysterio vnâ Essentiam non tam trisectam, quàm integram communicatam in tria æqualia Supposita, quæ cum simul, singillatimque totam, indiuiduamque possideant, sint inter se tamen realiter distincta. Et cum illa adhuc miretur in iis Angulis, quæ ad contactum circuli fiunt, dari quidpiam maius, dari quidpiam minus, non dari æquale; seu posse à minore ad maius, à maiore ad minus, & non tamen vnquam per æquale transiri: ecce in hisce Suppositis, Hypostasibus-ve diuinis cum ipsa Essentia identificatis, datur quidem produciens, datur & productum (quæ inter esse vulgò solet Disquiparantiæ relatio) & tamen non maius, non minus, sed æqualitas mera est; quando neque Persona produciens est causa, vt ea ratione maior sit; neque producta sic oritur, vt quasi effectus dependeat, sicque censeri minor possit.

Adhuc, ignorat illa adhuc descriptionem (non mechanicè factam) duarum linearum proportionalium datis duabus intermediarum, vt factum super secunda, facto super prima simile solidum, rationem cum ipso referat extremarum. Nempe ex hac re ignorata, notum est nesciri quâ duplicandus cubus



fit; ac peccatum propterea esse, cum iubente Minoë sepulcrum Glauci, & iubente Apolline Deliorum aram duplicare oportuit; vti & peccauit in oppositum Chares, cum duplicare Rhodium Colossus in dimensionem omnem aggressus, non-nisi materiae duplum postulauit. At hinc, miro modo, inter Deum, & Hominem, quasi extrema, datur, qui ex duabus Naturis constituitur, & cui inditum Mediatoris nomen, Θεάνθρωπος, Christus; Compositum nempe admirabile, quod in secunda Hypostasi, seu persona Verbi, (assumpta in illam naturam humanam) veluti fundatur; atque idcirco comparatum cum Natura alterutra, & reconcilians ima summis (vt in Ecclesia canitur) rationem refert extremorum. Quippe & cum vulgo Geometria suam commendet Hyperbolen, ob descriptionem τῶ ἀσυμπίπτων, incoincidentiumve linearum, etsi productæ in infinitum ad se inuicem continuo accedant; datur hinc Hyperboles genus, omni majus hyperbole, vt pote, in quo illa potius, quæ infinitè distant, iunguntur.

Quin-etiam, cum sese efferat Geometria, ob illud Problema, quo, Datis duabus figuris, conscribitur tertia, quæ alteri æqualis, alteri similis sit (nimirum reputat Plutarchus ipsum potius esse, ob quod Pythagoras immolauit, quàm celebre illud Theorema, de Quadrato subtensæ, includentium rectum laterum quadratis æquali) Illud hinc mirabile est, vt hinc Deo, hinc Homine, si modò liceat dicere, datis, constituatur quasi quid tertium ipse idem



Θεῶν ὁ Ἰσχυρὸς, seu Mediator dei, & hominum Christus, qui ex Symbolo, sit æqualis Patri secundum diuinitatem; & secundum naturam assumptam, sit ex Apostolo, in similitudinem hominum factus, habituque inuentus, vt Homo. Verum hæc satis de prior, siue Contemplatiua parte.

Ad Posteriolem, seu Actiuam, respectu nempe huius Mundi, vniuersitatis-ve rerum, quatenus Deus eius est Author, Moderatorque, quod attinet; perspicuum est fanè, non Philosophiam modò, sed Sacra etiam oracula edicere γεωμετρεῖν τὸν θεόν, *Exercere Geometriam Deum*; quandò non aliud sonant ea verba, quibus dicitur omnia facere in Numero, Pondere, & Mensura. Et quoniam Deus non alia ratione, vel ipso Platone authore, Mundum regit, quàm condidit (ex quo efficitur, vt Mundi, rerumque conseruatio intelligatur nihil esse aliud, quàm continens quædam productio) ideò sufficit pauca attingamus de ipsa diuina Geometria, tam circa originem Mundi, præcipuarumque eius partium, quæ constanter eadem perdurant; quàm circa institutam seriem suborientium continuò rerum.

Imprimis verò, cùm Deus æternam Mundi Ideam præhabuerit; quemadmodum ipse, vt prædiximus, intelligibilis Sphæra fuit, sic Sphæra corporeæ ideam, qua esse formosior figura non posset, concepit, ac ipsam deinceps expressit in opere;

Tu cuncta superno  
Ducis ab Exemplo; pulcrum, pulcerrimus ipse,



Mundum mente gerens, similique ab imagine formans.

Quid enim pulcrius eâ figurâ, inquit ille, quæ sola omneis alias figuras complexa continet; quæque nihil asperitatis habere, nihil offensionis potest; nihil incisum angulis, nihil amfractibus, nihil emnens, nihil lacunosum? Nimirum, tametsi figuræ Geometricæ ea perfectione æquabilitatis, indivisibilitatis, & similium, quibus definiri etiam vulgò solent, reperiantur solùm in Ideis diuinis (ac proinde solus Deus ad illas attendens agere censeatur perfectissimum Geometram) & taleis neque assequi mens, neque exhibere manus nostra valeat (vt ideò causari solitus sit Plato labefactari Geometriæ bonum, cùm illæ ex statu intelligibi ad sensibilem demittuntur) Attamen quæ sunt immediate ex Dei manu opera, non possunt non perfectissimè Exemplaris sui perfectionem referre. Vnde est idemmet professus, dedisse Deum figuram Mundo & decoram, & sibi congruam (quoniam consentaneum foret, vt quod animal deberet in se animalia omnia continere, eâ esset figurâ, qua omnes continerentur figuræ) ac ideò globosum fuisse factum Mundum, vt ipsius extremum paribus à medio radiis attingeretur.

Ac adnotari quidem posset, quod nonnulli notant, Platonem ad memoratum respexisse Problema; cùm datis Materia inordinatissima, & Idea pulcherrima, docuit fuisse Mundum à Deo, vt à Geometra præstantissimo, Materiæ æqualem, Ideæ similem



lem effectum: verum displicet, quod Materiam coæternam fecerit Deo, si voluit eam quidem duratione præcedere Mundum, ut plerique intelligunt; aut coæternum etiam ipsum Mundum, si præcessisse solum naturâ, ut Interpretes celebriores accipiunt.

Siquidem, utrumque repugnat sacro Geneseos Codici, iuxta quem satius est obseruare Senarium dierum numerum, quo Deus Mundum conditum voluit. Quippe non modò hic numerus designandæ Mundi perfectioni idoneus est, quatenus est omnium perfectorum primus, constans scilicet exquisitè ex aliquotis partibus, quæ sunt vnitas, binarius, ternarius: verum etiam præstat, quod Plato contendit; vnitate nempe Ideam, binario Materiam, ternario ipsum Solidum, corpus ve Mundi referens; quod Philo quoque ex parte habet. Ut taceam aliunde numerum Senarium, licet in se ductus, reductusque excreseat in numeros, redire tamen semper in sese (quoniam sexies sex sunt triginta sex; & hic numerus sexies, ducenta decem, & sex; & hic rursus sexies, mille ducenta nonaginta sex; atque ita porrò) ut intelligamus esse quidem Mundum & actu compositum, & potestate multiplicem; sed reipsâ tamen & vnicum esse, & ipsam Exemplaris, Authorisque sui, quantum potest, simplicitatem, vnitatemque æmulari.

An autem, cum Geometria non agnoscat corpora plura vocata Regularia, quàm quinque: tribuit Deus illorum formas corporibus quinque Simplicibus Mundi; Cubicam videlicet Terræ, Icosahedri-

C



cam Aquæ, Octahedricam Aëri, Pyramidalem Igni, Dodecahedricam Cœlo: Ita quidem ipsemet Plato, Pythagoreos imitatus: utcumque id esse accipiendum constet, non de figura sanè totali, ac externa; sed aut de Proprietatibus symbolicè significatis, verbi causâ soliditate, fluiditate, mobilitate, & cæteris, ut vulgaris sententia est; aut de Harmonicis regionum Planetariarum interuallis, ut non desunt, qui autument; aut, citra ambages, de figuris Atomorum, corpusculorumve *ἡ μικρότητα*, ob paruitatem inconspicuum, ex quibus Deus vnumquodque corporum primorum contextuerit, ut ille in Timæo non obscure insinuat, & nonnulli, quos inter Simplicius, Pachymeriusque, interpretantur. Vt cumque sit autem, & quæcumque habeantur præcipua Mundi corpora; constat profectò posse nihil ipsis regularius formari.

Nam & quamvis non admittatur illa Mundi Anima, quæ *ἐκ πάντων, καὶ ἐτέρου*, ex Eodem, & Diuerso composita, & quasi tertia Natura facta, contineat in sese rationes harmonicorum numerorum, ipsique adeò accommodetur decantatus ille Quaternio, Sacramentum Pythagoræ, & *ἀενναῖος πηγάς*, sempiterna natura fons, propter denarium (& ipsum quidem Principiorum) numerum, quem eius partes iunctæ componunt; propterq; præcipuas Cōsonantiæ species, quarum proportionibus ambitu suo complectitur (cū quatuor ad duo, & duorum ad vnum sit proportio dupla, qua constat Diapason, seu vocata Octaua; trium ad duo, sesqui-altera, qua



Diapente, seu Quinta; quatuor ad tria, sesqui-tertia, qua Diatessaron, siue Quarta) Nihilominus manifestum est eam esse naturam Mundanorum corporum, vt, seu molem spectes, qua maxima sunt; seu contexturam, qua integerrima; seu cohæsiõnem, qua congruentissima; seu figurationem, qua speciosissima; seu positionem, qua decentissima; seu mutuam habitudinem, qua ordinatissima; seu motionem, quietemve, qua durabilissima; seu finem, ac destinationem, qua appositissima; seu aliud demum quidlibet; esse nihil possit concinnius.

Quare & nihil est necesse ad explicandam τὸ τελευτῶν, καὶ ἐπέγου, *Eiusdem, & Diuersi*, seu *Indiuidui, & Diui-  
dui circa corpora* naturam, progressiones Geometricas instituere ad duos primos Cubos, octo scilicet, ac viginti septem, ex quibus contextus numerus Triginta quinque dicitur Harmonia, quod componatur aliunde quoque ex sex, octo, nouem, duodecim, in quibus etiam enumeratæ proportionēs harmonicæ, ac insuper sesqui-octaua, quæ Toni maioris appellati est propria, consistunt. Neque item fingere Deum mistam ex vtroque naturam fecisse quasi literam *Iota*, ex qua in longum bisecta, & partibus in medio reuinctis, ac in formam literæ *Xi*, diductis, inque orbem oppositè conuersis, duplices cœlorum conuersiones intelligantur; nimirum & vna primi Mobilis, Sphæræve Inerrantium in occasum, ob naturam *Eiusdem indiuiduam*; & septem ipsorum Planetarum in ortum, ob naturam *Diuersi diuiduam, & septupliciter subdistinctam.*



Satis est, factam occasionem adnotandi illum concentum, siue tantum illum, ac tam dulcem sonum, propter quem attributæ sunt singulis Sphæris suæ Sirenes, seu Musæ, separatæve illæ Substantiæ, ideò à Posterioribus dictæ Intelligentiæ, quòd corporeæ molis alioquin expertes intelligentissimæ sint harmonicarum proportionum, à Deo verò Musagete, & quasi Apolline præscriptarum. Nempe quasi sint Astra matutina, à quibus se Deus laudari testatur, ac subinde interrogat, quis enarrabit cælorum rationem, & Concentum cæli dormire quis faciet?

Atque id quidem, ne memorem, quod Deus rursus legitur appendisse tribus digitis molem Terræ, & monteis in pondere, colleis in statera librasse: quod appendisse Aquas in mensura, posuisse legem pluuiis, fecisse ventis pondus, & id genus similia; ex quibus mirum haudquaquam est, agnosci vulgò in Elementis eam symmetriam, atque temperiem, ut ex ipsis, tametsi variè tam secundum alteratrices, quàm secundum motrices qualitates contrariis, Systema tamen harmonicum, quasi ex quibusdam acutis, grauibque sonis resultet. Præclare videlicet ille,

Tu numeris Elementa ligas; ut frigida flammis,  
Arida conueniant liquidis; ne purior Ignis

Auolet, aut mersas deducant pondera Terras.

Vt iam de Mistis corporibus, quæ in serie sunt rerum suborientium, seu generabilium, corruptibiliumque, dicamus; Ecquis vel in iis, quæ solent



imperfectè mista cenferi, non admiretur Arcum illum, quem Deus apertè recepit se positurum in nubibus; quasi non foret Geometra alius, qui circino vllò tam perfectum describeret; & pictore adhibito, tanta colorum varietate, mistura, suauitate, viuitate, pulcritudine exornaret? Vide Arcum, inquit Sapiens, & benedic eum, qui fecit illum: valdè speciosus est in splendore suo; manus Excelsi aperuerunt illum. Ecquis non proinde Halonem, vocatamve Coronam suspiciat, quæ vt diametro est dimidio minor, sic ambitu est duplò consummator, quàm Iris? Ecquis non Parhelia, siue Soleis spurios, qui vt sunt Iridum, Coronarumque mutuò intersectarum quasi nodi; sic habent semper à vero Sole dimensam, statamque distantiam? Præcipit Deus Nivi, vt descendat in terram, ac ipsam sicut lanam dat: Putatisne verò illi quasi pappi, flocculive niuei diuina quadam Geometria carent? Ecce ipsi aliud nihil sunt, quàm texturæ quædam candidarum stellularum, quarum quælibet ex sex radiis scitissimè compingitur; iisque nunc quidem simplicibus, nunc verò heinc inde veluti ramosis. Putatisne carent & Sales, quos Deus Terræ, ad illius fecunditatem indidit? Ecce commune, seu Marinum, quod vulgò non nisi detritum habetur, formatur constanter in hexahedricam, seu eubi figuram; Aluminosum in octahedricam; & cæterorum quodque in suam: vtcumque mentem, oculosque ad hæc non aduertentibus omnia esse temerè potiùs, quàm Geometricè figurata appareant; neque manifestum fiat illicò, quàm ve-

C iij.



rè dictum fuerit, & fide carere momentis singulis Naturam, & opera omnia Naturæ, opera esse Intelligentiæ.

Quid commemorem verò Lapides : quos inter Smaragdus dodecahedrica specie nascitur, Adamas octahedrica, Amethystus hexahedrica, & Crystal-  
lus etiam, non modò quæ parallelipipedos est, ve-  
rùm etiam quæ in cuspidem coit? Sic & apud nos  
creatur Rhomboites ; & passim Pyrites tessellatus  
est ; & Specularis lamellatus ; & Focarius tabella-  
tus, & Cotes etiam id speciale seruant, vt sint, præ-  
ter formam, longitudine ad latitudinem dupla. Di-  
cerem de Stellatis, Striatis, Cornutis, Conchitis,  
Ostreitis, Pectinitis, Stromboitis, & cæteris ; imò  
& de Fluuiatilibus, aliisque passim obuiis ; etiam  
de Saxis, Rupibusque, quibus, si per tempus lice-  
ret, suas quoque esse figuras natiuas ediffererem :  
Sed vice tamen omnium vnus esto Magnes, qui  
cùm sit alioquin

Decolor, obscurus, vilis ; non ille repexam  
Cæsariem Regum, nec candida Virginis or-  
nans Colla :

si quis tamen in eo attendat non modò illam fer-  
ri pelliciendi, conuertendique in polos vim ; ve-  
rùm etiam æmulationem Geometricæ structuræ  
Mundi ; cùm non modò sit, vt iam dici solet, *μικρογή*  
*Terrella*, sed etiam *μικροχρσμος Mundulus* ; quatenus  
suum habet Axem, suum Centrum, suos Polos,  
suum Æquatorem, suos Parallelos, suos Meridia-  
nos, cæteraque miracula ;



Tum superat pulcros cultus, & quicquid Eois  
Indus littoribus rubra scrutatur in alga.

Ad Vegetabilia quod spectat; Geometrica sanè  
est Seminea vis, quam Deus initio impressit, dum  
iussit Terram germinare herbam virentem, & fa-  
cientem semen, & lignum pomiferum faciens fru-  
ctum iuxta genus suum, cuius semen in semetipso  
esset. Non enim potest Imperator Geometricè, ac  
scitè magis milites componere, ordinesque, &  
aciè instruere, quàm hæc vis parteis plantæ omneis,  
earumque functiones, quasi pensa quædam distri-  
buit. Heinc nempe sunt distinctæ illæ, vt secun-  
dum totas, sic secundum parteis, plantarum figuræ;  
& distincti etiam, statique ordines, ac numeri,  
quibus in cauleis pullulant, finduntur in ramos,  
panduntur in folia, excrescunt in fructus: & tan-  
ta quidem concinnitate, vt turbinatis, orbicula-  
tis, angulosis, cylindricis: vt umbellatis, racema-  
tis, spicatis, iubatis; vt galeatis, umbilicatis, lunulatis,  
campanulatis; vt crispatis, aculeatis, denticulatis, la-  
ciniatis; vt triphyllis, pentaphyllis, heptaphyllis,  
hecatomphyllis; vt monostichis, dystichis, tetra-  
stichis, hexastichis; atque id genus innumeris,  
nihil exæogitari elegantius possit. Ne proportio-  
nem memorem, qua vnaquæque attemperatur,  
vt læta suo solo, cæloque proueniat; vt si aliundè  
fit imbecillior, aut firmetur geniculis; aut cla-  
uiculis, quasi manibus fulcimenta corripit; aut  
hamulis cuiuslibet rei, quam contigerit, adhære-  
scat: vt donec fœtus sunt teneriores, ipsos pul-



pis, corticibus, filiquis, vtriculis, calyculis, glumis; imò etiam spinis, aristis, aliisque id genus decentissimè figuratis communiat.

Porro & in ipsis Animalibus, Semineaque illorum vi luculentior adhuc Geometria, tum instituta, cum iussit Deus producere Aquas Cete grandia, & omnem animam viuentem, atque motabilem in species suas, & omne volatile secundum genus suum: Producere Terram animam viuentem in genere suo, iumenta, & reptilia, & bestias terræ secundum species suas: ac Hominem ipsum, quem de limo terræ formauerat, crescere, multiplicari, & replere terram. Nimirum ea vis tantâ est industriâ, vt tota nostra Mechanice nihili prorsus habenda sit, si eum ea, quam obseruare vel in minimi animalculi fabrica licet, comparetur. Verè profectò vir ille Sanctus: Manus tuæ fecerunt me, & plasmauerunt me; pelle, & carnibus vestiisti me; ossibus, & nervis compegisti me. Ecquis enim alius Dædalus, aut Architas potis esset excogitare, elaborareque tam præclara Automata, ac tot in ipsis machinamenta; non ad paucos sanè, atque momentaneos; sed ad innumerabileis, constanteisque, tam naturaleis, quàm spontaneos motus? Ac ipsa quidem potissimum, tam exquisitè fabricata, tam concinnè disposita, tam aptè cohærentia, tam congruè distincta, tam inconfusè copulata, tam instituta appositè, tam vsurpata facillè, tam obsequentia expeditè; vt nemo vel ad vnum cor, vel ad vnum oculum, vel ad vnam manum, vel ad aliam quamlibet



bet partem, eiusq; texturam inimitabile attendens, non obstupescat, exclametque cum Psalte, Quā mirabilis facta est scientia tua ex me, ô Deus! Quid verò exclamet dumtaxat factam ex se mirabilem? Quid ex ipsis quin-etiam Elephantibus, ac Balænis? cum etiam Pulex, etiam Acari, ex tam multis, tamque admirandis organulis, & machinulis constet, ut iure dicatur à sancto Doctore, Diuinus ille Artifex ita magnus esse in magnis, ut minor in paruis non sit.

Enimverò, cum ipsum corpus tantā moliatur symmetriā; ecquid dicamus de Anima, in cuius gratiam id comparatur? An-non vel in ipsismet Brutis mirari licet ordinem, quo se Facultates animales habent, dum sentiens monet, apprehendit imaginans, iubet appetens, exsequitur mouens? An-non mirari proportionem, qua Facultates singulæ cum obiectis suis sic contemperantur, commensuranturque, ut in relatione patientis ad agens, aut excipientis ad exceptum cœquatio vlla exquisitior esse, commendatiorque non valeat; & maximè quidem prout ex obiecti ad facultatem applicatione sensus, voluptasque sequuntur? An-non mirari præ cæteris vim illam Imaginatricē, Rationis adeò æmulam, ut ne Bruta nostri nimium similia esse videantur, præstare putemus, si ea non ratione, sed Instinctu, seu impetu naturæ cæco agi dicamus? Ut cumque sit enim; quantus quæso esse Geometer ille debeat, à quo habent Apes instinctum, ut fauos tam scitè conforment figurâ hexahedricâ, quâ non est alia magis idonea ad relinquendum vacui

D



nihil, quàm ad latera, apicesque coherens? A quo habet Aranea, ut contextura in orbem telam, de centro prouideat, radiosque diducat, ac firmet, quos inter deinceps ordiatur, perficiatque opus *ἑλικειδὲς*, seu *spiralī ductu*? A quo Formica, ut sua illa caua subterranea tantā prouidentia descriminat, cellulasque, quasi ædilis, pro v suum varietate partiatur? A quo Hirundo, ut ad trabem hemicyclīcū nidum fingat; qua forma, si locus, finisque spectetur, esse nec capacior, nec commodior valeat? A quo Gruum grex, ut volando in triangulum sese componat, ac aduersante ventorum vi, cuspidem penetrando præmittat? A quo grex Thynnorum, ut in illa sua, quæ quotannis peragitur, per Mediterraneum peregrinatione, formet se in cubum, ad natandum semper non modò gregatim, sed etiam in omnem positionis diuersitatem; aliæque id genus sexcenta?

Denique verò ex Rationali, siue hominis Anima, quam Deus speciatim ad imaginem, & similitudinem suam fecit, licet sanè intelligi quanta Dei Geometria sit, quandò ipsa tota ex rationibus veluti Geometricis constat. Primùm quippe sua ex natura ad sciendum comparata est; scientia verò in eam non subit, neque ipsi accommodatur, nisi sub forma, figuræque Syllogistica, ac Demonstratiua, qualem reperire in Geometricis duntaxat ratiociniis licet; aut si qua alia sint, quæ ex ipsis quadamtenus participant, eorumve structuram, & vim, perfectionemque æmulentur, ut etiam de ijs, qui-



bus Oratori vtendum est, ille præscribit, qui iure omnium optimus in arte dicendi magister habetur. Heinc certè propter naturalem veluti commensurationem, quæ inter scientiam, scientemque est, existerè videntur illæ omnium humanissimæ, ac ineffabilissimæ voluptates, quibus non modò Pythagoras, Archimedes, & quotquot præclarum aliquid inueniunt in Geometricis, afficiuntur, ac ideò aut sacrificant, aut exclamant, ingeminantque celebre illud *εὐρηκα*: verum etiam Tyrones ipsi, qui nescio qua mira suauitate exsiliunt, quoties cuiuspiam Theorematis demonstrationem primùm perspiciunt. Deinde, cùm humana Mens fundat ex seipsa, tanquam ager ferax, tantam segetem admirandorum Theorematum; an-non par est ipsam sic conditam esse, vt semina eorum in sese contineat, & ex ipsis veluti constet; naturæque adeò Geometricæ sit; cùm & tametsi nugamenta sæpe-numero proferat, illa tamen sint quasi partus spurij, & recrementa veluti quædam; ipsa exsistente ex se comparata, vt veritatem parturiat, & cognoscendo Authorem suum, qui Veritas est, ideò referat, quòd ille, qui plantauit aurem, vt Psalter canit, non audire, & qui finxit oculum, non considerare non possit. Et sanè id vel heinc suadetur, quòd ad imaginem Dei facta Anima, exsatiari nunquam cognoscendo valeat, quovsq; ipsum, omnia videntem, facie ad faciem videat; & facta inter gratiæ semen, gloriæque lumen exæquatione, illum secundùm omnem sui quasi dimensionem possideat; ac plenissi-

D ij



ma, securissimaque eius fruitione fœlix, conquiescat.

Atque hætenus quidem Hymnus esto, non qualem pro rei maiestate decuit, sed qualem pro virium tenuitate licuit, præcinere rerum Authori sapientissimo, potentissimo, optimoque. Nunc cum ipsum opus exsequi oporteat in hocce celeberrimo totius non modò Gallici Imperij, verùm etiam orbis Christiani theatro; Quid, putas, mihi est animi, Eminentissime Cardinalis, cogitanti non posse me eam sustinere personam, quæ tuæ de me opinioni, ac fortassis aliorum quoque expectationi respondeat? Cogitanti me imparem, qui claritatem promoueam tantæ Academiæ quæsitam, tum ab illis luminibus Orontio, Pena, Bressio, aliisque claris antecessoribus; tum à clarissimo collega Morino, cui famam Famosum peperit problema, & scientia Longitudinum longè, latèque propagauit? Cogitanti immeritum, qui in Societatem coopter tot cæterorum celebrium Professorum adeò illustrem?

Nam Duuallius quidem meritissimus non ætate magis, quàm virtute sua Decanus, aut Decani vicibus fungens, eiusmodi est, qui quantum in Græca, Latinaque Philosophia possit, testis esse abundè valeat, vel ipse Aristoteles, qui toties Græcè, Latineque ab eo illustratus, quam ab ipso accipit lucem, cumulatissimè in ipsum refundit. Nemo interim ambigit, quin designatus ipsi collega Capreolus electione tua dignissimus sit, qui toties, tantaque frequentia, ac celebritate tanta nominis Philo-



sophicum stadium est emensus. Quod idem dicendum quoque de Aluerno, quem designasti similiter collegam eximio Flauinio. Flauinio, inquam, eximio illi, qui cæteris Sacrae Facultatis Doctoribus par, id speciale habet, vt ex ipso fonte, Hebræo nempe textu, hauriat, vnde quasi viuo gurgite exundet. Nec secus Dartius, qui in Iure, quod profitetur, haberi potest quasi liber Polyeleti inscriptus Canon, à quo olim, velut à lege, lineamenta artis, vt Plinius loquitur, petebantur.

Iam in Medica Facultate is Riolanus est, quem exteri æquè, ac indigenæ admirantur; vt quo minutissima quæque, ex quibus corpus humanum constat, scrupulosissimè scrutante nemo videatur melius parere oraculo illi *γινώσκει σεαυτόν, noscete ipsum.* Is Charterius, cui quantum sit tota Medicorum natio debitura, clamat magnum illud Hippocraticorum, Galenicorumque operum Syntagma, quod generosissimè est aggressus; idque substituto interrim Cusinoto, qui sese vt suggestu Regio, sic Augusti cubiculi primario gradu dignum exhibuit. Is Moreus, quem nescias, plureis-ne in Mente, an in Musæo libros possideat: dignus, qui viuat, per quem viuunt tot nobiles Medici; dignus, qui valeat, à quo illustrata tot valetudinis documenta. Is Akakias, qui eum se præstat, vt breui claris Majoribus præluere virute possit.

In ipsa verò Arte dicendi, Latina-ve Eloquentia, nouit non-nemo quantum valeant, tum Tarinus, quæ aliunde Græca, imò omnigena eruditio adeò com-

D iij



mendat ; tum Remius , in quo cum Tulliana facundia certat Virgiliana maiestas Heroïcorum poematum Tibi , sat scio , pridem perspecta. In linguis autem Exoticis, ac præter Hebræam, de qua est iam dictum, ignorat nemo esse Mon-morium, Dubosiumque eiusmodi viros, qui Simonideâ pollentes memoriâ, quicquid Græcarum est literarum restituere, si perierint, possint. Nemo Sionitam, qui inter primos nominandus fuerat, eiusmodi esse, qui Arabas ipsos docere Arabismum possit.

Cogitanti, inquam, hæc mihi, quid esse putas animi, Eminentissime Cardinalis; nisi quod tibi dum obsequor, & Regi Christianissimo, quam te Suasore censuit, mandavitque, operam præsto, Spes est, ut Deuster optimus obedientiam magis, quam sacrificium probet, ac ideo mihi, quod in me erit, facienti non denegat gratiam?

Quod superest; cum Regium sit, quo deinceps defungor munus, finem dicendi non antè facio, quam *εὐχαριστήσας* persoluens Regi optimo maximo, apprecher ipsi omnimodam ( quod totis sanè viribus, plenisque votis facio ) apprecher, inquam, omnimodam à Rege Regum fœlicitatem. Et quàm sit quidem reliquo Imperij decursu fœlix exstiturus, angurari vel ex eo licet, quod omnia iam hocce triennio prosperè adeò suecesserint. Scilicet cor Regis in manu est Dei, neque abbreviata est manus Domini, ut minùs deinceps de Sion tueatur ipsum, minùs consilium eius confirmet, minùs de Sancto auxilium mittat, minùs euenta omnia fortunet.



Natus inter lilia, crescit inter lauros, & palmarum  
victicium proceritate obumbratur: Ecqua proinde  
opima spolia relaturus olim non sit, ubi ad He-  
roum peruenierit robur? Ecqua non domiturus mon-  
stra, qui etiam in cunis, vt Hercules alter, facinora  
adeò gloriosa patrârit?

An-non aliunde speremus ipsum iri Salomoni  
exæquarum sapientiâ; quando ne expectato qui-  
dem (nec-dum superato) altero septennio, sed etiam  
per primum, quod nuper exegit, ita se præbuit  
compositum, vt neque priuatim quicquam egerit,  
cuiusmodi infantes solent, neque publicè quic-  
quam, quod non virum ætate maturum maximè de-  
cuerit? An-non speremus, vt veluti Salomonis tem-  
poribus, sic in eius diebus iustitia, & abundantia  
pacis oriatur; quando inter pacis desideria crescit: &  
à sceptro vsque assumpto Augustissima eius Parens  
ea agitauit de pace consilia, quæ futurum est pro-  
pediem, vt, fauentibus Superis, benè, ac fœliciter  
vertant? An-non proinde spes magna sit, vt quem-  
admodum Salomon ædificauit Templum in mon-  
te, in quo victimæ Pacis offerrentur; sic ipse, præter  
cætera pietatis suæ monumenta, Delubrum hoc, in  
hocce monte instauret, ac perficiat, in quo ornamē-  
ta Pacis excolantur. Ornamenta, inquam, hoc est  
bonæ Artes, ipsaque imprimis Mathesis, quæ Re-  
ges quoque ipsos tantopere decet, illosque à  
quibus amatur, fouetur, & excolitur, super  
æthera notos facit; vt sunt exemplo tot Princi-  
pes, quorum nomina, tanquam ipsi cælo in-



32 ORATIO INAUGVRALIS.

scripta, cum cælo perennant.

Spes certè est ingens, vt futurus Princeps & do-  
mi, & foris fœlicissimus, gloriosissimusque, no-  
men quoque suum, ob earumdem artium amo-  
rem, perinde inscribat; ac per ora volitans virum,  
& magis, magisque in dies efflorescens, assequa-  
tur, quod voueo, famam nominis sempiter-  
nam.

D I X I





o-  
o-  
o-  
m,  
da-  
ci-







KONSERVIERT DURCH  
ÖSTERREICHISCHE FLORENZHILFE  
WIEN 1967

005644243